

1 REYOB

Abisag tsi' melbe chuqui yom David

1 Che' cabalix i jabilel David, c'uñix pañimil cha'an i ñoxlel. Cabal tsi' yubi tsañal anquese wen bac'bil ti cabal i mosil. ²Jini cha'an winicob tsi' subeyob: C yum rey, la sac'antic juntiquil xch'oc cha'an mi' coltañet ti pejtelel chuqui a wom. Mi caj i q'uixñañet che' mi' wlayel awic'ot. Che' jini mi caj a q'uixñañ, che'ob. ³Jini cha'an tsi' sac'layob xch'oc wen i t'ojol ba ti' lumal Israel, jinto tsi' tajayob ya' ti Sunem juntiquil xch'oc i c'aba' Abisag. Tsi' paybeyob tilel jini rey. ⁴Jini xch'oc wen i t'ojol jax. Tsa' caji ti e'tel ti' tojlel rey. Tsi' canta jini rey, pero ma'anic tsi' pi'le.

Adonías tsi' mula i yochel ti rey

⁵Juntiquil i yalobil David i c'aba' Adonías (am ba i ña' i c'aba Haguit) tsa' caji i chañ'esan i ba. Tsi' yala: Joñon mi caj cochel ti yumal i q'uexol c tat, che'en. Tsi' ch'ama tilel carreta tac, yic'ot winicob c'achalo' ba ti caballo, yic'ot lujuntiquil i yuxc'al (50) winicob tsa' ba i pi'leyob ti xambal. ⁶I tat Adonías ma'anic tsi' ju'sabe i pusic'al i yalobil che' alob to. Ma'anic tsi' sube: ¿Chucoch tsa' mele tac bajche' iliyi? che'en. Ili winic wen i t'ojol jax ti q'uelol, jiñach i yijts'in Absalón. ⁷Adonías tsa' caji' pay Joab (i yalobil Sarvia) yic'ot jini motomaj i c'aba' Abiatar. Tsi' temeyob i t'an Joab yic'ot Abiatar cha'an mi' coltañob, cha'an mi' yotsañob ti rey. ⁸Pero xuc'ulob to yic'ot David jini motomaj Sadoc, yic'ot Benaía (i yalobil Joiada), yic'ot jini x'alt'an i c'aba' Natán, yic'ot Simei, yic'ot Rei, yic'ot jini ch'ejl ba winicob i cha'an ba David. Ma'anic tsi' c'ayayob

i yum. ⁹Adonías tsa' majli ya' ti' t'ejl jini colem xajlel i c'aba' Zohélet am ba' ti' tojlel Rogel. Tsi' tsansa tiñame' yic'ot wacax yic'ot jujp'em ba' alac'al. Tsi' pɾaya pejtelel i yerañob, i yalobilo' ba' jini rey David, yic'ot pejtelel año' ba' i ye'tel ch'oyolo' ba' ti Judá. ¹⁰Pero ma'anic tsi' pɾaya ti q'uiñijel jini x'alt'an i c'aba' Natán, mi Benaía, mi Salomón, mi xcantayajob i cha'an rey.

¹¹Jini x'alt'an Natán tsa' majli i suben Betsabé i ña' Salomón: ¿Mach ba' anic tsa' wubi tsa'ix ochi ti rey Adonías i yalobil Haguit? Mach yujilic ja'el c yum David, che'en. ¹²Jini cha'an mi caj c subeñet bajche' yom ma' mel mi a wom a cantan a ba' yic'ot a walobil Salomón, ame chamiquetla. ¹³Cucuñun ti ora cha'an ma' suben jini rey David: “¿Mach ba' anic tsa' subeyon mi caj i cha'len yumal calobil Salomón che' chameñetix? Jini mi caj i yochel ti a q'uexol. ¿Mach ba' isujmic? Jini cha'an ¿chucoch woli ti yumal jini Adonías?” Che' yom ma' suben David. ¹⁴Che' wola' pejcan jini rey, joñon mi caj cochel ti' tojlel rey cha'an mic suben i sujmach a t'an, che'en Natán.

¹⁵Natán yic'ot Betsabé tsa' ochiyob ba' ñolol jini rey. Wen ñoxix jini rey. Abisag jini ch'oyol ba' ti Sunem woli' cantan. ¹⁶Betsabé tsi' ñochchoco i ba' ba'an jini rey. Tsi' yaq'ue cortesía. Jini rey tsi' c'ajtibe: ¿Chuqui a wom? che'en. ¹⁷Betsabé tsi' jac'a: C yum, mi cal c'ajal to a cha'an chuqui tsa' subeyon ti' tojlel lac Yum Dios. La calobil Salomón mi caj i yochel ti yumal che' ma' chamel. Salomón mi caj i cha'len yumantel ti a q'uexol. ¿Mach ba' isujmic? ¹⁸Pero wale tsa'ix ochi Adonías ti yumal. Maxto anic ubibil a cha'an. ¹⁹Tsa'ix i tsansa cabal wacax, yic'ot jujp'em ba' alac'al, yic'ot cabal tiñame'. Tsa'ix i pɾaya pejtelel a walobilob, yic'ot jini motomaj Abiatar, yic'ot Joab i yum soldadojob. Jini jach Salomón ma'anic tsi' pɾaya. ²⁰Wale c yum, pejtelel jini israelob woli' pijtañob a t'an. Yom ma' tsictesan majqui mi caj i cha'len yumantel ti a q'uexol che' chameñetix. ²¹Machiqui mi caj c taj lojon c wocol, joñon quic'ot la calobil Salomón, che' chameñetix. Mi caj i contrajiñon lojon. Che' jini mi caj c tsansantel lojon, che'en Betsabé.

²²Che' woli to ti t'an Betsabé yic'ot jini rey, tsa' c'oti jini x'alt'an Natán ba' añob. ²³I winic jini rey tsi' sube: Wa'an jini x'alt'an Natán, che'en. Natán tsi' lac'tesa i ba' ba'an jini rey. Tsi' ñochchoco i ba' ti' tojlel. ²⁴Tsi' sube: C yum rey, ¿tsa' ba a

wac'Λ a t'an cha'an mi' yochel ti rey Adonías che' chameñetix, cha'an mi' ch'Λm i ye'tel ti a q'uexol? ²⁵Come sajmaΛ tsa' majli i tsansan wacax, yic'ot cabal jujp'em ba alac'Λl, yic'ot cabal tiñame'. Tsi' paya majlel pejtelel a walobilob, yic'ot Joab i yum soldadojob, yic'ot ja'el jini motomaj Abiatar. Wale temel woliyob ti c'ux waj. Wolix i yalob: “La' q'uejlic ti ñuc jini rey Adonías. La' jal'ac ti' ye'tel”, che'ob. ²⁶Cojach joñon quic'ot jini motomaj Sadoc, yic'ot Benaía (i yalobil Joiada), yic'ot Salomón a walobil ma'anic tsi' payayon lojon. ²⁷¿Che' ba tsa' wac'Λ a t'an cha'an mi' mel che' bajche' iliyi? Come ma'anic tsi' yubiyob a winicob majqui mi caj i ch'Λm a we'tel che' chameñetix, che'en Natán.

David tsi' tsictesa mi caj i yochel ti rey Salomón

²⁸Jini rey David tsi' yala: Paya tilel Betsabé, che'en. Jini cha'an Betsabé tsa' cha' ochi ti mal ba'an jini rey. Tsa' wa'le ti' tojel i wut. ²⁹Jini rey David tsi' yala: Isujm chuqui tsac subeyet, come mic bac'ñan lac Yum tsa' ba i coltayon ti pejtelel c wocol. ³⁰Tsa'ix c subu ti' tojlel lac Yum i Dios Israel: “Jini la calobil Salomón mi caj i cha'len yumΛ che' mic chamel. Salomón mi caj i yumantel tij q'uexol che' bajche' tsa cΛΛ”. Jini cha'an la' ujtíc ti ora che' bajche' tsac subeyet, che'en David. ³¹Betsabé tsi' ñocchoco i ba ti lum ti' tojlel. Tsi' yala: Cuxul yom mi' yajñel ti pejtelel ora jini rey David, che'en.

³²Jini rey tsi' yala: Payala tilel jini motomaj Sadoc, yic'ot jini x'alt'an Natán, yic'ot Benaía (i yalobil Joiada), che'en. Che' ba tsa' pajiyob, tsa' tiliyob ti ora ba'an jini rey David. ³³David tsi' subeyob: Payala majlel Salomón yic'ot jini xcantayajob c cha'an. Yom c'achΛl mi' majlel Salomón tic mula. Payala majlel ti Gihón. ³⁴Come ya' añob jini motomaj Sadoc yic'ot jini x'alt'an Natán. Mi caj i wa'chocoñob Salomón cha'an mi' yochel ti rey ti' tojlel pejtelel israelob. Wusula jini trompeta. Cha'lenla c'am ba t'an cha'an cuxul mi' yajñel ti pejtelel ora jini rey Salomón. Che'ach yom mi la' mel. ³⁵Yom mi la' pay sujtél cha'an mi' la' buchchocon tic buchlib cha'an mi' yumantel tij q'uexol, come tsa'ix c yajca cha'an mi' cha'len yumΛ ti' tojlel Israel yic'ot ti' tojlel Judá. Che' tsi' yala David. ³⁶Benaía (i yalobil Joiada) tsi' sube: Che'ach yom. La' ujtíc che' bajche' yom lac Yum Dios, i Dios jini c rey. ³⁷La' i coltan

Salomón lac Yum che' bajche' tsi' coltayet. La' utsi p'ojlic i ñucler Salomón ñumen bajche' i ñucler i tat, che'en Benaía.

³⁸Jini cha'an tsi' pɔɔɔyob majlel Salomón, yic'ot jini motomaj Sadoc, yic'ot jini x'alt'an Natán, yic'ot Benaía, yic'ot jini xcantayajob i cha'an David. C'achal tsa' majli Salomón ti' mula i tat. Tsi' pɔɔɔyob majlel ti Gihón. ³⁹Jini motomaj Sadoc tsi' ch'amɔ jini xulub am bɔ ti Tabernáculo but'ul bɔ ti aceite. Tsi' mulbe i jol Salomón. Tsi' wusuyob trompeta. Pejtelel jini x'ajñelob tsi' yalɔyob: Cuxul yom mi' yajñel jini rey Salomón ti pejtelel ora, che'ob. ⁴⁰Che' jini tsa' caji i laj tsajcañob majlel ti Jerusalén. Tsi' wusuyob flauta. Wen tijicñayob ti pejtelelob. Ju'ucñayob ti t'an che' bajche' i yujquel lum.

⁴¹Ya' ba' ujtemobix ti we'el Adonías yic'ot jini winicob woli bɔ i tsacleñob, tsa' caji i yubiñob chuqui woli ti ujtel. Joab tsi' yubibe i t'an trompeta. Tsi' yalɔ: ¿Chuqui woli' melob ya' ti tejclum che' ju'ucñayob jax? che'en. ⁴²Che' woli to ti t'an, tsa' ochi Jonatán (i yalobil jini motomaj Abiatar). Adonías tsi' sube: Ochen come wen winiquet. Anix a pusic'al. Mi cal mi caj a subeñon lojon wen bɔ t'an, che'en. ⁴³Jonatán tsa' c'oti i suben Adonías: Ma'anic, come lac rey David tsa'ix i wa'choco ti rey Salomón. ⁴⁴Tsi' choco majlel ti Gihón, yic'ot jini motomaj Sadoc, yic'ot jini x'alt'an Natán, yic'ot Benaía (i yalobil Joiada), yic'ot jini xcantayajob i cha'an rey. C'achal tsa' majli Salomón ti' mula jini rey David. ⁴⁵Jini motomaj Sadoc yic'ot jini x'alt'an Natán tsi' wa'chocoyob ti rey ya' ti Gihón. Sujtelix woliyob. Wen tijicñayob i pusic'al. Ju'ucñayob ti pejtelel jini tejclum. ⁴⁶⁻⁴⁷Wale tsa'ix buchle Salomón ti' q'uexol i tat cha'an mi' mel i yumantel. Pejtelel i winicob rey tsa' majli i yalq'ueñob i yutslel i t'an jini rey David cha'an ñuc woli' q'uelbeñob i yalobil. Tsi' yalɔyob: “Lac Yum Dios la' i ñumen aq'uen i ñucler a walobil Salomón che' bajche' tsi' yalq'ueyeyet. La' i ñumen coltan ti' ye'tel che' bajche' tsi' coltayet”, che'ob. Jini rey David tsi' licchoco i bɔ ti' tojlel Dios ya' ti' wayib. ⁴⁸David tsi' yalɔ: “La' sujbic i ñucler lac Yum i Dios Israel, come wale tsa'ix i yalq'ueyon j q'uexol mu' bɔ caj i cha'len yumantel che' cuxulon to”, che'en David. Che' tsi' yalɔ Jonatán.

⁴⁹Che' bɔ tsi' yubiyob jini t'an, tsa' caji yob ti baq'uen pejtelel jini pɔyobilo' bɔ i cha'an Adonías ti c'ux waj. Ti ora jach tsa'

ch'ojyiyob. Ti jujuntiquil tsa' loq'uiyob majlel. ⁵⁰Adonías tsi' wen bɑc'ña Salomón. Tsa' majli ti puts'el ti Tabernáculo cha'an mi' chucben i xulub jini pulantib. ⁵¹Tsa' tsictesabenti Salomón cha'an tsa' majli Adonías i chucben i xulub jini pulantib cha'an bɑq'uen. Adonías tsi' yɑlɑ: Subenla jini rey Salomón cha'an ma'anic mi' tsɑnsañon, che'en. Che'ach tsa' subenti. ⁵²Salomón tsi' jac'ɑ: Mi xuc'ul mi' yajñel tic tojlel, ma'anic mi caj i tic'lantel, pero mi tsa' caji i mel chuqui jontol, wersa mi caj i chamel, che'en. ⁵³Jini rey Salomón tsi' choco ti payol che' ya'an ti' t'ejl jini pulantib. Che' bɑ tsa' c'oti ba'an Salomón, tsi' c'uchchoco i bɑ Adonías. Salomón tsi' sube: Cucux ti a wotot, che'en.

I mandar David ti' tojlel Salomón

2 Che' lɑc'ɑlix i yorajlel cha'an mi' chamel David, tsi' wen cantesa Salomón i yalobil. Tsi' yɑlɑ: ²Joñon muq'uix cajel c chamel che' bajche' i tilel mi lac chamel. Ch'ejl'esan a bɑ, yom p'ɑtɑlet. ³Jac'ben i mandar a Yum Dios. Yom ma' chɑn cha'len xɑmbal ti pejtelel i bijlel. Yom ma' chɑn jac'ben i t'an yic'ot i cantesa, yic'ot i tic'ojel, che' bajche' ts'ijbubil i cha'an Moisés. Che' jini uts'at mi caj i yujtel pejtjel chuqui ma' ña'tan a mel ila ti pañimil. ⁴Mi che'ach ma' mel, lac Yum mi caj i ts'actesan i t'an tsa' bɑ i subeyon. Mi xuc'ul mi' cha'leñob i ye'tel jini calobilob yic'ot c p'olbal ti pejtelel i pusic'al, ma'anic mi caj i chilbentel i ye'tel ti' tojlel israelob.

⁵Tsa'ix a q'uele chuqui tsi' tumbeyon Joab (i yalobil Sarvia). Tsi' tsɑnsa jini cha'tiquil ñuc bɑ yumɑlob año' bɑ i ye'tel ti' tojlel soldadojob ti Israel. Jiñobach Abner (i yalobil Ner) yic'ot Amasa (i yalobil Jeter). Anquese ma'anic guerra, tsi' cha'le che' bajche' ti guerra. Jini cha'an an ti' wenta Joab cha'an mi' toj i mul. ⁶Jini cha'an yom ma' melben che' bajche' an i melbal. Mach yomic ma' to'ol ñusaben i mul ili winic. Mach yomic yilol jach mi' chamel che' sɑquix i jol. ⁷Pero coltan i yalobilob Barzilai jini galaad. La' i c'uxob waj yic'ot a pi'ɑlob, come tsi' pɑsbeyon i yutsllel i pusic'al che' bɑ tsa' puts'iyon ti' tojlel a wɑscun Absalón. ⁸Mach mi' ñajiyel a cha'an i mul Simei (i yalobil Gera), jini benjamín ch'oyol bɑ ti Bahurim. Simei tsi' p'ajayon ti jontol bɑ t'an che' wolic majlel ti Mahanaim. Che' sujtel woliyon, tsi' tajayon ti' ti' Jordán. Tsac sube ti' tojlel lac

Yum: “Ma'anic mi caj c tsansañet”, cho'on. ⁹Jini cha'an mach ma' to'ol ñusaben i mul, come a wujilix bajche' yom ma' mel. La' chamic cha'an i mul anquese ñoxix. Che' tsi' yalal David.

Tsa' chami David

(1 Cr. 29.26-30)

¹⁰Tsa' chami David. Tsa' mujqui ya' ti Jerusalén. ¹¹Cha'c'al jab tsi' cha'le yumal David ti Israel. Wucp'ejl jab tsi' cha'le yumal ti Hebrón. Uxlujump'ejl i cha'c'al (33) jab tsi' cha'le yumal ti Jerusalén. ¹²Salomón tsa' ochi ti rey i q'uexol i tat. Jini rey Salomón tsa' q'uejli ti ñuc ti pejtelel Israel.

Salomón tsa' xuc'le ti' ye'tel

¹³Adonías (i yalobil Haguit) tsa' majli ba'an Betsabé i ña' Salomón. Betsabé tsi' c'ajtibe: ¿Tsa' ba tili a tech wocol? che'en. Adonías tsi' yalal: Ma'anic, che'en. ¹⁴An chuqui com j c'ajtibeñet, che'en. Betsabé tsi' yalal: Subeñon, che'en. ¹⁵Adonías tsi' yalal: Awujil tsa' cajiyon ti yumantel i q'uexol c tat. Pejtelel jini israelob tsi' lon ña'tayob reyon, pero tsa' laj q'uextiyi che' ba tsa' ochi ti rey queran, come che'ach yom lac Yum. ¹⁶An jach junchajp com ba c'ajtibeñet. Mach cabalic. Mach a tic'on, che'en. Betsabé tsi' yalal: ¿Chuqui a wom? che'en. ¹⁷Adonías tsi' yalal: Suben jini rey Salomón cha'an mi' yalq'ueñon Abisag jini ch'oyol ba ti Sunam cha'an quijñam. Mi caj i jac'beñet come i ña'et, che'en. ¹⁸Betsabé tsi' yalal: Mi caj c mel che' bajche' wola' c'ajtibeñon, che'en.

¹⁹Jini cha'an tsa' majli Betsabé ba'an jini rey Salomón cha'an mi' tsictesaben i t'an Adonías. Jini rey tsa' tejchi ti' buchlib. Tsi' licchoco i ba ti' tojlel i ña'. Tsa' cha' buchle ti' buchlib rey. Tsa' ch'ajmi tilel yambal buchlibal cha'an i ña'. Tsa' buchle ti' ñoj. ²⁰Betsabé tsi' yalal: An junchajp com ba j c'ajtibeñet. Jac'beñon, che'en. Jini rey tsi' yalal: C'ajtibeñon, c ña'. Mi caj calq'ueñet, che'en. ²¹Jini i ña' tsi' sube: Aq'uen a wascun Adonías jini xch'oc Abisag ch'oyol ba ti Sunam cha'an i yijñam, che'en. ²²Jini rey Salomón tsi' sube i ña': ¿Chucoch wola' c'ajtiben i yijñam Adonías? Mi tsa calq'ue Abisag cha'an i yijñam, mux i chilbeñon c yumantel ja'el come c'ascun. Mi caj i coltañob jini motomaj Abiatar yic'ot Joab (i yalobil Sarvia), che'en. ²³⁻²⁴Jini rey Salomón tsi' wa'choco i t'an ti' tojlel lac

Yum. Tsi' yALA: La' i coltañon Dios. Adonías mi caj i chamel ti wale jach cha'an tsi' teche i ba tij contra. Melel chuqui mic subeñet, come mic bac'ñan lac Yum tsa' ba i wa'chocoyon ti que'tel ti' q'uexol c tat David. Tsa'ix i wa'chocoyon tic yumantel che' bajche' tsi' yALA, che'en. ²⁵Jini rey Salomón tsi' sube Benaía (i yalobil Joiada) cha'an mi' tsansan Adonías. Che' jini tsa' chami.

²⁶Jini rey Salomón tsi' sube jini motomaj Abiatar: Cucu ti Anatot ti a wotot. Mi mejlel c tsansañet cha'an a mul cha'an tsa' colta Adonías, pero ma'anic mi caj c tsansañet wale, come tsa' ch'ama tilel jini Arca* i cha'an ba lac Yum ti' tojlel c tat. Tsa' ñusa wocol ja'el ti' ye'tel c tat David che' ba tsi' ñusa wocol, che'en. ²⁷Salomón tsi' loc'sa Abiatar ti' motomajil. Che' jini tsa' ts'actayi i t'an lac Yum tsa' ba i yALA ya' ti Silo ti' contra i p'olbal Elí.

²⁸Che' ba tsi' yubi Joab bajche' tsa' ujti Abiatar, tsa' majli ti puts'el ya' ti mal Tabernáculo, come tsi' xa' tsajca Adonías anquese ma'anic tsi' tsajca Absalón. Tsi' chucbe i xulub jini pulantib*. ²⁹Tsa' subenti Salomón cha'an tsa' puts'i Joab ba'an jini pulantib am ba ti Tabernáculo i cha'an ba lac Yum. Salomón tsi' sube Benaía: Cucuñun ti ora cha'an ma' tsansan Joab, che'en. ³⁰Che' ba tsa' ochi Benaía ya' ti mal i Tabernáculo lac Yum, tsi' sube: Jini rey tsi' yALA loq'uen ya'i, che'en. Pero Joab tsi' yALA: Ma'anic. La' chamicon ilayi, che'en. Ti ora jach tsa' majli Benaía i cha' tsictesaben jini rey chuqui tsi' yALA Joab. ³¹Jini rey tsi' yALA: La' ujtic che' bajche' tsi' yALA. Tsansan, mucu. La' i toj i mul, come an i mul tic tojlel yic'ot ti' tojlel c tat cha'an tsi' bec'beyob i ch'ich'el winicob mach ba anic i mul.

³²Lac Yum mi caj i q'uextaben i jontolil cha'an tsi' tsansa cha'tiquil winicob ñumen uts'at ba i pusic'al yic'ot i melbal. Ma'anic tsi' sube c tat David, pero Joab to'ol jach tsi' tsansa Abner (i yalobil Ner), i yum soldadojob ti Israel, yic'ot Amasa (i yalobil Jeter), i yum soldadojob ti Judá. ³³La' caleb ti' wenta Joab i ch'ich'el ili winicob. La' caleb ti' wenta i p'olbal Joab ti pejtelel ora. Pero yom sac mi' q'uelonla lac Yum. La' i q'uel ti toj c tat David, yic'ot i p'olbal, yic'ot i yumantel ti pejtelel ora. Che' tsi' yALA Salomón. ³⁴Ti ora jach tsa' majli Benaía cha'an mi' tsansan Joab. Tsi' mucu ya' ti' t'ejl i yotot

am ba ti tiquiñal pañimil. ³⁵Awilan jini rey Salomón tsi' wa'choco Benaía ti' yum soldadojob ti' q'uexol Joab. Che' ja'el tsi' wa'choco ti motomajil jini Sadoc ti' q'uexol jini motomaj Abiatar.

³⁶⁻³⁷Jini rey tsi' choco ti payol Simeí. Tsi' sube: Yom ma' wa'chocon a wotot wa' ti Jerusalén cha'an wa'ix ma' chumtál. Mach yomic ma' loqu'uel ti tejclum mi junyajlic. Mi tsa' loqu'uiyet cha'an ma' c'axel ti jini ja' i c'aba' Cedrón, mi caj caqu'uet ti chamel. Che' jini mi caj a toj a mul, che'en Salomón. ³⁸Simeí tsi' jac'be jini rey: Uts'at bajche' wola' wal. Che'ach mi caj c mel, che'en. Jini cha'an cabal q'uin tsa' chumle Simeí ti Jerusalén.

³⁹Che' i yuxp'ejlix jab i chumtál ya'i, tsa' puts'iyob majlel cha'tiquil i winicob Simeí ba'an Aquis jini rey ti Gat. Tsa' subenti Simeí: Majlemobix ti Gat a winicob, che'ob. ⁴⁰Ti ora jach tsi' chajpa i burro Simeí. Tsa' majli ba'an Aquis ya' ti Gat cha'an mi' taj i winicob. Ya' tsi' tajayob, tsi' cha' payayob sujtel. ⁴¹Tsa' subenti Salomón cha'an tsajnix ti Gat jini Simeí, pero cha' c'otemix ti Jerusalén. ⁴²Jini rey tsi' choco ti payol Simeí. Tsi' sube: ¿Mach ba anic tsac wan subeyet ti' tojel lac Yum mi caj a tsansantel che' ma' loqu'uel ilayi? che'en. Jatet tsa' wala mi caj a jac', come uts'at bajche' tsac subeyet. ⁴³¿Chucoch mach c'ajalic a cha'an, cha'an tsa' wac'la a t'an ti' tojel lac Yum cha'an mi caj a mel che' bajche' tsac subeyet? ⁴⁴Jini rey tsi' sube ja'el: Wen awujil ti a pusic'al jontol tsa' melbe c tat David. La' i q'uextabeñet a jontolil lac Yum. ⁴⁵Pero la' q'uejlic ti uts'at c yumantel ti' wut lac Yum. La' jal'ac ti pejtelel ora i yumantel c tat David ti' tojlel lac Yum. ⁴⁶Jini cha'an jini rey tsi' sube Benaía cha'an mi' pay loqu'uel Simeí cha'an mi' tsansan. Che'ach tsi' mele. Tsa' wen ch'ejl'a i yumantel Salomón.

Tsa' ñujpuñi Salomón yic'ot i yalobil Faraón

3 Salomón tsi' teme i t'an yic'ot Faraón rey ba ti Egipto. Tsi' paya ti' yijñam i yalobil Faraón. Tsi' paya ti chumtál ti Jerusalén, i tejclum David. Ya' tsa' chumleyob jinto tsa' ujtí i wa'chocon i yotot, yic'ot i Templo lac Yum, yic'ot i ts'ajquil Jerusalén. ²Jini israelob tsi' chan tsansayob majtañal ya' ti bujbujtal, come maxto melbilic i yotot lac Yum.

Tsi' c'ajti i ña'tabal Salomón

(2 Cr. 1.1-13)

³Salomón tsi' c'uxbi lac Yum. Tsi' jac'be i mandar David i tat. Tsi' chΛn tsansa majtañal ya' ti bujtal tac. Tsi' chΛn pulu pom ya'i. ⁴Jini rey tsa' majli ti Gabaón ba' wa'chocobil jini ñuc ba pulantib ti bujtal ba' i tilel mi' yaq'uen tsansabil ba i majtan Dios. Jump'ejl mil tsansabil ba i majtan tsi' pulbe lac Yum ti jini pulantib. ⁵Ti jump'ejl ac'alel che' ya'an Salomón ti Gabaón, tsi' q'uele lac Yum ti' ñajal. Dios tsi' sube: C'ajtibeyon chuqui a wom, che'en. ⁶Salomón tsi' jac'be: Cabal tsa' p'unta jini c tat David. A winicach. Che' wΛ'an ti pañimil tsi' chΛn tsajcayet ti isujm ti pejtelel i pusic'al. Toj i pusic'al yic'ot i melbal ti a tojlel. Jatet tsa' wen pasbe i yutslel a pusic'al che' ba tsa' waq'ue i yalobil cha'an mi' ch'Λmben i ye'tel ti' q'uexol. ⁷Wale c Yum Dios, tsa'ix a wa'chocoyon cha'an mi cochel ti rey ti' q'uexol c tat David, pero ch'itoñon to. Mach cujilic bajche' mi caj c mel mi bajche' mi caj i yujtel. ⁸WΛ' añon ti' tojlel a cha'año' ba yajcabilo' ba a cha'an. Wen cabalob. Mach mejlicob ti tsijquel cha'an cabalob. ⁹Yom ma' waq'ueñon cabal c ña'tabal cha'an mic cha'len yumal ti' tojlelob, cha'an mic wen yajcan chuqui uts'at, come ma'anic majqui mi mejlel i bajnel cha'len yumal ti' tojlel pejtet a cha'año' ba, che'en Salomón.

¹⁰Lac Yum uts'atax tsi' yubi iliyi che' ba tsi' c'ajtibe wen ba i ña'tabal. ¹¹Dios tsi' sube: Ma'anic tsa' c'ajtibeyon cabal a jabilel ti pañimil, mi cabal a chubΛ'an. Ma'anic tsa' c'ajtibeyon cha'an mic jisan a contrajob. Tsa' jach a c'ajtibeyon a ña'tabal cha'an ma' cha'len meloñel ti uts'at. ¹²Jini cha'an mi caj c mel che' bajche' tsa' c'ajtibeyon. Mi caj caq'ueñet i p'ip'lel a pusic'al yic'ot cabal a ña'tabal. Ñumen ti p'is mi caj caq'ueñet che' bajche' yaño' ba. Ma'anic yamba lajal ba i ña'tabal ti oñiyi c'ΛlΛl wale, mi ti talto ba ora. ¹³Mi caj caq'ueñet ja'el jini mach ba anic tsa' c'ajtibeyon, cabal a chubΛ'an yic'ot a ñuclel. Che' jini ma'anic yamba rey ti pañimil lajal ba bajche' jatet. ¹⁴Mi xuc'ul ma' chΛn tsajcañon, mi uts'at ma' jac' pejtet c t'an yic'ot c mandar che' bajche' tsi' mele a tat David, mi caj caq'ueñet cabal a jabilel ti pañimil. Che' tsi' yΛΛ Dios.

¹⁵Che' ba tsa' cajni i wut Salomón, tsi' ña'ta chuqui tsi' ñajle. Tsa' sujti ti Jerusalén. Tsa' c'oti ya' ti tojle jini Arca ba' lotol jini xuc'ul ba t'an i cha'an lac Yum. Tsi' yalq'ue lac Yum pulbil ba i majtan yic'ot jini majtañal cha'an i ñach'talel i pusic'al. Che' ja'el tsi' mele ñuc ba q'uin. Tsi' palya pejtelel año' ba i ye'tel.

I ña'tabal yic'ot i ñuclel Salomón

¹⁶Tsa' c'otiyob cha'tiquil sts'i'lel ba x'ixicob ti' tojlel jini rey Salomón. ¹⁷Juntiquil tsi' yala: C yum rey, chumulon lojon ti jump'ejl jach otot. Tsac meq'ue calobil che' añoñ lojon cha'tiquil ti jump'ejl otot. ¹⁸Che' i yuxp'ejlix q'uin tsac meq'ue calobil, ili c pi'al ja'el tsi' meq'ue i yalobil ya' ba' chumulon lojon. Ma'anic yamba ya' ti otot, c bajñel lojon. ¹⁹Ti jump'ejl ac'alel tsa' chami i yalobil, come tsi' wayta. ²⁰Tsa' ch'ojyi ti' yojlil ac'alel. Tsi' chilbeyon calobil che' wen waylon. Tsi' yotsa jini chamen ba i yalobil tic wayib quic'ot. ²¹Che' ba tsa' cajni c wut che' ic'to cha'an mic tsu'san calobil, tsaj q'uele chamenix. Jinto che' ba tsa' wen sac'a pañimil, tsa' caji j q'uel mach jinic calobil tsa' ba cac'a ti pañimil, che'en. ²²Jini yamba x'ixic tsi' yala: Jiñach calobil ili cuxul ba. Jini chamen ba jiñach a walobil, che'en. Pero jini ñaxan ba x'ixic tsi' yala: Mach isujmic. Jiñach a walobil jini chamen ba. Jini cuxul ba jiñach calobil, che'en. Tsi' yal'eyob i ba jini cha'tiquil x'ixicob ti' tojlel jini rey.

²³Jini rey tsi' yala: Ili x'ixic mi' yal: “Jini calobil jiñach jini cuxul ba. Jini chamen ba jiñach a walobil”, che'en. Yamba x'ixic mi' yal: “Mach isujmic. Jiñach a walobil jini chamen ba. Jiñach calobil ili cuxul ba”, che'en. ²⁴Jini rey tsi' yal' mandar: Ch'ambeñon tilel junts'ijt espada, che'en. Tsi' ch'ambeyob tilel. ²⁵Jini rey tsi' yala: Set' t'ojo ti ojilil ili cuxul ba alal cha'an ma' walq'ueñob ojilil ti jujuntiquil, che'en. ²⁶Jini mero i ña' jini cuxul ba alal tsi' p'unta i yalobil. Tsi' yala: Mach che'ic yom, c yum. La' i ch'am calobil ili x'ixic, pero mach a tsansan, che'en. Pero jini yamba x'ixic tsi' yala: La' i tsep che' bajche' tsi' yala. Che' jini mach c cha'anic, mach a cha'anic ja'el, che'en. ²⁷Jini rey Salomón tsi' yala: Aq'uen ili ñaxan ba x'ixic jini cuxul ba alal. Mach a tsansan, come i cha'añach, che'en. ²⁸Tsa' caji' yubiñob ti pejtelel i lumal bajche' tsi' cha'le meloñel jini rey

Salomón. Jini cha'an tsi' bɔc'ñayob, come tsi' q'ueleyob añlach i ña'tabal tilem bɔ ti Dios, come toj tsi' cha'le meloñel.

Tsa' wa'choconti año' bɔ i ye'tel

4 ¹⁻⁶Jini rey Salomón tsa' caji i cha'len yumɔɔ ti pejtelel i lumal. Jiñlach i c'aba'ob jini año' bɔ i ye'tel ti' tojlel: Azarías (i yalobil Sadoc) jiñlach ñuc bɔ motomaj. Elihoref yic'ot Ahías (i yalobilob Sisa) jiñobach sts'ijbayajob. Josafat (i yalobil Ahilud) jiñlach xɔantaya jun. Benaía (i yalobil Joiada) jiñlach ñuc bɔ i yum soldadojob. Sadoc yic'ot Abiatar, jiñobach motomajob. Azarías (i yalobil Natán) i yaj coltaya Salomón. Zabud (i yalobil Natán) jiñlach i motomaj rey, i yamigo ja'tel. Ahisar, jiñlach xq'uel e'tel ti' yotot jini rey. Adoniram (i yalobil Abda) jiñlach am bɔ ti' wenta cha'an mi' q'uel e'tel ti bij tac yic'ot ti otot tac cha'an gobierno.

⁷An ti' wenta lajchɔntiquil año' bɔ i ye'tel cha'an mi' c'ajtiñob tilel i bɔɔ i ñac' jini rey ti' tojlel jujunmojt israelob. Tsa' t'oxbentiyob i ye'tel jini lajchɔntiquilob. Ti jujunmojt israelob an ti' wenta cha'an mi' we'sañob jini rey jump'ejl uw ti jujump'ejl jab. ⁸⁻¹⁹Jini lajchɔntiquilob jiñobach i c'aba':

I yalobil Hur, an i ye'tel ti' tojlel jini año' bɔ ti wits Efraín. I yalobil Decar, ti' tojlel jini año' bɔ ti Macaz, yic'ot ti Saalbim, yic'ot ti Betsemes, yic'ot ti Elón, yic'ot ti Bethanán. I yalobil Hesed, ti' tojlel jini año' bɔ ti Arubot, yic'ot ti Soco, yic'ot ti' pejtelel i lumal Hefer. I yalobil Abinadab (tsa' bɔ i cha'le ñujpuñel yic'ot Tafat i yalobil Salomón), ti' tojlel jini año' bɔ ti' lumal Dor. Baana (i yalobil Ahilud), ti' tojlel jini año' bɔ ti Taanac, yic'ot Meguido, yic'ot pejtél Betseán lɔc'ɔɔ bɔ ti Saretán, am bɔ ti' yentɔɔɔ Jezreel, yic'ot pejtél i lumal Betseán c'ɔɔɔɔ ti Abelmehola c'ɔɔɔɔ ti Jocmeam. I yalobil Geber, ti' tojlel jini año' bɔ ti Ramot am bɔ ti Galaad, yic'ot i tejclum tac Jair (i yalobil Manasés) ya' ti Galaad, yic'ot i lumal Argob am bɔ ti Basán. An uxc'al tejclum joy ts'ajquibil bɔ, an tac bɔ colem bɔ tranca melbil bɔ ti bronze. Ahinadab (i yalobil Iddo) an i ye'tel ti' tojlel jini año' bɔ ti Mahanaim. Ahimaas, tsa' bɔ i cha'le ñujpuñijel yic'ot Basemat (i yalobil Salomón) an i ye'tel ti' tojlel jini año' bɔ ti Neftalí. Baana (i yalobil Husai), ti' tojlel jini año' bɔ ti Aser yic'ot ti Alot. Josafat (i yalobil Parúa), ti' tojlel jini año' bɔ ti Isacar. Simei

(i yalobil Ela), ti' tojlel jini año' ba ti Benjamín. Geber (i yalobil Uri), ti' tojlel jini año' ba ti' lumal Galaad, yic'ot i lumal Sehón, i rey amorreojob, yic'ot i lumal Og, i rey Basán. Ili lajch'antiquilob año'b ti' wenta yamba yumal.

I ña'tabal yic'ot i chub'an Salomón

²⁰Ti ili ora cabalob jini winicob x'ixicob ti Israel yic'ot ti Judá. Cabal i chub'an ja'el. Wen tijicñayob jax. ²¹Jini rey Salomón tsi' cha'le yumal c'álal ti' colem ja' i c'aba' Eufates, c'álal ba' jaxal i lumal filisteojob, c'álal ba' jaxal i lumal egiptojob. Che' ja'el jini mach ba israelobic tsi' yumayob Salomón ti pejtelel ili lum. Tsi' yac'ayob i tojoñel ti' tojlel Salomón, anquese mach israelobic. Tsi' melbeyob i ye'tel c'álal jinto tsa' chami.

²²Jini i bal ñac'al tsa' ba i c'uxuyob ti' yotot Salomón ti jujump'ejl q'uin jiñach: lujunc'al (200) ti cuych trigo chamen ba juch'bil, jumbajc' ti cuych trigo ques ba juch'bil, ²³lujuncojt jujp'em ba wacax, junc'al anto ba ti potrero, jo'c'al tiñame', yic'ot chijmay, yic'ot me', yic'ot gacela, yic'ot mut tac.

²⁴Salomón tsi' cha'le yumal ti pejtelel i lumal am ba ti' tojlel jini Eufates ja' ba' mi' bajlel q'uin c'álal ti Tifsa, c'álal ti Gaza. Ñach'al i lumal, ma'anic guerra. ²⁵Che' cuxul to Salomón wen xuc'ul tsa' ajniyob jini año' ba ti Israel yic'ot ti Judá c'álal ti Dan, c'álal ti Beerseba. Ti jujump'ejl xchumtal wen an i yotot yic'ot i pac'ab. ²⁶An i cha'an cha'c'al mil caballo mu' ba i tujc'an majlel carreta. An lajch'amp'ejl mil (12,000) xñijca carretajob. ²⁷⁻²⁸Ti jujump'ejl uw jini año' ba i ye'tel ti jujunmojt israelob tsi' yac'ueyob i bal i ñac' Salomón yic'ot i pi'lob. Tsi' yac'ueyob i buc'bal i caballo ja'el.

²⁹Dios tsi' yac'ue i ña'tabal yic'ot i p'ip'lel i pusic'al Salomón. Tsi' wen ña'ta pañimil Salomón. Wen cabal i pusic'al. ³⁰Ñumen an i ña'tabal bajche' pejtel yamba winicob ya' ti' pasibal q'uin yic'ot ti Egipto. ³¹Ñumen an i ña'tabal che' bajche' Etán jini ezra, yic'ot Hemán, yic'ot Calcol, yic'ot Darda (i yalobilob Mahol). Pam cambil i ña'tabal ti pejtelel pañimil. ³²Salomón tsi' ts'ijba uxp'ejl mil ch'o'ch'oc ba t'an ñuc ba i sujmllel, yic'ot jump'ejl mil c'ay yic'ot jo'p'ejl i ñumel. ³³Tsi' wen ña'ta bajche' an ti pañimil pejtel cuxul tac ba, jini bate'el, yic'ot te'lemut, yic'ot lucum, yic'ot chay, yic'ot te', jini colem ch'ujte' am ba

ti Líbano, yic'ot ja'el pejtél ch'o'ch'oc tac ba che' bajche' jini hisopo mu' ba i ñot coel ti pam xajlel. ³⁴Ti pejtelel pañimil jini reyob yic'ot i winicob tsa' c'otiyob cha'an mi' yubibeñob i t'an Salomón cha'an cabal i ña'tabal.

I trato Salomón yic'ot Hiram

(2 Cr. 2.1-18)

5 Jini rey ti Tiro i c'aba' Hiram tsi' choco tilel i winicob ba'an Salomón che' ba tsi' yubi wa'chocobilix ti rey ti' q'uexol i tat, come jini Hiram tsi' wen c'uxbi David che' cuxul to. ²⁻³Salomón tsi' chocbe majlel t'an jini Hiram: Awujil tsi' ña'ta i wa'chocon otot ti' c'aba' lac Yum Dios jini c tat, pero ma'anic tsa' mejli come cabal jax tsa' ujti guerra ti' tojlel. Pero lac Yum tsi' yaq'ue i t'uchtan pejtelel i contrajob. ⁴Wale lac Yum Dios tsi' yac'ayon ti ajñel ti ñach'al ti' tojlel winicob. Ma'anic j contra lojon. Ma'anic baq'uen. ⁵Jini cha'an joñon mi caj c wa'chocoben i yotot lac Yum Dios che' bajche' tsa' subenti c tat David: “Jini a walobil mu' ba caj i cha'len yumantel ti a q'uexol mi caj i wa'chocobeñon cotot”. Che' tsi' yala c Yum. ⁶Jini cha'an awocolic, Hiram, suben a winicob cha'an mi' sec'beñoñob ch'ujte' am ba ti Líbano. C winicob mi caj i comol cha'leñob e'tel yic'ot a winicob. Mi caj c tojbeñob i ye'tel a winicob che' bajche' c'amel a wom, come isujm ma'anic majch yujil i p'elol te' che' bajche' a winicob año' ba ti Sidón, che'en Salomón.

⁷Tijicña i pusic'al Hiram che' ba tsi' yubibe i t'an jini rey Salomón. Tsi' yala: Wen ñuc lac Yum, come tsi' yaq'ue David juntiquil i yalobil am ba cabal i ña'tabal ti' tojlel i pi'lob. Cabalob woli' yumañob, che'en. ⁸Hiram tsi' chocbe majlel t'an jini rey Salomón: Tsa'ix cubi a t'an tsa' ba a chocbeyon tilel. Mi caj caq'ueñet pejtelel jini te' tsa' ba a c'ajtibeyon. ⁹C winicob mi caj i loc'sañob jini te' ila ti Líbano. Mi caj i ch'amob majlel ya' ti colem ja'. Mi caj c bel calch lojon jini te' cha'an mic chocbeñet jubel ya' baqui a wom. Subeñon baqui a wom cha'an ya'i mi' cha' jitob. Ya' mi mejlel i loc'ob a winicob cha'an mi' ch'amob majlel. Yom jach ma' waq'ueñon i bal lojon c ñac' cha'an mij c'ux lojon. Jiñach c tojol. Che' tsi' yala Hiram. ¹⁰Hiram tsi' yaq'ue Salomón jini ch'ujte' yic'ot ciprés che' bajche' c'amel yom. ¹¹Salomón tsi'

yɔq'ue i baɫ ñac'al cha'an i tojol, junc'al mil ti cujch trigo ti jujump'ejl jab, yic'ot junc'al mil tambo olivo aceite. ¹²Lac Yum tsi' wen aq'ue i ña'tɫbal Salomón che' bajche' tsi' sube. Tijicña tsa' ajniyob Salomón yic'ot Hiram, come junlajalob i t'an ti cha'ticlelob.

¹³Jini rey Salomón tsi' wersa xiq'uiyob ti e'tel lujump'ejl i cha'c'al mil (30,000) winicob ti Israel. ¹⁴Lujump'ejl mil tsi' choco majlel ya' ti Líbano ti jujump'ejl uw. Tsi' q'uexeyob i ba jini uxmojt israelob. Jump'ejl uw ya' añob ti Líbano, cha'p'ejl uw tsa' caleyob ti' yotot. Tsa' cale ti' wenta Adoniram cha'an mi' q'uelob. ¹⁵Salomón tsi' wa'choco yambaɫ lujump'ejl i chanc'al mil (70,000) xcuchijelob, yic'ot chanc'al mil albañil, ¹⁶yic'ot yambaɫ uxp'ejl mil yic'ot jo'lujunc'al (3,300) xq'uel e'telob. ¹⁷Tsi' c'oloyob loq'uel jini colem tac ba xajlel letsem tac ba i tojol cha'an i c'ac'lib jini Templo. Tsi' wen toj'esayob jini xajlel. ¹⁸Jini winicob ch'oyolo' ba ti Gebal tsi' coltayob i winicob Salomón yic'ot i winicob Hiram. Tsi' p'eleyob tabla, tsi' toj'esayob tabla, tsi' c'oloyob loq'uel xajlel cha'an i Templo lac Yum.

Salomón tsi' wa'choco jini Templo

(2 Cr. 3.1-14)

6 Anix jumbaje' yic'ot chanc'al jab che' ba loqu'emobix jini israelob ti Egipto. Wolix i majlel ti champ'ejl jab i yumantel jini rey Salomón. Ti jini jach ba jab Salomón tsa' caji i wa'chocon i yotot lac Yum. ²Jini i p'isol Templo jiñach lujump'ejl i cha'c'al (30) metro i tamlel, yic'ot lujump'ejl metro i xujc. Jo'lujump'ejl (15) metro i chanlel. ³An i lejch' otot ya' ti' tojel jini Templo, lujump'ejl metro i tamlel lajal bajche' i xujc otot, yic'ot jo'p'ejl metro i xujc jini coyerol. ⁴Tsi' mele q'ueloñib ti Templo. Tsi' yɔq'ue tac i majc ti jumpat yic'ot yambaɫ ti mal. ⁵Tsi' mele jini tsalal tac ti jujunwejl i tamlel jini Templo, yic'ot ti' joytilel jini ts'ajc ti jumpat. ⁶I xujc jini tsalal tac am ba ti yebal jiñach ojilil i yuxp'ejl metro. I xujc jini tsalal tac am ba ti' cha'lajmlel otot jiñach uxp'ejl metro. I xujc jini tsalal am ba ti' yuxlajmlel otot jiñach ojilil i champ'ejl metro. I cucujlel tac jini otot bichbich ñumen ts'ita' tac, cha'an ya'i mi' yac'ob i cucujlel jini tsalal am ba ti' cha'wejllel jini Templo.

⁷Ya' baqui tsi' c'oloyob loq'uel jini xajlel tsi' toj'esayob. Jini cha'an che' ba tsi' wa'chocoyob, ma'anic tsi' c'añayob martillo mi jacha mi yamba tsucul taq'uin.

⁸Ya' ti' tojel i ñoj jini otot an i ti' jini tsalal tac am ba ti yebal. Quejpactic jini letsibal ti' cha'lajmlel otot yic'ot ti' yuxlajmlel. ⁹Salomón tsa' ujtí i wa'chocon jini otot. Puro ch'ujte' jini cucujl tac yic'ot i yoyel otot yic'ot jini bojte' ti' mal ts'ajc. ¹⁰An ojilil i yuxp'ejl metro i chanlel jini tsalal tac am ba ti' cha'wejllel jini Templo. Lajal i chanlel ti' jujunlajm. Ya' jach ñotol jini ch'ujte' ba i cucujlel yic'ot i ts'ajquil Templo.

¹¹⁻¹²Tsa' tili i t'an lac Yum ba'an Salomón che' woli' wa'chocon jini Templo. Tsi' yalal: Mi xuc'ul ma' chan jac'beñon c t'an yic'ot j cantesa yic'ot pejtél c mandar, mi caj c ts'actesan c t'an ti a tojlel che' bajche' tsac sube David a tat. ¹³Mi caj c chan ajñel ti' tojlel pejtelel israelob. Ma'anic mi caj j c'ayob, che'en.

¹⁴Salomón tsa' ujtí i mel jini otot. ¹⁵Tsi' c'añal ch'ujte' ba tabla tac cha'an mi' ñotben i mal jini otot, c'alal ti' yebal c'alal ti' cucujlel jini otot. Tsi' c'añal ciprés ba tabla tac cha'an i pisojlel. ¹⁶Che' ja'el ti' mal jini otot tsi' mele yamba tsalal lujump'ejl metro i tamlel, lujump'ejl metro i xujc, lujump'ejl metro i chanlel. Tsi' yal'al jini ch'ujte' ba tabla tac ya' ti' yebal i mal c'alal ti' jol tsalal. Jiñach jini C'ax Ch'ujul ba Ajñibal. ¹⁷Jini ñaxan ba i mal jini Templo am ba ti tojel jini C'ax* Ch'ujul ba Ajñibal an junc'al (20) metro i tamlel. ¹⁸Xot macbil ti tabla jini cha'tsajlel i mal. T'obil jini tabla ba' tsi' meleyob i yejtal nich pimel yic'ot nich te'. Ya' ti mal ma'anic tsiquil jini xajlel, come xot macbil ti ch'ujte'. ¹⁹Ya' ti C'ax Ch'ujul ba Ajñibal mi' yajñel jini Arca ba' lotol jini xuc'ul ba i t'an lac Yum. ²⁰Lujump'ejl metro i tamlel jini C'ax Ch'ujul ba Ajñibal, lujump'ejl metro i xujc, lujump'ejl metro i chanlel. Laj tep'bil ti oro, che' ja'el tep'bil ti oro jini pulantib melbil ba ti ch'ujte'. ²¹⁻²²Salomón tsi' tep'e ti oro i mal jini otot yic'ot jini pulantib. Tsi' ñup'u c'aytal i ti' jini C'ax Ch'ujul ba Ajñibal ti cadena melbil ba ti oro.

²³⁻²⁸Tsi' mele cha'tiquil i yejtal ángelob ti olivote'. Jujuntiquil an i chanlel jo'p'ejl metro. Ti jujuntiquil añob i wich' ojilil i yuxp'ejl metro. Jo'p'ejl metro i tamlel che' tich'il i wich'. Junlajalob ti cha'ticlel. Lajal i chanlel, lajal i tamlel i wich'.

Tsi' yotsayob jini melbil ba ángelob ti' mal Templo. Ti junwejl i wich' tsi' tajayob bojte'. Ti ojilil tsi' tajayob i ba i wich'. Laj tep'bil ti oro jini ángelob ja'el.

²⁹T'obil tac i bojte'lel Templo ti cha'tsajlel i mal. Tsi' meleyob i yejtal tac ángelob yic'ot bonxan, yic'ot i nich pimel. ³⁰Tsi' tep'eyob jini piso ti oro ti cha'p'ejl i mal.

³¹⁻³²Tsi' meleyob cha'q'uejl ñujp'il i ti' cha'an i puertajlel jini C'ax Ch'ujul ba Ajñibal. Ya' ti' cha'q'uejl ba i puerta melbil ba ti olivote' tsi' meleyob i yejtal tac ángel yic'ot bonxan yic'ot i nich pimel. Tsi' laj tep'eyob ti oro.

³³Tsi' c'añayob olivote' cha'an i chumte'lel i ti' Templo. ³⁴An cha'q'uejl i puertajlel Templo melbil ti cipreste'. An bisagre ti jujunq'uejl i ti'. ³⁵Ya' ti' puertajlel Templo tsi' meleyob i yejtal tac ángel yic'ot bonxan, yic'ot i nich pimel. Tsi' laj tep'eyob ti oro. ³⁶Uxlajm i pimlel i ts'ajquil jini patio yic'ot junlajm ch'ujte'.

³⁷Tsi' ts'alayob letsel i yebal Templo che' ti mayo che' wolix i majlel ti ch'amp'ejl jab i ye'tel Salomón. ³⁸Tsa' ujti i melob Templo che' ti noviembre che' ti junlujump'ejl jab i ye'tel Salomón. Tsa' ñumi wucp'ejl jab ti melol.

Yan tac ba otot tsa' ba i mele Salomón

7 Salomón tsi' ñusa uxlujump'ejl (13) jab cha'an i melol i yotot. ²Jump'ejl i mal otot i c'aba' Líbano. I tamlel jini tsalal jiñach lujump'ejl i yuxc'al (50) metro. I xujc jiñach jo'p'ejl i cha'c'al (25) metro. Jo'lujump'ejl (15) metro i chanlel. An ch'antsolom i chunte'lel tac ba' tsa' ajni i cucujlel ch'ujte' tac ba. ³⁻⁴An jo'p'ejl i yuxc'al (45) i ventanajlel. An jo'lujump'ejl ventana ti jujump'ejl i xujc ti' yuxp'ejlel i xujc. An jo'lujump'ejl ventana ti yebal. An yamba jo'lujump'ejl ventana ti' cha'p'ejlel piso. An yamba jo'lujump'ejl ventana ti' yuxp'ejlel piso. ⁵An i marcajlel jujump'ejl ventana yic'ot jujump'ejl i puertajlel, joy lajal i ñuclel. Junlajal mi' lajal q'uelob i ba jini ventana tac.

⁶An yamba i mal i c'aba' I Corredor Jini Oy Tac. An jo'p'ejl i cha'c'al metro i tamlel. An jo'lujump'ejl metro i xujc. An i corredor yic'ot i yoyel ba' tsa' ajni i cucujlel cha'an i jol.

⁷An yamba i mal ba' tsi' cha'le meloñel. Ya' tsa' buchle Salomón cha'an mi' cha'len meloñel. Joy ñotbil ti ch'ujte' ba

tabla i pisojlel c'ʌlʌl ti' jol. ⁸Tsa' chumle Salomón ti' pat jini tsalʌl ba' tsi' cha'le meloñel. An i patiojlel joy melbil ba yic'ot tsalʌl tac. Jujump'ejl tsalʌl ñotbil ti tabla tac ba ch'ujte'. Che' ja'el tsi' mele yamba cha'an juntiquil i yijñam, i yalobil ba Faraón.

⁹Tsi' mele jini otot tac ti colem ba xajlel wen letsem tac ba i tojol, wan c'olbil taquix ti p'isol. Tsa' c'ʌjni tac c'ʌlʌl ti' patiojlel otot c'ʌlʌl ti' colem ba i patiojlel. ¹⁰Jini xajlel tac tsa' ba i c'ʌñayob cha'an i buchlib jini otot tac jiñach champ'ejl yic'ot jo'p'ejl metro i ñucel ti' jujunwejl i xujc tac. ¹¹Jini colem tac ba xajlel am ba ti ts'ajc tac ti p'isol jach c'olbil tac. Ñotbebil tabla tac ba ch'ujte' ja'el. ¹²An uxʌjts i ts'ajquil jini colem ba patio. An i cucujlel ja'el puro ch'ujte' tac, che' bajche' melbil i patiojlel Templo yic'ot i corredor i yotot Salomón.

Tsa' caji ti e'tel Hiram

(2 Cr. 2.13-14; 3.15-17)

¹³Salomón tsi' pʌyʌ tilel winic chumul ba ti Tiro, i c'aba' Hiram, wen yujil ba e'tel ti bronce. ¹⁴I yalobilach meba' x'ixic ch'oyol ba ti Neftalí. Ch'oyol ti Tiro i tat. Yujil e'tel i tat ti bronce. Jini cha'an tsa' majli jini winic i melben i ye'tel Salomón.

¹⁵Tsi' mele cha'tejc i yoyel jini otot ti bronce. Bolomp'ejl metro i chanel. Wacp'ejl metro i bonticel jini oy. Tocol i mal oy, an i pimlel che' bajche' chʌnts'ijc i yal c'ʌbaʌl. ¹⁶⁻²²Wox melbil i ñi' jini cha'p'ejl oy melbil ba ti bronce. Wen uts'at melbil che' bajche' i nich pimel. Melbil ti bronce ja'el. I chanel i ch'ʌjlil i ñi' jiñach ojilil i yuxp'ejl metro. I colemlel jiñach cha'p'ejl metro. Ti jujump'ejl i ch'ʌjlil i ñi' oy an wucp'ejl wen uts'at ba cadena melbil ti bronce, yic'ot jumbajc' ch'umac' melbil ba ti bronce, cha' tsolom melbil che' ti' joytilel tac. Hiram tsi' wa'choco jini cha'tejc i yoyel ya' ti' tojel i ti' Templo. An i c'aba' jini am ba ti sur jiñach Jaquín. I c'aba' jini am ba ti norte jiñach Boaz.

Jini e'tijibal tac ti Templo

(2 Cr. 4.1—5.1)

²³Hiram tsi' xot mele i yajñib ja' ti bronce, ojilil i yuxp'ejl metro i tamlel, jo'p'ejl metro i p'isol i pam, che' joy p'isbil

i ti' jiñach jo'lujump'ejl metro. ²⁴Joy ch'Albil tac i ti' ti'il, ti cha'tsolom, melbil ti bronce. ²⁵Buchul jini i yajñib ja' ti lajchancojt melbil tac ba tat wacax, joy coto lob jini wacax tac. I ñej an ti mal. Uxcojt sujtem majlel ti norte, uxcojt sujtem majlel ba' mi' ba'jlel q'uin, uxcojt sujtem majlel ti sur, uxcojt sujtem majlel ba' mi' pasel q'uin. ²⁶I pimlel i yajñib ja' jiñach che' bajche' diez centímetros. Xetel i ti'. Mi' yochel ja' ya' cha'c'al mil litro.

²⁷⁻³⁰Tsi' mele yamba i yajñib ja' yic'ot lujump'ejl i buchlib. Cha'p'ejl metro ti jujunwejl i xujc tac. Ojlil i cha'p'ejl metro i chanlel. An i xijc'unte'el tac cha'an i tsatsijib. Ch'Albil jini i xijc'unte'el tac ti' yejtal tac bajlum yic'ot ti wacax yic'ot ti ángelob. Ti' chañelal yic'ot ti' yebal jini i ch'Aljil tac an xotol tac ba i ch'Aljil. Ti jujump'ejl i buchlib an ch'amp'ejl xotol tac ba i yoc melbil ba ti bronce. Ti jujump'ejl i xujc an jujunts'ijt i yoyel tac melbil ba ti bronce. Xot ch'Albil tac ti jujunts'ijt. ³¹Ti' pam jini i buchlib ja' an xotol ba ba' mi' buchtal i yajñib ja'. Loq'uem tac ojilil metro ti jujunwejl i xujc. An xotol tac ba i ch'Aljil ti' pat ba' mi' buchtal i yajñib ja'. I buchlib i yajñib ja' mach xotolic, an tac i xujc junlajal i p'isol. ³²Ti jujump'ejl i yajñib ja' an ch'amp'ejl xotol tac ba i yoc. Che' ti cha'cha'p'ejl i yoc an junts'ijt i te'el mu' ba i laj tajben i yojlil, melbil ti bronce. Ti jujump'ejl xotol tac ba i yoc an i chanlel che' bajche' jo'lujump'ejl i ch'anc'al (75) centímetro. ³³Che' yilal bajche' i yoc carreta mu' ba i c'añob ti guerra. Pejtelel tsa' ba c'ajni tac ti melol jini i yajñib ja' puro bronce. ³⁴An xijc'unte'el ti jujump'ejl i xujc melbil ti bronce. ³⁵An jump'ejl xit melbil ba ti' chanelal i buchlib ja' melbil ba ti bronce. An i welticel che' bajche' jo'p'ejl i yuxc'al centímetro. ³⁶Ya' tsuyul yic'ot jini i buchlib ja' melbil tac ti bronce ja'el i yejtal tac ángelob, yic'ot bajlum, yic'ot bonxan. ³⁷Jini lujump'ejl i buchlib ja' junlajal melbil ti bronce, junlajal i p'isol ja'el.

³⁸Che' ba tsa' ujt i mel pejtél iliyi, tsa'ix caji i mel ti bronce lujump'ejl ba' mi' lamtal tac ja'. Tsi' buchchoco ya' ba' tsi' melbe tac i buchlib. Jini jujump'ejl i yajñib ja' an ch'amp'ejl i xujc. Jujump'ejl i xujc an che' bajche' cha'p'ejl metro. Ya' ti jujump'ejl i yajñib ja' tsa' ochi che' bajche' cha'bajc' litro ja'. ³⁹Ya' ti' ts'ejtalel jini otot tsi' yac'la jini jo'p'ejl i yajñib ja' tsa' ba i mele. Ya' ti' yamba junwejlel jini otot tsi' yac'la yamba

jo'p'ejl i yajñib ja'. Ya' ti xo'tal ti' tojel sureste tsi' yac'la jini colem ba i yajñib ja' jini bon melbil ba. ⁴⁰Hiram tsi' mele ja'el jini p'ejt tac, yic'ot pala tac, yic'ot poquic'abla. Che' jini tsa' ujti i c'un mel pejtél jini e'tel ti' Templo lac Yum tsa' ba i yac'ue Salomón ti' wenta Hiram. ⁴¹⁻⁴⁶Iliyi jiñach tsa' ba i mele Hiram:

Cha'tejc i yoyel, cha'p'ejl i jol i yoyel, i ch'ajlil tac i jol, jumbajc' ch'umac' cha'tsolom ac'bil ti jol jujuntejc i yoyel, lujump'ejl i buchlib i yajñib ja' mu' ba mejlel lac ñijcan majlel, yic'ot lujump'ejl i yajñib ja', jump'ejl colem ba i yajñib ja', yic'ot lajchancojt melbil ba tat wacax ba' mi' buchtal i yajñib ja', p'ejt tac, yic'ot pala tac, yic'ot poc' tac. Pejtelel iliyi melbil tac ti bronce. Ya' tsa' mejli ti' joctalel Jordán ja', xinlapal ti Sucot yic'ot Saretán. ⁴⁷I p'isol i yalel che' ti pejtelel ñumen che' bajche' tsa' mejli i p'isob.

⁴⁸Pejtél jini e'tijibal tsa' ba i c'añayob ti Templo melbil tac ti puro oro. Tep'bil ti puro oro i pulantib pom yic'ot jini mesa ba' mi' pasbentel waj lac Yum. ⁴⁹⁻⁵⁰Melbil ti puro oro ja'el pejtelel iliyi:

Jini jo'p'ejl i buchlib jini lámpara* tac am ba ti ñoj yic'ot jo'p'ejl am ba ti ts'ej am ba ya' ti' tojel jini C'ax Ch'ujul ba Ajñibal, yic'ot i yejtal i nich pimel, yic'ot lecho' c'ajc, yic'ot taza tac, yic'ot mu' ba i c'añob i yap c'ajc, yic'ot poc' tac, yic'ot cuchara tac, yic'ot semet tac ba' mi' yajlel i nich c'ajc, yic'ot i bisagrajlel i puertajlel jini C'ax Ch'ujul ba Ajñibal, yic'ot i bisagrajlel i puertajlel jini Templo.

⁵¹Che' ba tsa' ujti i mel pejtelel jini e'tel ti Templo, Salomón tsi' yac'la ti cantantel ti Templo pejtél jini letsem tac ba i tojol i cha'an ba i tat tsa' ba i yac'ue Dios: plata, yic'ot oro, yic'ot e'tijibal.

Salomón tsi' c'axtesa majlel Arca ya' ti Templo

(2 Cr. 5.2-14)

8 Salomón tsi' tempa tilel ti Jerusalén pejtelel jini xñoxob yic'ot ñuco' ba i ye'tel ti' tojlel israelob cha'an mi' loc'sañob jini Arca ba' lotol jini Xuc'ul ba i T'an lac Yum ya' ti Tabernáculo am ba ti Sion, i tejclum David, cha'an mi' c'axtesañob ti Templo. ²Pejtelel jini israelob temel tsa' c'otiyob ba'an Salomón che' i yorajlel mi' melob jini q'uin cha'an

Tabernáculo che' ti octubre. ³⁻⁴Che' jini tsi' cha'leyob q'uiñijel. Jini motomajob tsi' ch'ΛmΛyob tilel jini Arca yic'ot pejtél jini ch'ujul bΛ e'tijibal tac am bΛ ti' mal jini Tabernáculo. ⁵Jini rey Salomón yic'ot pejtelel israelob tsi' tempayob i bΛ ya' ti' tojel jini Arca. Tsi' tsΛnsayob cabal tiñame' yic'ot wacax cha'an i majtan Dios. Ma'anic tsa' mejli ti tsicol jini alac'Λl, come c'ax cabal.

⁶Jini motomajob tsa' c'oti i yotsañob jini Arca ya' ti' mal jini Ch'ujul bΛ Templo ya' ti C'ax Ch'ujul bΛ Ajñibal. Tsi' yac'Λyob jini Arca ti ojil i mal, ti' yebal i wich' jini ángelob. ⁷Come laj bΛ lich'il i wich'ob ya' ti pam jini Arca. Ya' tsa' ajni jini Arca yic'ot jini cha'ts'ijt q'uechlintib ti' yebal i wich' ángelob. ⁸Wen tam jini cha'ts'ijt te'. Tsa' ts'ita' tsictiyi i ñi' i te'el Arca ya' ti Ch'ujul bΛ Ajñibal, pero mach tsiquilic ti jumpat. Ya'to an wale che' woli' ts'ijbuntel ili jun. ⁹Ma'anic yambΛ i bΛ jini Arca. Cojach an jini cha'q'uel xajlel tsa' bΛ i yotsa Moisés che' bΛ tsi' yac'Λ xuc'ul bΛ i t'an lac Yum ti Horeb ti' tojlel jini israelob che' loq'uemobix ti' lumal Egipto. ¹⁰Che' bΛ tsa' loq'uiyob jini motomajob ya' ti Ch'ujul* bΛ Ajñibal, tsa' bujt'i ti total i yotot lac Yum. ¹¹Jini cha'an jini motomajob ma'anic tsa' mejli i chΛn cha'leñob i ye'tel ti mal cha'an jini total. Tsa' loq'uiyob ti jumpat, come tsa' wen bujt'i otot ti' ñuclel lac Yum.

Tsa' aq'uenti ti wenta Dios jini Templo

(2 Cr. 6.1—7.10)

¹²⁻¹³Salomón tsi' cha'le oración: C Yum, a melbalach jini q'uin ti panchan, pero tsa' wala jñach a wajñib jini pim bΛ total. C Yum, tsa'ix c wa'chocobeyet wen uts'atax bΛ a wotot, a wajñib ba' mi mejlel a chumtΛl ti pejtelel ora. Che' tsi' cha'le oración Salomón.

¹⁴Tsi' sutq'ui i bΛ jini rey ba' wa'alob winicob x'ixicob. Tsi' yac'ueyob i yutslel i t'an pejtelel israelob. ¹⁵Tsi' yala: La' subjic i ñuclel lac Yum i Dios israelob tsa' bΛ i pejca c tat David. Cha'an ti' p'Λtalel tsa'ix ts'actiyi pejtél iliyi. Dios tsi' sube c tat David: ¹⁶“C cha'añob jini israelob. Che' bΛ tsac loc'sayob ya' ti Egipto, ma'anic tsac yajca i yajñib c Templo, pero tsac yajca winic cha'an mi' yochel ti' yum israelob”, che'en lac Yum. ¹⁷Jini c tat David tsi' wan ña'ta ti' pusic'al i wa'chocoben

i yotot lac Yum i Dios Israel. ¹⁸Pero lac Yum tsi' sube c tat David: “Uts'at a pusic'al cha'an tsa' ña'ta a wa'chocobeñon cotot. ¹⁹Pero yamba mi caj i wa'chocobeñon cotot, mach jatetic. Jini a walobil mi caj i wa'chocobeñon cotot”, che'en lac Yum. ²⁰Lac Yum tsa'ix i mele che' bajche' tsi' yΛΛ, come tsac taja que'tel ti' q'uexol c tat David cha'an mic cha'len yumΛ ti' tojlel israelob. Tsa'ix ujti c melben i yotot lac Yum i Dios israelob. ²¹Tsa'ix c mele ja'el i yajñib Arca ba' lotol jini xuc'ul bΛ i t'an lac Yum tsa' bΛ i yΛq'ue lac ñojte'elob che' bΛ tsi' loc'sayob ya' ti Egipto. Che' tsi' yΛΛ Salomón.

²²⁻²³Tsa' wa'le Salomón ti' tojlel jini pulantib i cha'an lac Yum. Ti' wutob pejtelel israelob tsi' letsa i c'Ab ti panchan. Tsi' yΛΛ: C Yum i Dioset israelob, ma'anic yamba Dios che' bajche' jatet, mi ti panchan mi ti' yebal panchan. Come xuc'ulet yic'ot a t'an. Ma' chΛn c'uxbin a cha'año' bΛ mu' bΛ i chΛn tsajcañetob ti pejtelel i pusic'al. ²⁴Tsa'ix a ts'actesa a t'an ti cabΛ a p'ΛtΛlel che' bajche' tsa' sube c tat David. Wolij q'uel lojon ti ili ora. ²⁵WΛle, c Yum i Dioset bΛ israelob, ts'actesan ja'el yamba a t'an tsa' bΛ a sube c tat David, come tsa' sube: “Mi xuc'ul mi' chΛn jac'ob c mandar a walobilob mi caj cΛq'ueñet a q'uexol mu' bΛ caj i cha'len yumΛ ti pejtelel ora ti' tojlel israelob. Yom xuc'ul mi' ñopoñoob che' bajche' tsa' ñopoyon”, che'et. ²⁶Jini cha'an wale, c Yum, i Dioset bΛ israelob, ts'actesan a t'an tsa' bΛ a sube a winic David.

²⁷¿Isujm ba mi' caj ti ajñel Dios ti pañimil? Awilan mach ñuquic ma' q'uel panchan cha'an ya' ma' chumtΛl. Ch'o'ch'oc jax jini otot tsa' bΛ c wa'chocobeyet. ²⁸Ubibeñon coración ti' yutsllel a pusic'al, c Yum Dios, come a winicon. Ti wocol t'an mic pejcañet. ²⁹Q'uele ili Templo ti q'uiñil ti ac'Λlel, come tsa' wΛΛ mi caj a wajñel ilayi. Jini cha'an yom ma' wubibeñon coración wΛ' ti' tojlel a wotot. ³⁰A cha'año. A cha'añoob ja'el pejtelel israelob. Jini cha'an yom ma' wubibeñon lojon coración che' an chuqui mij c'ajtibeñet lojon ti' tojlel a wotot. Ya' ba' chumulet ti panchan yom ma' ñich'taño lojon. Che' ma' wubiño lojon yom ma' ñusabeño lojon c mul.

³¹Che' an juntiquil mu' bΛ i taj i mul ti' tojlel i pi'Λlob, mi tsa' tili i tsictesan i bΛ ti' tojlel a pulantib, mi tsi' yΛc'Λ i t'an ti a tojlel cha'an ma'anic i mul, ³²che' jini yom ma' ñich'tΛben i t'an ti panchan. Yom ma' mel che' bajche' an i melbal. Mi

an i mul jini winic, la' ajnic ti' wenta cha'an mi' toj. Mi isujm ma'anic i mul, la' ajnic ti' uts'at.

³³⁻³⁴Che' mi' yubiñob wocol a cha'año' ba ti' tojlel i contrajob cha'an tsi' ñusayob a t'an, mi tsi' cha' sutq'uiyob i ba ti a tojlel cha'an mi' c'ajtiñob i ñusantel i mul wa' ti' tojel a wotot, yom ma' ñich'tabeñob i t'an ya' ti panchan. Yom ma' ñusabeñob i mul. Cha' palyayob tilel ti jini lum tsa' ba a waq'ueyob i ñojte'elob.

³⁵Mi tsa' majqui jini panchan cha'an ma'anic mi' chan tilel ja'al ti' caj i mul, p'untañob che' mi' cha' sutq'uiñob i ba ti' tojel ili Templo cha'an mi' pejcañetob ti wocol t'an. Mi tsi' cadyayob i mul che' ba tsa' ju'sabeyob i pusic'al, ³⁶ñich'tabeñob i t'an ya' ti panchan. Ñusabeñob i mul a winicob israelob. Cantesañob ti jini wen ba bij. Cha' choco tilel ja'al ti ili lum tsa' ba a waq'ueyob.

³⁷Che' an wi'ñal ila ti pañimil, o mi jontol tac ba c'amajel, o mi i chanil pac'abal che' bajche' jini sajc' mu' ba i mactan pañimil, o mi an i tic'lantel a cha'año' ba ti jump'ejl tejclum cha'an i contrajob, o mi tal babaq'uen ba c'amajel, ³⁸che' jini yom ma' ñich'tabeñob i yoración majqui jach mi' pejcañet che' mi' yubin i ñijcantel i pusic'al. Mi tsi' sats'beyet i c'ab ti tojel ili Templo, ³⁹yom ma' ñich'taben i t'an ya' ti panchan. Yom ma' ñusaben i mul. Aq'uen che' bajche' yom i melbal, come jatet ma' cambeñob i pusic'al pejtelel winicob x'ixicob ti pañimil. ⁴⁰Che' jini mi caj i bac'ñañetob ti pejtelel ora ti jini lum tsa' ba a waq'ue c ñojte'el lojon.

⁴¹⁻⁴²Jini ñajt ba chumulob mach ba israelobic mi caj i yubiñob wen ñucach a c'aba', ñuc a melbal. Che' mi' tilelob i pejcañetob ti' tojel ili Templo, ⁴³yom ma' q'uelob ya' ba' chumulet ti panchan. Ubibeñob i t'an jini ñajt ba chumulob. Mele che' bajche' mi' c'ajtibeñet cha'an mi' laj cañob a c'aba' ti pejtelel pañimil cha'an mi' bac'ñañetob che' bajche' mic bac'ñañet lojon. La' i ña'tañob ma' wac' a ba ti cajiñel wa' ti Templo tsa' ba c wa'choco.

⁴⁴Che' ma' subeñob majlel ti guerra jini israelob ti' tojlel i contrajob, mi tsi' sutq'uiyob i wut ti' tojel a tejclum Jerusalén, ti' tojel ili Templo tsa' ba c wa'choco cha'an i c'uxbintel a c'aba', mi tsi' pejcayetob ti oración, ⁴⁵yom ma' wubibeñob i yoración ya' ti panchan. Coltañob ti jini wocol.

⁴⁶Mi tsi' cha'leyob mulil ti a tojlel, come an lojon c mul tic pejtelel lojon, mach ma' c'ayob che' mich'et che' ma' wac'ob ti' c'Ab i contrajob cha'an mi' c'ajchelob majlel ti yamba lum, mi ti ñajt mi ti lac'Al. ⁴⁷Mi tsa' caji i cha' ña'tañetob ya' ti yamba lum baqui mi' majlelob, mi tsi' cha' sutq'uiyob i ba cha'an mi' pejcañetob ti oración, mi tsi' yal'ayob: "Tsac cha'le lojon mulil ti a contra. Tsac mele lojon chuqui jontol", mi che'ob, ⁴⁸ubibeñob i t'an che' mi' cha' sutq'uiñob i ba ti a tojlel ti pejtelel i pusic'al. Mi tsi' pejayetob ti oración che' woli' ñajti q'uelob jini lum tsa' ba a wac'ue i ñojte'elob, yic'ot jini tejclum tsa' ba a yajca, yic'ot a wotot tsa' ba c wa'choco, ⁴⁹yom ma' ñich'tabeñob i t'an ya' ba' chumulet ti panchan. Yom ma' wac'ueñob chuqui woli' c'ajtiñob. ⁵⁰Ñusabeñob i mul jini winicob tsa' ba i cha'leyob mulil ti a tojlel yic'ot jini tsa' ba i ñusabeñob a t'an. Cha' utsesabeñob i pusic'al i yumob tsa' ba i c'achayob majlel, cha'an mi' p'untañob. ⁵¹Come i p'olbalobach jini tsa' ba a loc'sayob ti Egipto ba' tsi' yubiyob cabal wocol. ⁵²Ubin coración yic'ot i yoración a tejclum Israel. Ubibeñob i t'an che' mi' pejcañetob ti wocol t'an. ⁵³Come tsa' yajcayob ti' tojlel pejtel winicob, c Yum Dios, cha'an a cha'añach mi' yajñelob che' bajche' tsa' sube Moisés che' ba tsa' loc'sa c ñojte'el lojon ti Egipto.

⁵⁴Tsa' ujti ti oración Salomón. Tsa' ch'ojyi ya' ba' ñocol ti' t'ejl jini pulantib i cha'an lac Yum, sats'al i c'Ab ti' tojel panchan. ⁵⁵Ti c'am ba t'an tsi' yac'ue i yutlel i t'an pejtelel israelob: ⁵⁶La' subjic i ñucllel lac Yum, come tsi' yac'ueyob i ñach'talel i pusic'al israelob che' bajche' tsi' subeyob. Ma'anic mi jump'ejl i t'an mach ba ts'actayemic ti pejtelel i t'an tsa' ba i sube Moisés i yaj e'tel. ⁵⁷La' ajnic lac Yum Dios la quic'ot che' bajche' tsa' ajni yic'ot lac ñojte'elob. Mach yomic mi' c'ayonla ti pejtelel ora. ⁵⁸La' i ñijcabeñonla lac pusic'al che' bajche' tsi' melbeyob lac ñojte'elob cha'an mi lac chan cha'len xambal ti' tojlel, cha'an mi lac jac'ben i mandar yic'ot i t'an yic'ot i cantesa. ⁵⁹Jini cha'an la' i ch'am ti' wenta lac Yum ti q'uiñil ti ac'alel pejtel chuqui tsaj c'ajtibe cha'an mi' chan coltañon yic'ot pejtelel israelob. ⁶⁰Che' jini pejtel winicob ti pañimil mi caj i ña'tañob Yumalach Dios. Ma'anic yamba Dios. ⁶¹Jini cha'an yom jump'ejl jach lac pusic'al ti' tojlel lac Yum Dios cha'an mi lac

chan jac'ben pejtél i t'an yic'ot i mandar che' bajche' woli lac mel wale. Che' tsi' yala Salomón.

⁶²⁻⁶³Jini cha'an jini rey yic'ot pejtelel israelob tsa' caji i tsansabeñob i majtan lac Yum cha'an mi' ch'am ti wenta jini Templo. Jiñach majtañal tac mu' ba i yac' i ñach'tilel lac pusic'al. Tsi' tsansayob cha'pejl i cha'c'al mil tat wacax (22,000) yic'ot wacc'al mil (120,000) tiñame'. Che'ach tsi' meleyob i q'uiñilel i yotot lac Yum jini rey yic'ot pejtelel israelob. ⁶⁴Ti jini jach ba q'uin jini rey tsi' yalq'ue lac Yum jini patio am ba ti' tojel i yotot lac Yum cha'an ya' mi' pulbentel i majtan, come ch'o'ch'oc jax jini pulantib melbil ba ti bronce am ba ti' tojel lac Yum. Mach ochic ti pejtelel. Tsi' yalq'ue lac Yum ja'el jini majtañal melbil ba ti trigo, yic'ot cha'an i ñach'tilel i pusic'al. Wen on jini majtañal.

⁶⁵Ti jim ba ora Salomón tsi' mele ñuc ba q'uiñijel temel yic'ot pejtelel israelob. Cabal winicob tsi' tempayob i ba tilemo' ba ti' joytilel Israel. Cha'pejl semana tsi' cha'leyob q'uiñijel ti' tojlel lac Yum Dios cha'an jini Templo. ⁶⁶Che' ti' waxacp'ejlel q'uin Salomón tsi' subeyob sujtel jini israelob ti' yotot. Pejtelel jini israelob tsi' yalq'ueyob i yutslel i t'an jini rey. Wen tijicñayob i pusic'al tsa' sujtiyob majlel ti' yotot, come tsi' q'ueleyob i yutslel i pusic'al lac Yum ti' tojlel David yic'ot pejtelel israelob.

I trato lac Yum ti' tojlel Salomón

(2 Cr. 7.11-22)

9 Che' jini Salomón tsa' ujti i mel jini Templo yic'ot uts'atax ba i yotot, yic'ot pejtél yan tac ba tsa' ba i ña'ta i mel. ²⁻³Lac Yum tsi' cha' pasa i ba ti' tojlel che' bajche' tsi' pasa i ba ya' ti Gabaón. Lac Yum tsi' sube: Tsa'ix cubibeyet a woración. Ch'ujul jini Templo tsa' ba a mele, come tsac ch'ama tic wenta. Wa' mi caj cajñel ti pejtelel ora. Mi caj c chan cantan. Tijicña mij q'uel. ⁴Mi xuc'ul ma' chan tsajcañon che' bajche' tsi' tsajcayon a tat David, mi ti jump'ejl jach a pusic'al ma' jac' pejtél jini c t'an yic'ot j cantesa, ⁵mi caj c xuc'chocobeñet a yumantel ti' tojlel israelob ti pejtelel ora che' bajche' tsac sube a tat David: “Mi caj calq'ueñet a q'uexol tilem ba ti a p'olbal cha'an mi' cha'len yumal ti pejtelel ora ti' tojlel israelob”, cho'on tsac sube.

⁶Pero mi tsa' cɿɿɿɿɿɿ, jatet yic'ot a walobilob, mi ma'anic mi la' jac'beñon c mandar yic'ot c t'an tsa' bɿ c subeyetla, mi che'ɿch mi la' mel cha'an la' wom la' ch'ujutesan yan tac bɿ dios, ⁷che' jini mi caj c loc'san israelob wɿ ti' lumal tsa' bɿ cɿɿɿɿɿɿ. Mi caj c sɿc jisan ili ch'ujul bɿ Templo ba' tsa cɿc'ɿ c bɿ ti cɿɿñel. Che' jini mi caj i wajlentelob israelob. ⁸Ili Templo mi caj i jejmel. Majqui jach mi' ñumel ilayi ba' p'ul jembil ili xajlel mi caj i yɿɿ: “¿Chucoch tsa' jejmi? Jini lac Yum ¿mach ba anic tsi' c'uxbi i lum yic'ot i Templo?” che'ob. ⁹Mi caj i yɿlob: “I mulɿch i winicob cha'an tsi' cɿɿɿɿɿɿ i Yum Dios tsa' bɿ i loc'sa i ñojte'elob ya' ti' lumal Egipto. Tsi' ch'ujutesayob dioste' tac, tsi' yumayob. Jini cha'an lac Yum tsi' yɿɿɿɿɿɿ pejtél ili wocol”. Che' mi caj i yɿlob. Che' tsi' yɿɿɿ lac Yum.

Yamba i melbal Salomón

(2 Cr. 8.1-18)

¹⁰Junc'al jab tsa' jal'a ti melol jini Templo yic'ot i yotot Salomón. Che' ujtemix i mel, ¹¹⁻¹²Salomón tsi' yɿɿɿɿɿ jini rey Hiram am bɿ ti Tiro junc'al tejclum an tac bɿ ti Galilea. Jiñɿch i tojol jini ch'ujte' yic'ot ciprés yic'ot oro tsa' bɿ i yɿc'ɿ Hiram. Tsa' c'ɿjini pejtél iliyi cha'an i melol jini Templo yic'ot i yotot Salomón. Hiram tsa' tili i q'uel jini tejclum tac, pero ma'anic tsi' mula. ¹³Tsi' yɿɿɿ: Mach uts'atic mij q'uel iliyi, queran. Ma'anix i c'ɿjñibal ili tejclum tac, che'en. Jini cha'an tsa' pejcanti jini lum ti jumpejt lum mach bɿ anic i c'ɿjñibal. ¹⁴Pejtél jini oro tsa' bɿ i yɿɿɿɿɿ Salomón an i tojol che' bajche' cha'c'al millón ti peso.

¹⁵Salomón tsi' wersa wets'e tilel winicob cha'an mi' melob Templo, yic'ot i yotot, yic'ot Milo, yic'ot i ts'ajquilel Jerusalén, yic'ot uxp'ejl tejclum i c'aba' Hazor, yic'ot Meguido, yic'ot Gezer. ¹⁶Gezer jiñɿch tejclum tsa' bɿ puli ti c'ajc ti guerra ti oñiyi. Tsa' mɿjli i cha'an jini rey am bɿ ti Egipto. Tsi' tsansa jini israelob. Ti wi'il tsi' yɿc'ɿ jini tejclum ti' wenta xch'oc bɿ i yalobil. Jiñɿch i majtan che' bɿ tsa' ñujpuñi yic'ot Salomón. ¹⁷⁻¹⁸Salomón tsi' cha' mele jini Gezer, yic'ot Bethorón am bɿ ti entɿɿ, yic'ot Baalat, yic'ot Tadmor am bɿ ti colem bɿ i tiquiñal pañimil ti' lumal Judá. ¹⁹Tsi' mele ja'el cabɿɿ tejclum ba' mi' lojtél trigo yic'ot carreta tac cha'an guerra. Tsi' mele

teyclum tac ba' mi' yajñelob soldadojob mu' ba i c'achtañob caballo, yic'ot xñijca carretajob. Tsi' mele cabal otot ja'el ya' ti Jerusalén yic'ot ti Líbano yic'ot ti pejtelel i lumal. ²⁰⁻²¹ Ti jujump'ejl lum ba' tsa' mɔjli i cha'an, Salomón tsi' wets'e tilel winicob ti e'tel. Jiñobach tsa' ba colobajiyob ti' tojlel i pi'lob, amorreojob, yic'ot heteojob, yic'ot ferezeojob, yic'ot heveojob, yic'ot jebuseojob. Come jini israelob ma'anic tsi' lu' jisayob che' ba tsi' cha'leyob guerra ti Canaán. C'ɔlɔl wale che'ach mi' melob israelob. ²² Salomón ma'anic tsi' yotsayob ti mozo jini israelob. Tsa' ochiyob ti soldadojob, ti' yumob soldadojob, ti xc'achta caballojob, yic'ot ti xñijca carretajob. Laj añob i ye'tel.

²³ An lujump'ejl i waxacc'al i cha'bajc' (550) winicob ti Israel tsa' ba ochiyob ti' yumob x'e'telob. ²⁴ Tsa' chumle i yixic'al Faraón ya' ti' teyclum David. Che' melbilix i yotot Salomón tsi' c'axtesa tilel i yijñam ti tsijib ba i yotot tsa' ba i melbe ya' ti Jerusalén. Ti wi'il tsi' mele ts'ajquibil ba i yotot tac soldadojob i c'aba' Milo.

²⁵ Che' ujtemix ti mejlel jini Templo, Salomón tsa' caji i yɔq'uen i majtan tac lac Yum uxyajl ti jujump'ejl jab ya' ba' tsi' mele pulantib. Tsi' yɔq'ue lac Yum pulbil tac ba i majtan, yic'ot majtañal cha'an i tijicñayel i pusic'al, yic'ot pom.

²⁶ Salomón tsi' mele cabal colem barco ya' ti Ezió Geber lac'al ti Elot am ba ti' ti' Chachac ba Colem Ñajb ya' ti' lumal Edom. ²⁷⁻²⁸ Hiram tsi' choco tilel x'e'telob yujilo' ba i ñijcanel barco cha'an mi' coltañob i winicob Salomón. Tsajniyob ti Ofir cha'an mi' ch'ambeñob tilel oro jini Salomón. I tojlo ti pejtelel jiñach che' bajche' lujump'ejl i waxacc'al (150) millón ti peso.

X'ixic ba yumal ti Sabá tsi' jula'ta Salomón

(2 Cr. 9.1-12)

10 Jini x'ixic ba yumal chumul ba ti Sabá tsi' yubi an cabal i ñuclel Salomón cha'an ñuc ba i ye'tel ti' tojlel lac Yum. Jini cha'an tsa' tili i camben i ña'tabal cha'an yom i ch'amben isujm jini wocol tac ba ti ña'tanel. ² Tsa' c'oti ti Jerusalén jini x'ixic ba yumal yic'ot cabal camello tac. Tsi' p'atbeyob i cuch camello cha'an mi' ch'am tilel xojocña ba perfume, yic'ot cabal oro, yic'ot wen uts'at tac ba xajlel. Che' ba tsa' c'oti ba'an Salomón jini x'ixic, tsi' sube pejtelel chuqui tsi' ña'ta ti' pusic'al. ³ Salomón tsi' jac'be pejtelel chuqui tsi'

c'ajtibe. Ma'anic mi junchajpic mach ba anic tsa' mejli i jac' jini rey Salomón. ⁴Che' jini tsi' ña'ta jini x'ixic wen cabal i ña'tabal Salomón. Tsi' q'uele ja'el wen i t'ojol jax jini otot tsa' ba i mele. ⁵Tsi' q'uele ja'el pejtelel chuqui tac mi' c'uxob yic'ot bajche' tsi' cha'leyob e'tel i yaj e'telob, yic'ot i pislel mu' ba i lapob, yic'ot bajche' tsi' ñusabeyob i bal i ñac' jini rey. Tsi' q'uele bajche' tsi' yalq'ueyob cabal i majtan tac Dios ya' ti' yotot. Tsa' toj sajti i pusic'al.

⁶Jini x'ixic ba yumal tsi' sube Salomón: Isujm che' bajche' tsa cubi tic lumal. An cabal a ña'tabal. ⁷Ma'anic tsac ñopo jinto tsa' tili j q'uel. Cujil wale ma'anic tsa' subentiyon lamital, come cabal jax a ña'tabal yic'ot a chubal'an ñumen bajche' tsa cubi. ⁸Tijicñayob jax jini israelob. Tijicñayob jini x'e'telob a cha'an mu' ba i ñich'tañob a t'an cha'an cabal a ña'tabal. ⁹La' subjic i ñuclel a Yum Dios tsa' ba i yajcayet cha'an ma' wochel ti' yum israelob. Tsiquil cabal jax i c'uxbiya lac Yum ti pejtelel ora come tsi' yalq'ueyet a ña'tabal cha'an ma' cha'len meloñel ti toj. Uts'at bajche' ma' cha'len yumantel ti' tojlel i cha'año' ba, che'en. ¹⁰Tsi' yalq'ue i majtan jini rey Salomón, cha'c'al millón peso ti oro, yic'ot cabal xojocña ba perfume, yic'ot wen i t'ojol tac ba xajlel. Ma'anic ba' ora tsa' c'oti cabal xojocña ba perfume ba'an Salomón che' bajche' tsi' ch'ama tilel jini x'ixic ba yumal ch'oyol ba ti Sabá.

¹¹I barco tac Hiram tsi' ch'amayob c'otel oro tilem ba ti Ofir yic'ot wen tac ba te' i c'aba' sándalo yic'ot wen i t'ojol tac ba xajlel. ¹²Jini rey Salomón tsi' c'añal jini te' cha'an mi' melben i yoyel i yotot lac Yum. Tsi' c'añal ja'el ti' melol jini arpa tac yic'ot yan tac ba música am ba i ch'ajñal mu' ba i c'añoob xc'ayob. Ma'anic yamba i t'ojol ba te' lajal bajche' jini sándalo c'alal wale.

¹³Salomón tsi' q'uextabe i majtan x'ixic ba yumal ch'oyol ba ti Sabá. Tsi' yalq'ue pejtel chuqui yom i pusic'al yic'ot yan tac ba majtañal tsa' ba i yajcabe ti' yutslel i pusic'al. Tijicña tsa' cha' sujti majlel ti' lumal yic'ot i winicob.

I ñuclel Salomón yic'ot i chubal'an

(2 Cr. 9.13-24)

¹⁴Ti jujump'ejl jab Salomón tsa' aq'uenti oro am ba i tojol che' bajche' lujunc'al yic'ot lujump'ejl i yuxc'al (250) millón

ti peso. ¹⁵Che' ja'el tsi' ch'ambeyob i tojoñel jini xchoñoñelob. Tsi' cha'le ganar ti choñoñel ti' tojlel jini reyob ti Arabia. An ja'el chuqui tsi' ch'ambeyob tilel jini año' ba i ye'tel ti Israel yic'ot ti Judá. ¹⁶⁻¹⁷Salomón tsi' c'añal lamital cha'an mi' mel lujunc'al mactijibal tac cha'an guerra. Ti jujump'ejl mactijibal tsi' c'añal oro am ba i tojol che' bajche' jo'lujump'ejl i chanc'al mil peso. Tsi' mele ja'el jo'lujunc'al (300) yamba e'tijibal cha'an guerra. Ti jujump'ejl tsi' c'añal oro am ba i tojol che' bajche' junc'al mil peso. Tsi' loti ti colem ba i yotot i c'aba' Líbano. ¹⁸Tsi' mele ti marfil i buchlib cha'an i ye'tel. Tsi' tep'e ti oro. ¹⁹An wacquejp letsibal ya' ti buchlib. Xotol i pat, an i c'ab ja'el. Ti jujunwejl an i yejtal tac bajlum. ²⁰Che' ja'el ti jujump'ejl letsibal an cha'cojt i yejtal tac bajlum, lajchancojt ti pejtelel. Ti pejtelel pañimil ma'anic yamba i t'ojol jax ba buchlibal che' bajche' iliyi. ²¹Pejtelel i vaso Salomón puro oro. Pejtel latu tac am ba ti tsalal i c'aba' Líbano melbil tac ti puro oro. Ma'anic tsi' c'añalyob plata come mach letsemic i tojol. ²²Cabalach i barco Salomón yic'ot Hiram. Tsi' coltayob i ba ti' ye'tel ti colem ñajb. U'uxp'ejl jab tsa' c'oti cabal colem barco. Tsi'uchu tilel cabal oro, yic'ot plata, yic'ot marfil, yic'ot colem bats', yic'ot chac mut.

²³Cabal i ña'tabal Salomón yic'ot i chubla'an, ñumen bajche' yaño' ba reyob ti pañimil. ²⁴Winicob tilemo' ba ti cabal lum ti pañimil tsa' c'otiyob cha'an mi' yubibeñob i t'an Salomón cha'an cabal i ña'tabal tilem ba ti Dios. ²⁵Ti jujuntiquilob tsi' yaq'ueyob tojoñel ti jujump'ejl jab, plata, yic'ot oro, yic'ot uts'atax ba pisil, perfume, yic'ot i ts'alcal i bal ñac'al, yic'ot caballo yic'ot mula.

Caballo yic'ot carreta tac

(2 Cr. 1.14-17; 9.25-28)

²⁶Salomón tsi' tempa cabal caballo yic'ot carreta tac, yic'ot cabal xc'achta caballojob. An lujunc'al i chambajc' (1,400) carreta tac ti pejtelel, yic'ot lajchamp'ejl mil xc'achta caballojob. Ojlil tsa' chumleyob ya' ti tejclum ba' lotol carreta tac. Ojlil tsa' chumleyob ti Jerusalén lac'al ba'an jini rey. ²⁷Ti jim ba ora lajal i yonlel plata che' bajche' xajlel ya' ti Jerusalén. On jini ch'ujte'. Tsa' caji ti q'uejlel che' bajche' i yonlel sicómoro. ²⁸I winicob Salomón tsi' mambeyob tilel

caballo tac ti Egipto yic'ot ti Turquía. ²⁹Juncojt carreta melbil ba ti Egipto an i tojol ya' ti Jerusalén che' bajche' jo'p'ejl mil peso. I tojol caballo jiñach lujunc'al i jo'bajc' (1,800) peso. Salomón tsi' cha' choño lamital jini caballo ti' tojlel jini reyob, heteojob yic'ot siriajob.

I mul Salomón

11 Salomón mach cojic jach tsi' paya ti' yijñam i yalobil Faraón. Tsi' cha'le ñujpuñel yic'ot yaño' ba ch'oyolo' ba ti Moab, yic'ot ti Amón, yic'ot ti Edom, yic'ot ti Sidón, yic'ot ti Het, ²anquese tic'bil cha'an mi' payob ti' yijñam jini ch'oyolo' ba ti yan tac ba lum. Come i tilel jini x'ixicob mi' subeñob i ñoxi'al cha'an mi' ch'ujutesan dioste' tac. Pero Salomón ma'anic tsi' jac'la i tic'ol. ³An jo'lujunc'al i cha'bajc' (700) i yijñam Salomón ti pejtelelob. Che' ja'el an jo'lujunc'al (300) i majan ijñam. I yijñamob Salomón tsa' caji i socbeñob i pusic'al cha'an mi' cly lac Yum. ⁴Che' anix i jabilel Salomón, i yijñamob tsi' xiq'uiyob cha'an mi' ch'ujutesan i diosob. Ma'anic tsi' ñopo lac Yum Dios che' bajche' tsi' ñopo i tat David. ⁵Salomón tsi' ch'ujutesa Astoret jini x'ixic ba dios mu' ba i c'uxbiñob sidoñob, yic'ot Milcom, jini leco ba i dios amoñob. ⁶Che' jini mach tojic tsi' mele. Tsi' cly lac Yum. Ma'anic tsi' tsajca che' bajche' David i tat. ⁷Tsi' melbe i yotlel dioste' i c'aba' Quemos ya' ti Olivo wits am ba ti' tojel Jerusalén. Jiñach leco ba i dios moabob. Tsi' melbe i yotlel Moloc, i dios amoñob. ⁸Tsi' mele ja'el pulantib tac ba' mi' pulob pom i yijñamob, ba' mi' tsansabeñob i majtan tac i diosob.

⁹⁻¹⁰Lac Yum tsi' wen mich'le Salomón, come tsi' tats'la loq'uel i ba ba'an lac Yum i Dios Israel. Cha'yajl tsi' wan sube cha'an ma'anic mi' ch'ujutesan yamba diosob. Pero ma'anic tsi' jac'la i tic'ol. ¹¹Jini cha'an lac Yum tsi' sube Salomón: Tsa' ñusabeyon c mandar. Jini cha'an mi caj c chilbeñet a yumantel cha'an ti' caj a mul. Mi caj caq'uen juntiquil x'e'tel a cha'an. ¹²⁻¹³Cha'an i c'uxbintel a tat ma'anic mi caj c mel che' cuxulet to. Mi caj c chilben i yumantel a walobil. Mi caj j clyben a walobil junmojt israelob cha'an c'ux mi cubin David yic'ot Jerusalén, jini tejclum tsa' ba c yajca. Che' tsi' yala lac Yum.

¹⁴Lac Yum tsi' yʌq'ue i p'ʌtlalɛl Hadad cha'an mi' contrajin Salomón. Hadad i yalobilach jini rey ti Edom. ¹⁵Che' cuxul to David tsajni ti Edom yic'ot Joab cha'an mi' mucob jini soldadojob israelo' bʌ tsa' bʌ chʌmiyob ti guerra. Ti jim bʌ ora jini israelob tsa' yʌlʌ i laj jisañob jini winicob año' bʌ ti Edom. ¹⁶Tsa' cʌleyob jini soldadojob israelo' bʌ wʌcp'ejl uw che' bʌ tsi' jisayob jini winicob ti Edom. ¹⁷Pero cuxul tsa' cʌle Hadad yic'ot cha'tiquil uxtiquil año' bʌ i ye'tel tsa' bʌ puts'iyob. Jini año' bʌ i ye'tel tsi' pʌyʌyob majlel Hadad ti Egipto come alob to. ¹⁸Tsa' loq'uiyob ti Madián, tsa' c'otiyob ti Parán. Ya'i tsi' tajayob yaño' bʌ. Temel tsa' majliyob ti Egipto. Faraón tsi' yʌq'ueyob otot yic'ot i bʌl i ñʌc'. ¹⁹Hadad tsa' ajni ti jump'ejl i pusic'al yic'ot Faraón. Faraón tsi' yʌq'ue i mu' cha'an i yijñam. Jiñach i yijts'in Tahpenes i yijñam bʌ Faraón. ²⁰Tsa' tili ti pañimil ch'iton bʌ i yalobil i c'aba' Genubat. Tsa' caji ti colel ti' yotot Faraón yic'ot i yalobilob Faraón. ²¹Ya' ti Egipto Hadad tsa' caji i yubin chʌmenix David yic'ot Joab. Tsi' c'ajtibe wocol t'an Faraón cha'an mi' sujtel ti Edom. ²²Faraón tsi' c'ajtibe: ¿Chucoch a wom majlel? ¿Chuqui anto yom ilayi? che'en Faraón. Hadad tsi' jac'ʌ: Ma'anic chuqui anto yom. Che' jach com majlel ba'an c pi'ʌlob, che'en Hadad.

²³Dios tsa' caji i yʌq'uén i p'ʌtlalɛl yambʌ i contra Salomón, i c'aba' Rezón (i yalobil Eliada) tsa' bʌ puts'i loq'uel ti' tojlel i yum. I yum jiñach Hadadezer rey ti Soba. ²⁴Rezón tsa' ochi ti' yum xujch'ob. Che' bʌ David tsi' jisa Soba, tsa' puts'iyob majlel ti Damasco. Ya'i tsi' yotsa i bʌ ti rey Rezón. ²⁵Ti pejtelel i jabilel Salomón, jini Rezón yic'ot Hadad tsi' contrajiyob, come tsi' ts'a'leyob israelob. Rezón tsi' cha'le yumʌl ti Siria.

²⁶Jeroboam (i yalobil Nabat) jiñach yambʌ i contra Salomón ch'oyol bʌ ti Sereda am bʌ ti Efraín. Meba' i ña' i c'aba' Zerúa. ²⁷⁻²⁸Jeroboam tsa' caji i contrajin Salomón. Salomón tsi' wa'choco jini Milo i tejclum soldadojob. Tsi' cha' weñ'esa i ts'ajquil jini tejclum tsa' bʌ i mele David i tat. Tsi' yʌq'ue i ye'tel Jeroboam che' bʌ tsi' q'uele ch'ejl i pusic'al, cabʌl i ña'tʌbal. Tsi' yʌq'ue i ye'tel cha'an mi' q'uel x'e'telob, i p'olbalo' bʌ José, junmojt bʌ israelob.

²⁹Ti jump'ejl q'uin che' woli' loq'uel majlel ti Jerusalén Jeroboam, tsi' taja jini x'alt'an i c'aba' Ahías ch'oyol bʌ ti Silón, lʌpbil bʌ i cha'an tsiji' bʌ i bujc. Tsa' caji i pejcañob

i ba ya' ti bij. I bajñel jach ya' añob. ³⁰Ahías tsi' wac' tsili i bujc lapbil ba i cha'an, lajchantsijl i bujc. ³¹Ahías tsi' sube Jeroboam: Ch'ama lujuantsijl, come lac Yum i Dios Israel woli' yal: “Mi caj c chilben i yumantel Salomón. Mi caj caq'ueñet lujunmojt israelob. ³²Junmojt jach mi caj i clytal ti' wenta Salomón cha'an ti' caj David yic'ot Jerusalén. Come tsac yajca Jerusalén ti' tojlel pejtelel Israel. ³³Che'ach mic mel cha'an tsi' clyayon Salomón. Tsi' ch'ujutesa Astoret, jini x'ixic ba dios i cha'an sidoñajob, yic'ot Quemos i dios moabob, yic'ot Milcom i dios amoñob. Ma'anic tsi' jac'a c mandar. Ma'anic woli' mel chuqui toj tic wut. Ma'anic woli' jac'beñon c t'an che' bajche' David i tat. ³⁴Pero ma'anic mi caj c chilben i yumantel che' cuxul to cha'an ti' caj mij c'uxbin c winic David tsa' ba c yajca, come tsi' jac'beyon c t'an yic'ot c mandar.

³⁵Che' woli ti yumantel i yalobil, mi caj c chilben lujunmojt israelob. Mi caj caq'ueñet. ³⁶Mi caj caq'uen junmojt israelob cha'an c'ux mi cubin c winic David tsa' ba c yajca. Jini cha'an ma'anic mi caj i yajpel i c'ac'al David ya' ba' tsa cac'a j c'aba' ti Jerusalén. ³⁷Mi caj c wa'chocoñet ti rey ti' tojlel israelob. ³⁸Mi xuc'ul ma' jac' pejtél c mandar cha'an ma' mel chuqui uts'at tic wut che' bajche' tsi' mele c winic David, che' jini mi caj cajñel a wic'ot. Mi caj caq'ueñob i yumantel a walobilob ti' tojlel Israel ti pejtelel ora che' bajche' tsac sube David. ³⁹Pero mi caj c poj peq'uesan i p'olbal David cha'an ti' caj i mul Salomón, pero mach ti pejtelelic ora”, che'en lac Yum Dios. Che' tsi' yala jini x'alt'an Ahías. ⁴⁰Che' ba tsi' ña'ta Salomón tsi' ñopo i tsansan Jeroboam, pero tsa' puts'i ba'an Sisac jini rey am ba ti Egipto. Ya' tsa' jal'a jinto tsa' chami Salomón.

Tsa' chami Salomón

(2 Cr. 9.29-31)

⁴¹An i juñilel Salomón ba' ts'ijbubil pejtél i melbal yic'ot pejtél i subal mu' ba i tsictesan i ña'tabal. ⁴²Cha'c'al jab tsi' cha'le yumal Salomón ya' ti Jerusalén ti' tojlel pejtelel israelob. ⁴³Tsa' chami che' bajche' i ñojte'elob. Tsa' mujqui ya' ti Jerusalén ti' tejclum David i tat. Che' jini tsa' caji i cha'len yumal Roboam i yalobil.

Xñusa t'añob jini israelob

(2 Cr. 10.1—11.4)

12 Roboam tsa' majli ti Siquem ba' tsa' majliyob pejtelel israelob cha'an mi' wa'chocoñob ti rey. ²Ti jim ba' ora Jeroboam (i yalobil Nabat) tsi' yubi chuqui tsa' ujti. Ya'to an ti Egipto ba' tsa' puts'i che' ba' tsi' bac'ña jini rey Salomón. ³Pero jini israelob tsi' chocoyob ti p̄ayol. Che' jini tsa' cha' sujti Jeroboam ti' lumal. Tsa' majli yic'ot bajc'la i pi'lob cha'an mi' pejcañob Roboam. Tsi' subeyob: ⁴A tat tsi' teñeyon lojon ti cabal e'tel. Yomix ma' t'ox c wocol lojon. Mach yomic lajal ma' mel che' bajche' a tat. Che' jini mi caj c yumañet lojon, che'ob. ⁵Roboam tsi' jac'beyob: Mi caj c ña'tan bajche' yom. Cucuxla. Che' ñumenix uxp'ejl q'uin mi caj c subeñetla, che'en. Che' jini tsa' cha' sujtiyob ti' yotot.

⁶Jini rey Roboam tsi' c'ajtibeyob jini xñoxob tsa' ba' i pi'leyob ti e'tel jini rey Salomón: ¿Chuqui yom mic suben ili winicob? che'en. ⁷Jini xñoxob tsi' jac'beyob: Mi mux a mel che' bajche' mi' yalob ili winicob, mi uts ma' pas a ba' ti' tojlelob, che' jini mi caj i yumañetob ti pejtelel ora, che'ob. ⁸Pero Roboam ma'anic tsi' mula ili t'an. Che' jini tsi' pejca ch'itoñob to ba' i pi'lob tsa' ba' coliyob yic'ot. ⁹Tsi' c'ajtibeyob: ¿Chuqui yom mic subeñob ili winicob tsa' ba' i subeyon cha'an mic t'oxbeñob i wocol cha'an ma'anic mic mel che' bajche' c tat? che'en Roboam. ¹⁰I pi'lo' ba' ti colel tsi' subeyob: Yom ma' suben ili winicob: “Mi tsa' la' wubi wocol ti' tojlel c tat, ñumen mi caj la' wubin tic tojlel. ¹¹Isujm, c tat tsi' yaq'ueyetla wocol ba' e'tel, pero ñumen cabal mi caj caq'ueñetla. C tat tsi' jats'ayetla ti asiyal, pero joñon mi caj caq'uetla ti c'uxtal ti siñan”. Che' yom ma' subeñob, che'ob jini ch'itoñob to ba' i pi'lob.

¹²Che' ti' yuxp'ejlel q'uin tsa' cha' c'oti Jeroboam yic'ot i winicob ba'an Roboam che' bajche' tsi' yac'la i t'an Roboam: Che' ñumenix uxp'ejl q'uin mi caj c subeñetla, che'en. ¹³Jini rey tsats tsi' pejca jini winicob. Ma'anic tsi' jac'beyob i t'an jini xñoxob. ¹⁴Tsi' jac'beyob i t'an jini ch'itoñob to ba' i pi'lob ti colel. Tsi' yala: Isujm tsi' yaq'ueyetla wocol e'tel c tat, pero ñumen cabal mi caj caq'ueñetla. C tat tsi' jats'ayetla ti asiyal, pero joñon mi caj caq'uetla ti c'uxtal

ti siñan, che'en Roboam. ¹⁵Jini rey ma'anic tsi' jac'beyob i wocol t'an jini winicob. Che'ach tsa' ujti cha'an mi' ts'actiyel i t'an lac Yum che' bajche' tsi' yala jini x'alt'an Ahías ch'oyol ba ti Silón.

¹⁶⁻¹⁷Che' ba tsi' ña'tayob jini israelob ma'anic woli' jac'beñob i wocol t'an jini rey, tsi' yalayob: ¿Chuqui tsac taja lojon ti' yumantel David? ¿Chuqui to i ye'tel mi lac yuman i p'olbal David? Israelob, cha' conla ti la cotot. La' i bajñel yumañob Roboam i pi'lob. Che' tsi' yalayob. Tsi' chocbeyob majlel ili t'an. Che' jini tsa' laj sujtiyob jini israelob ti' yotot. Roboam tsi' cha'le yumal ti' tojlel junmojt israelob chumulo' ba ti Judá. ¹⁸Jini rey Roboam tsi' choco majlel Adoram i yum jini x'e'telob cha'an mi' wets'ob tilel winicob. Pero jini israelob tsi' juluyob ti xajlel. Che' jini tsa' chami. Jini cha'an jini rey Roboam ti ora jach tsa' letsi ti carreta cha'an mi' majlel ti puts'el ti Jerusalén. ¹⁹Jini cha'an t'oxolob to jini israelob ti' tojlel i p'olbal David c'alal wale. ²⁰Che' ba tsi' yubiyob pejtelel israelob cha' c'otemix Jeroboam ya' ba'an israelob, tsi' chocoyob majlel winicob cha'an mi' p'ayob tilel. Che' jini tsi' wa'chocoyob ti rey ti' tojlel pejtelel israelob. Cojach junmojt tsi' chan tsajcayob i p'olbal David ya' ti Judá.

²¹Che' ba tsa' juli Roboam ti Jerusalén, tsi' p'ayal tilel pejteli i p'olbal Judá yic'ot pejteli i p'olbal Benjamín, bolonc'al mil (180,000) winicob yujilo' ba guerra. Tsi' ña'ta wersa mi caj i cha'len guerra ti' contra jini lujunmojt israelob cha'an mi' ch'ambob ti' wenta. ²²Pero lac Yum tsi' pejca Semaías i winic Dios. Tsi' sube: ²³Suben jini rey Roboam (i yalobil Salomón) yic'ot i winicob ya' ti Judá yic'ot ti Benjamín yic'ot yaño' ba: ²⁴“Mach yomic mi la' walaç majlel ti guerra ti' contra la' pi'lob israelo' ba. Cha' cucuxla ti la' wotot come joñon tsac t'oxoyob”, che'en lac Yum. Che' tsi' yala jini x'alt'an Semaías. Jini winicob tsi' jac'beyob i t'an lac Yum. Tsa' cha' sujtiyob ti' yotot che' bajche' tsa' subentiyob.

I mul Jeroboam

²⁵Jeroboam tsi' cha' wen mele jini ts'ajquibil ba tejclum Siquem am ba ti Efraín wits ya' ba' chumul. Ti wi'il tsi' cha' mele jini ts'ajquibil ba tejclum i c'aba' Penuel. ²⁶Jeroboam tsa' caji i ña'tan ti' pusic'al: Balaq'uen mi caj i cha' chilbeñon

c yumantel i pi'lob David. ²⁷Che' mi' letselob pejtél c winicob ya' ti Jerusalén cha'an mi' pulbeñoob i majtan* lac Yum, bɔbɔq'uen mi caj i ña'tañob ti' pusic'al cha'an mi' cha' tsajcañoob jini rey Roboam. Che' jini mi caj i tsansañoob cha'an mi' cha' yumañoob jini Roboam i rey judíojob. Che' tsi' ña'ta Jeroboam. ²⁸Jini cha'an tsi' teme i t'an yic'ot año' bɔ i ye'tel cha'an mi' mel cha'cojt i yejtal alɔ tat wacax melbil bɔ ti oro. Tsi' sube pejtél winicob: Mach wersajix mi la' chan letsel majlel ti Jerusalén, come awilan wa'ix an la' dios tsa' bɔ i loc'sayetla ti' lumal Egipto, che'en.

²⁹Tsi' yac'ɔ juncojt i yejtal alɔ tat wacax ya' ti Betel. Tsi' yac'ɔ yambɔ ti Dan. ³⁰Che' jini tsi' xiq'ui ti mulil jini israelob. Tsi' ñopbeyob i t'an. Tsi' ch'ujutesayob i yejtal wacax ya' ti Betel yic'ot ti Dan. ³¹Jeroboam tsi' mele ja'el i yotlel diosob ya' ti bujbujtɔl. Tsi' wa'choco motomajob* mach bɔ levíjobic. ³²Che' ti' tejchibal noviembre Jeroboam tsi' mele ñuc bɔ q'uin cha'an Tabernáculo, lajal bajche' mi' melob ya' ti Jerusalén. Tsa' majli ti Betel ba' lotol i yejtal alɔ tat wacax cha'an mi' yac'uen i majtan i dios tac ya' ti pulantib. Che' ja'el tsi' wa'choco motomajob cha'an mi' melob i ye'tel ya' ti bujbujtɔl am bɔ ti Betel. ³³Leco tsi' mele Jeroboam che' bajche' tsi' bajñel ña'ta ti' pusic'al. Tsi' pɔyɔ jini israelob ti q'uiñijel ya' ti Betel. Tsi' tsansa alac'ɔl ti pulantib. Tsi' pulbe pom.

Juntiquil x'alt'an tsi' tiq'ui Jeroboam

13 Che' ya' wa'al Jeroboam ti' t'ejl i pulantib wacax ba' woli' pulben pom, tsa' tili winic ch'oyol bɔ ti Judá, chocbil tilel ti Dios. Tsa' c'oti ti Betel. ²Cantesabil ti lac Yum tsi' cha'le t'an ti' contra jini pulantib. Tsi' yalɔ: Ubin i t'an lac Yum: “Mi caj i yilan pañimil juntiquil i p'olbal David i c'aba' Josías. Josías mi caj i yac' ti ili pulantib i bɔquel jini payxo motomajob mu' bɔ i pulob pom ilayi. Mi caj i pulben i bɔquel jini payxo bɔ motomajob ti ili pulantib”, che'en lac Yum. Che' tsi' yalɔ jini x'alt'an. ³Tsi' subu ja'el bajche' mi caj i ña'tañob mi tilem ti lac Yum ili t'an: “Mi caj i jajwel ili pulantib. Mi caj i pujquel majlel i tɔñil c'ajc am bɔ ti mal”, che'en. Che' tsi' yalɔ jini x'alt'an.

⁴Jini rey Jeroboam tsi' yubibe i t'an i winic Dios ti' contra jini pulantib am bɔ ti Betel. Jeroboam tsi' tuch'u jini x'alt'an.

Tsi' y^ΛΛ: Chucu jini winic, che'en. Ti ora jach tsa' tuch' seña'a i c'Ab. ⁵Tsa' jajwi jini pulantib. Tsa' pam pujqui i tñil c'ajc am b^Λ ti mal. Che'i tsa' ts'actiyi i t'an i winic lac Yum che' bajche' tsi' y^ΛΛ lac Yum. ⁶Jini rey tsi' c'ajtibe jini x'alt'an cha'an mi' pejcan i Dios cha'an mi' q'uejlel ti uts'at: Cha'len oración cha'an mi' cha' lajmel j c'Ab, che'en. I winic Dios tsi' mele che' bajche' tsa' c'ajtibenti. Che' jini tsa' cha' lajmi i c'Ab jini rey. Tsa' cha' ajni che' bajche' ti ñaxan. ⁷Jini rey tsi' sube i winic Dios: Conla ti cotot cha'an ma' c'ux waj quic'ot. Mi caj c^Λq'ueñet a majtan, che'en. ⁸Pero i winic Dios tsi' jac'Λ: Anquese mux a waq'ueñon ojilil a wotot, ma'anic mic majlel a wic'ot. Ma'anic mi caj c cha'len we'el uch'el ilayi. ⁹Come lac Yum tsi' tiq'uiyon ame anic chuqui mij c'ux mic jap ilayi. Tsi' subeyon ja'el cha'an mach ya'ic mic cha' sujtet ba' tsa' tiliyon. Che' tsi' y^ΛΛ jini x'alt'an. ¹⁰Jini cha'an tsa' sujti majlel ti yamb^Λ bij, mach ya'ic ba' tsa' tili.

¹¹Ya' chumul ti Betel ñoxix b^Λ x'alt'an. I yalobilob tsi' subeyob pejtet chuqui tsi' cha'le i winic Dios ya' ti Betel ti jim b^Λ q'uin yic'ot pejtet chuqui tsi' sube rey jini x'alt'an. ¹²I tat tsi' c'ajtibeyob: ¿Baqui b^Λ bij tsa' cha' sujti? che'en. Tsi' p^Λs^Λyob ti' c'Ab ya' ba' tsa' majli i winic Dios tilem b^Λ ti Judá. ¹³⁻¹⁴Jini ñoxix b^Λ x'alt'an tsi' sube i yalobilob: Chajpabeñon jini burro, che'en. Tsi' chajpabeyob. C'ach^Λ tsa' majli i taj i winic Dios ya' ba' woli' sujtet. Tsa' c'oti i taj ya' ba' buchul ti' yebal c'olol te'. Tsi' c'ajtibe: ¿I winiquet ba Dios tilemet b^Λ ti Judá? che'en. Tsi' jac'Λ: Joñon cu, che'en. ¹⁵⁻¹⁶Jini ñoxix b^Λ x'alt'an tsi' sube: Conla ti cotot ti c'ux waj, che'en. Jini yamb^Λ tsi' jac'Λ: Mach mejlicon come tic'bilon ti we'el uch'el ilayi. Jini cha'an ma'anic mic majlel awic'ot, ¹⁷come lac Yum tsi' subeyon: "Mach yomic ma' cha'len we'el uch'el ya'i. Mach yomic ma' cha' sujtet majlel ba' tsa' tiliyet", che'en lac Yum. Che' tsi' y^ΛΛ x'alt'an. ¹⁸Jini ñoxix b^Λ winic tsi' sube: X'alt'añon ja'el che' bajche'et. Juntiquil i yángel lac Yum tsi' subeyon cha'an mic payet ti cotot ti we'el uch'el, che'en. ¹⁹Jiñach lot pero jini winic ch'oyol b^Λ ti Judá tsi' ñopo. Tsa' majli yic'ot. Tsi' cha'le we'el uch'el.

²⁰Che' buchulob to ti mesa, tsa' c'oti i t'an lac Yum ti' tojlel jini ñoxix b^Λ x'alt'an. ²¹Ti c'am b^Λ t'an tsi' sube i winic Dios tilem b^Λ ti Judá: Jiñach i t'an lac Yum: "Tsa' ñusabe

i t'an a Yum Dios. Ma'anic tsa' jac'be i mandar. ²²Come tsa'ix cha' sujtiyet tilel ti we'el uch'el wa' ba' tic'bilet. Jini cha'an ma'anic mi caj a mujquel ti a lumal ba' muculob a ñojte'elob", che'en lac Yum. Che' tsi' yALA jini ñoxix ba x'alt'an.

²³Che' ba ujtemix ti we'el jini ñoxix ba x'alt'an, tsi' chajpabe i burro jini x'alt'an tsa' ba i jac'la i payol ti' yotot. ²⁴Che' woli' majlel ti bij i winic Dios, tsi' taja bajlum. Jini bajlum tsi' tsansa. Tsa' chami jini x'alt'an. Cotol jini burro yic'ot jini bajlum ti' t'ejl jini ch'ujlelal ya' ba' ñolol ti bij. ²⁵Cha'tiquil uxtiquil xñumelob tsa' c'oti i tajib ti bij. Ya' cotocña jini bajlum ti' t'ejl ch'ujlelal. Tsa' majli i subob ti tejclum ba' chumul jini ñoxix ba x'alt'an. ²⁶Jiñach tsa' ba i cha' paya tilel ti' yotot. Che' ba tsi' yubi, tsi' yALA: Jiñach i winic Dios tsa' ba i ñusabe i t'an lac Yum. Lac Yum tsi' sube jini bajlum cha'an mi' tsansan. Tsi' tsansa cha'an mi' ts'actiyel i t'an lac Yum, che'en jini ñoxix ba x'alt'an.

²⁷⁻²⁸Tsi' sube i yalobilob cha'an mi' chajpabeñob i burro. C'achal tsa' majli. Tsi' taja jini ch'ujlelal ti bij. Cotol jini burro yic'ot jini bajlum ti' t'ejl ch'ujlelal. Jini bajlum ma'anic tsi' c'uxu jini ch'ujlelal. Ma'anic tsi' tic'la burro ja'el. ²⁹Jini x'alt'an tsi' ch'uybe letsel i bac'tal i winic Dios. Tsi' yac'la ti' pat burro cha'an mi' ch'am majlel ti tejclum cha'an mi' yuc'tañob. ³⁰Tsi' mucu ya' ti mucuñibal i cha'an ba. Tsi' yuc'tayob. Tsi' yALayob: Mach cha'leyajix, quijs'in, quijs'in, che'ob. ³¹Che' jini tsi' mucuyob. Jini x'alt'an tsi' sube i yalobilob: Che' mic chamel, yom mi la' mucon wa' ba' mucul i winic Dios. Yom ma' wac' c baquel ti' t'ejl i baquel i winic Dios, ³²come mi caj i ts'actiyel i t'an lac Yum tsa' ba ajli ti' contra jini pulantib am ba ti Betel, ti' contra jini bujbujtal ba' mi' ch'ujutesañob dioste' tac ti pejtelel tejclum ti Samaria. Che' tsi' yALA jini ñoxix ba x'alt'an.

³³Jeroboam ma'anic tsi' caya i mel jontolil bajche' jach yom i pusic'al. Tsi' chan wa'choco motomajob loquemo' ba ti jujunmojt israelob cha'an mi' cha'leñob ch'ujutesaya ti bujbujtal. Tsa' ochiyob ti motomaj jini mach ba levijobic.

³⁴Jini cha'an Dios tsi' jisa i p'olbal Jeroboam. Che' jini tsa' chilbenti i yumantel.

Ahías tsi' subu t'an ti' contra Jeroboam

14 Tsa' c'am'a i yalobil Jeroboam i c'aba' Abías. ²Jeroboam tsi' sube i yijñam: Yañal a wut, lapa yamba a bujc cha'an ma'anic mi' calñetob winicob x'ixicob, cha'an ma'anic mi' tsictiyel mi quijñamet. Cucu ti Silo ba'an jini x'alt'an i c'aba' Ahías. Jiñach tsa' ba i subeyon mi caj cochel ti rey ti' tojlel israelob. ³Ch'ama majlel lujunlajts pan yic'ot tiquin ba ts'usub yic'ot junwojl chab. Aq'uen jini x'alt'an. Jini mi caj i subeñet mi mu'to i c'oc'an la calobil. Che' tsi' yala Jeroboam.

⁴Che'ach tsi' mele i yijñam Jeroboam. Tsa' majli ti' yotot Ahías ya' ti Silo. Ñoxix Ahías. Ma'anix mi' c'otel i wut. ⁵Lac Yum tsi' sube: Tal i yijñam Jeroboam cha'an mi' c'ajtibeñet mi mu'to i c'oc'an i yalobil come c'am, che'en lac Yum. Tsi' sube ja'el bajche' yom mi' jac'ben.

⁶Che' ba tsa' c'oti jini x'ixic yañal ba i wut yic'ot i pislel cha'an mach yomic i yac' i ba ti calñel, Ahías tsi' yubi ya' ch'ojch'ojña tilel i yoc ti' ti' otot. Tsi' pejca: Ochen, i yijñam Jeroboam. ¿Chucoch tsa' yañal a ba? Mi caj c subeñet ch'ijiyem ba t'an. ⁷Cucu suben Jeroboam: "Jiñach i t'an lac Yum i Dios Israel: Tsac yajcayet ti' tojlel israelob. Tsac wa'chocoyet cha'an ma' cha'len yumal ti' tojlel c cha'año' ba. ⁸Tsac chilbe i yumantel i p'olbal David cha'an mi cal'ueñet. Pero ma'anic tsa' jac'beyon c mandar che' bajche' tsi' jac'la c winic David. David tsi' tsajcayon ti pejtelel i pusic'al. Tsi' cha'le chuqui toj tic wut. ⁹Ñumen jontolet che' bajche' pejtel yumalob. Calax jax c mich'ajel, come tsa' mele i yejtal dios tac. Tsa' ch'ujutesa. Tsa' calayon. ¹⁰Jini cha'an mi caj cal'ueño' wocol año' ba ti' yotot Jeroboam. Mi caj c jisan pejtel ch'iton ba i yalobilob cha'an ma'anic mi' calyal mi juntiquilic. Mi caj c misun loq'uel ti Israel pejtel i cha'año' ba Jeroboam che' bajche' mi' misuntel loq'uel i ta' alac'al. ¹¹Jini mu' ba i chamel ti mal tejclum mi caj i c'uxtal ti ts'i'. Jini mu' ba i chamel ti bij mi caj i c'uxtal ti xta'jol. Jiñach i t'an lac Yum. ¹²Cucux ti a wotot. Che' ma' wochel ti tejclum, mi caj i chamel a walobil. ¹³Mi caj i yuc'taño' pejtelel israelob. Mi caj i mucob. Pero cojach jini mi caj i mujquel. Come ti' tojlel pejtelel a pi'lob ti' yotot Jeroboam cojach jini tsa' q'uejli ti uts'at ti' wut Dios. ¹⁴Lac

Yum mi caj i wa'chocon yamba rey ti' tojlel israelob. Jini mi caj i tsansan pejtél i p'olbal Jeroboam. ¹⁵Lac Yum mi caj i yalq'uen wocol Israel che' bajche' amay jats'bil ba ti ja'. Mi caj i boc loq'uel che' bajche' te'. Mi caj i loc'sañob ti jini uts'at ba lum tsa' ba i yalq'ueyob i ñojte'elob. Mi caj i laj pucob majlel ti junwejl Eufrates, come tsi' meleyob i yejtal dios tac. Tsi' techbeyob i mich'ajel lac Yum. ¹⁶Jini cha'an lac Yum mi caj i cay israelob cha'an ti' caj i mul Jeroboam, cha'an tsi' xiq'ui ti mulil jini israelob". Che' yom ma' suben, che'en Ahías.

¹⁷Jini cha'an tsa' sujti ti Tirsá i yijñam Jeroboam. Che' woli' c'otel ti' ti' i yotot, tsa' chami i yalobil. ¹⁸Tsi' mucuyob. Pejtelel israelob tsi' yuc'tayob che' bajche' lac Yum tsi' sube jini x'alt'an Ahías. ¹⁹Ts'ijbubil ti' juñilel i reyob Israel yan tac ba i melbal Jeroboam yic'ot bajche' tsa' ujti guerra ti' tojlel. ²⁰Jeroboam tsi' cha'le yumantel cha'p'ejl i cha'c'al jab. Che' ba tsa' chami Jeroboam, tsi' ch'ambe i ye'tel i yalobil i c'aba' Nadab.

I yumantel Roboam

(2 Cr. 12.1-16)

²¹Ya' ti Judá tsi' cha'le yumal Roboam (i yalobil Salomón). Anix jump'ejl i yuxc'al (41) i jabilel che' ba tsa' caji ti yumantel. Wuclujump'ejl (17) jab tsi' cha'le yumal ya' ti Jerusalén, jini tejclum tsa' ba i yajca lac Yum ti' tojlel pejtél Israel cha'an mi' caljñel i c'aba'. I ña' Roboam jijnach Naama ch'oyol ba ti Amón. ²²Jini año' ba ti Judá ja'el tsi' cha'leyob jontolil ti' wut lac Yum. Tsi' techbeyob i mich'ajel lac Yum cha'an cabal i mul, ñumen bajche' i ñojte'elob. ²³Tsi' wa'chocoyob oy ba' mi' cha'leñob ch'ujutesaya ya' ti bujbujtal. Tsi' meleyob dios tac. Tsi' yac'ayob ti jujump'ejl chan ba bujtal yic'ot ti yebal jujuntejc jupul ba te'. ²⁴An winicob ti Judá tsa' ba i pi'leyob i ba ti' ts'i'lel. Jini chumulo' ba ti Judá leco tsi' meleyob che' bajche' tsi' meleyob jini ñaxan ba i yumob jini lum. Lac Yum tsi' chocoyob loq'uel cha'an i mul cha'an mi' ch'amob i lum jini israelob.

²⁵Che' ti' jo'p'ejlel i jabilel i yumantel Roboam, jini rey ti Egipto i c'aba' Sisac tsi' teche guerra ti' contra Jerusalén. ²⁶Tsi' loc'sa jini letsem tac ba i tojol am ba ti' yotot lac Yum yic'ot ti' yotot jini rey. Tsi' lu' xujch'i majlel yic'ot jini mactajibal

cha'an guerra tsa' ba i mele Salomón ti oro. ²⁷Roboam tsi' mele yamba maclajibal ti bronce cha'an i q'uexol. Tsi' yalq'ueyob i yumob xcantayajob mu' ba i cantañob i ti' i yotot rey. ²⁸Che' ba tsa' majli jini rey ti' yotot lac Yum, jini xcantayajob tsi' ye'eyob majlel jini maclajib. Che' ba tsa' sujti tsi' cha' lotoyob ti' yajñib.

²⁹Ts'ijbubil ti' juñilel i reyob Judá jini yan tac ba i melbal Roboam yic'ot pejtél tsa' ba ujti che' woli' mel i ye'tel. ³⁰Tsi' contrajiyob i ba Roboam yic'ot Jeroboam che' cuxulob to. ³¹(I ña' Roboam jiñlach Naama jini ch'oyol ba ti Amón.) Che' ba tsa' chami Roboam, tsa' mujqui ba' mucul i ñojte'elob ya' ti Jerusalén. I yalobil i c'aba' Abiam tsi' ch'ambe i ye'tel.

I yumantel Abiam

(2 Cr. 13.1-22)

15 Che' ti' waxaclujump'ejl (18) i jabilel i yumantel Jeroboam (i yalobil Nabat), Abiam tsa' wa'choconti ti rey ti Judá. ²Xp'ejl jab tsi' cha'le yumal ti Jerusalén. I ña' Abiam jiñlach Maaca, i yixic'al Abisalom. ³Abiam tsi' cha'le mulil lajal bajche' i tat. Ma'anic tsi' ñopo lac Yum Dios ti jump'ejl i pusic'al che' bajche' David i ñojte'el. ⁴Pero cha'an ti' caj David, lac Yum Dios tsi' yalq'ue i p'olbal tsa' ba i cha'le i ye'tel ti' q'uexol ya' ti Jerusalén, come David tsi' c'uxbi lac Yum. ⁵Tsi' cha'le chuqui uts'at ti' wut lac Yum. Ma'anic tsi' ñusabe i t'an lac Yum ti pejtelel i jabil, cojach tsi' ñusa che' ba tsi' taja i mul ti' tojlel Urías jini heteo. ⁶Che' yumalach Abiam ti Judá, tsi' ch'an contrajiyob i ba ti guerra jini israelob. ⁷Ts'ijbubil ti' juñilel i reyob Judá yan tac ba i melbal Abiam yic'ot pejtél tsa' ba ujti ti' yumantel. ⁸Che' ba tsa' chami Abiam, tsa' mujqui ya' ti Jerusalén. I yalobil i c'aba' Asa tsi' ch'ambe i ye'tel.

I yumantel Asa

(2 Cr. 14.1-5; 15.16-19)

⁹Che' ñumenix bolonlujump'ejl (19) i jabilel i yumantel Jeroboam jini rey ti Israel, Asa tsa' wa'choconti ti rey ti Judá. ¹⁰Tsi' cha'le yumal ti Jerusalén jump'ejl i yuxc'al (41) jab. ¹¹Asa tsi' mele chuqui uts'at ti' wut lac Yum che' bajche' David i ñojte'el. ¹²Tsi' choco loq'uel ti' lumal jini winicob tsa' ba i

laj ba pi'leyob i ba. Tsi' choco pejtél jini dioste' tac tsa' ba i meleyob i tatob. ¹³Tsi' chilbe i ye'tel x'ixic ba yumal i c'aba' Maaca, i chuchu', come tsi' mele dioste' i c'aba' Asera. Asa tsi' tsepe. Tsi' pulu ya' ti' bijlel ja' i c'aba' Cedrón. ¹⁴Ma'anic tsi' jisa i yajñib tac dioste' ti bujbujtal, pero xuc'ul tsi' ñopo lac Yum ti pejtelel i jabilel. ¹⁵Asa tsi' loto jini ma'actajibal tac ti Templo cha'an mi' q'uejlel. Jiñach ma'actajibal melbil ba ti bronce tsa' ba i yaq'ue lac Yum i tatuch. Ya' tsi' loto ja'el jini p'ejt tac melbil ba ti plata yic'ot ti oro.

Asa yic'ot Benadad tsi' coltayob i ba

(2 Cr. 16.1-10)

¹⁶Asa tsi' chan cha'le guerra yic'ot Baasa jini rey ti Israel. ¹⁷Baasa tsi' wen ñup'u jini tejclum i c'aba' Ramá cha'an mach chan mejlix ti ñumel jini año' ba ti Judá. ¹⁸Jini cha'an Asa tsi' ch'amal pejtél jini oro yic'ot plata tsa' ba cale ti' yotot lac Yum yic'ot ti' yotot rey. Tsi' yac'la ti' c'ab i winicob cha'an mi' ch'ambeñob majlel Benadad ya' ba' chumul ti Damasco. Benadad jiñach i yalobil Tabrimón, i yalobil ba Hezión jini rey ti Siria. ¹⁹Asa tsi' choco ti subentel ja'el: La' lac laje' lac t'an che' bajche' lac tatob. Wolic chocbeñet majlel plata yic'ot oro cha'an a majtan. Yom ma' jem a t'an yic'ot Baasa jini rey ti Israel cha'an mi' cay i contrajiñon ti guerra, che'en Asa. ²⁰Benadad uts'at tsi' yubibe i t'an jini rey Asa. Tsi' yaq'ue mandar i yumob soldadojob cha'an mi' majlelob ti guerra ti' contra i tejclum tac Israel. Che' jini tsi' cha'leyob guerra ti' contra Ijón, yic'ot Dan, yic'ot Abelbet Maaca, yic'ot pejtél Cineret, yic'ot pejtél tejclum tac am ba ti Neftalí. ²¹Che' ba tsi' yubi Baasa, tsi' cay i cha' mel jini tejclum i c'aba' Ramá. Tsa' sujti ti Tirsa. ²²Jini rey Asa tsi' yac'la i t'an cha'an mi' pajyelob tilel pejtelel winicob ti Judá. Tsi' comol jemeyob jini xajlel tac yic'ot te' ya' ti Ramá tsa' ba i c'añayob israelob cha'an i majquil Ramá. Asa tsi' c'añal cha'an mi' wen mel ti uts'at jini tejclum Geba am ba ti Benjamín yic'ot Mizpa.

Tsa' chami Asa

(2 Cr. 16.11-14)

²³Ts'ijbubil ti' juñilel i reyob Judá pejtél yan tac ba i melbal Asa yic'ot bajche' tsi' mele tejclum tac. Che' ñoxix tsa' caji

i tejchel i c'amajel i yoc. ²⁴Tsa' chami Asa. Tsa' mujqui ba' mucul i ñojte'elob ya' ti' tejclum David. Josafat i yalobil tsi' ch'ambe i ye'tel i tat.

I yumantel Nadab

²⁵Che' ñumenix jump'ejl jab i yumantel Asa, tsa' wa'choconti ti rey Nadab i yalobil Jeroboam ya' ti Israel. Tsi' cha'le yumal cha'p'ejl jab. ²⁶Tsi' cha'le jontolil ti' wut lac Yum che' bajche' i tat. Tsi' ch'ujutesa dios tac. Tsi' xiq'ui ti mulil jini israelob.

²⁷Baasa (i yalobil Ahías i p'olbal Isacar) tsa' caji i contrajin Nadab. Nadab tsi' p'ayal majlel jini israelob ti guerra ya' ti Gibetón, jump'ejl tejclum i cha'an ba' filisteojob. Che' woli ti guerra ti' contra Gibetón, ²⁸Baasa tsi' tsansa Nadab. Tsi' chilbe i yumantel che' i yuxp'ejlel jab i yumantel Asa, jini rey ti Judá. ²⁹Che' ba' ochemix ti rey, Baasa tsi' tsansa pejtél i pi'lob Jeroboam. Ma'anic tsa' cale mi juntiquilic. Che'i tsa' ts'actiyi i t'an lac Yum tsa' ba' subenti jini x'alt'an Ahías ch'oyol ba' ti Silo. ³⁰Che'ach tsa' ujti cha'an ti' caj i mul Jeroboam, cha'an tsi' xiq'ui ti mulil jini israelob. Tsi' techbe i mich'ajel lac Yum i Dios Israel.

³¹Laj ts'ijbubil ti' juñilel i reyob israelob chuqui tsa' ujti che' ba' tsi' cha'le yumal Nadab. ³²Ma'anic tsa' lajmi guerra ti' tojlel Asa yic'ot Baasa jini rey ti Israel.

I yumantel Baasa

³³Che' ti' yuxp'ejlel jab i yumantel Asa, rey ba' ti Judá, tsa' wa'choconti Baasa (i yalobil Ahías) ti' rey jini israelob ya' ti Tírsa. Tsi' cha'le yumal champ'ejl i cha'c'al (24) jab. ³⁴Tsi' cha'le jontolil ti' wut lac Yum. Tsi' mele che' bajche' i melbal Jeroboam. Tsi' xiq'ui jini israelob cha'an mi' ch'ujutesañob dioste' tac.

16 Lac Yum tsi' sube jini x'alt'an Jehú (i yalobil Hanani) cha'an mi' cha' suben Baasa: ²Tsa calq'ueyet a ñuclel, Baasa, che' mach cambiletic. Tsac wa'chocoyet ti' yum israelob, pero lajal tsa' mele che' bajche' Jeroboam. Tsa' xiq'ui ti mulil israelob. Tsa' techbeyon c mich'ajel cha'an cabal a mul. ³Wale mi caj c jisan a p'olbal che' bajche' tsac jisabe i p'olbal Jeroboam. ⁴⁻⁷Jini a pi'lob mu' ba' i chamelob ti tejclum mi caj i c'uxtalob ti ts'i'. Jini mu' ba' i chamelob

ti jochol ba lum, jini xta'jol mi caj i c'uxob, che'en lac Yum. Che'ach tsa' subenti Baasa come tsi' techbe i mich'ajel lac Yum cha'an ti' caj i jontolil. Anquese lac Yum tsi' jisa i p'olbal Jeroboam cha'an ti' caj i mul, lajal tsi' cha'le jontolil Baasa che' bajche' Jeroboam. Tsa' chami Baasa. Ya' tsa' mujqui ti Tirsa. Ts'ijbubil ti' juñilel i reyob Israel jini yan tac ba i melbal Baasa yic'ot chuqui tsa' ujti ti' tojlel. Tsa' ochi ti rey i yalobil i c'aba' Ela.

I yumantel Ela yic'ot Zimri

⁸Che' ti wacp'ejl i cha'c'al (26) jab i ye'tel Asa i rey Judá, tsa' caji ti yumantel Ela (i yalobil Baasa) ti Israel. Tsi' cha'le yumal cha'p'ejl jab ya' ti Tirsa. ⁹An i winic Ela i c'aba' Zimri am ba ti' wenta lamital jini xñijca carretajob. Zimri tsa' caji i tem i t'an yic'ot i winicob cha'an mi' chilben i ye'tel Ela. Ti jump'ejl q'uin ya'an jini rey ti' yotot Arsa ya' ti Tirsa. Jini Arsa jiñach jini x'ac' e'tel ti' yotot rey. Che' woli' yac'an jini rey, ¹⁰tsa' c'oti Zimri i lowe'. Tsi' tsansa. Che' jini tsi' yotsa i ba ti rey ti Israel che' ti' wucp'ejl i cha'c'al (27) i jabilel i yumantel jini Asa am ba ti Judá.

¹¹Zimri tsi' tsansa pejtél i pi'lob jini rey Ela, yic'ot pejtelel i caña ba ja'el. Ma'anic tsa' cale mi juntiquilic winic. ¹²Zimri tsi' laj jisa pejtelel i pi'lob Baasa che' bajche' lac Yum tsi' sube jini x'alt'an Jehú. ¹³Tsa' ujti pejtél iliyi cha'an ti' caj i mul Baasa, ti' caj i mul i yalobil i c'aba' Ela. Tsi' xiq'uiyob ti mulil israelob cha'an mi' ch'ujutesañob dioste' tac. Tsi' techbeyob i mich'ajel lac Yum i Dios Israel. ¹⁴Ts'ijbubil ti' juñilel i reyob Israel pejtél i melbal Ela.

¹⁵⁻¹⁶Wucp'ejl jach q'uin tsi' cha'le yumantel Zimri. Jini soldadojob israelo' ba woliyob ti guerra ti' contra Gibetón, jump'ejl tejclum i cha'an filisteojob, che' ba tsi' yubiyob chamenix i rey come Zimri tsi' tsansa. Tsi' temeyob i t'an cha'an mi' yotsañob ti rey Omri, i yum soldadojob. ¹⁷Jini cha'an Omri tsi' paya majlel jini soldadojob año' ba ti Gibetón. Tsa' majli i joy mactañob Tirsa i tejclum jini rey. ¹⁸Che' ba tsi' q'uele Zimri tsa'ix chijli jini tejclum, tsa' ochi ti mal jini colem ba i yotot. Tsi' tsuc'u ti c'ajc. Ya' tsa' chami ti c'ajc. ¹⁹Come Zimri tsi' cha'le jontolil che' bajche' Jeroboam ja'el. Tsi' ch'ujutesa dioste' tac. Tsi' xiq'ui ti mulil jini israelob. ²⁰Ochem

ti' juñilel i reyob israelob yan tac ba i melbal Zimri yic'ot bajche' tsi' mele ti' tojlel Ela.

I yumantel Omri

²¹Tsi' t'oxoyob i ba jini israelob ti cha'mojt. Ojlil tsi' tsajcayob Omri. Ojlil tsi' tsajcayob Tibni (i yalobil Ginat). ²²I winicob Omri tsa' maɟliyob i cha'an. Tsa' tsansanti Tibni. Tsa' ochi ti rey Omri. ²³⁻²⁴Che' ñumenix lujump'ejl i cha'c'al (30) jab i yumantel Asa ti Judá, tsa' caji ti yumantel Omri ti Israel. Wacp'ejl jab tsi' cha'le yumal ya' ti Tirsá. Wacp'ejl jab tsi' cha'le yumal ti Samaria. Tsi' mañal jini wits i c'aba' Samaria am ba i yum i c'aba' Semer. Tsi' tojbe lujump'ejl i yuxc'al mil (50,000) peso. Tsi' mele tejclum ya'i. Tsi' yotsabe i c'aba' Samaria cha'an mi' ña'tantel i c'aba' Semer.

²⁵Cabal tsi' cha'le jontolil Omri ñumen bajche' yamba reyob. ²⁶Tsi' ch'ujutesa dioste' tac che' bajche' Jeroboam. Tsi' xiq'ui jini israelob ti lajal ba mulil. Tsi' techbeyob i mich'ajel lac Yum i Dios Israel. ²⁷Ts'ijbubil ti' juñilel i reyob israelob jini yan tac ba i melbal Omri. ²⁸Che' ba tsa' chami Omri tsa' mujqui ya' ti Samaria. I yalobil i c'aba' Acab tsi' ch'ambe i ye'tel ti rey.

I yumantel Acab

²⁹Che' ñumenix waxaclujump'ejl i cha'c'al (38) jab i yumantel Asa ti Judá, tsa' caji ti yumantel Acab. Acab tsi' cha'le yumantel cha'p'ejl i cha'c'al (22) jab ti Samaria. ³⁰Pero tsi' mele jontolil ti' wut lac Yum ñumen bajche' pejtelel i reyob Israel. ³¹Mach jinic jach, pero tsi' cha'le ñuc ba mulil che' ba tsi' paya Jezabel cha'an i yijñam. Jiñach i yixic'al Etbaal i rey sidoñob. Acab tsa' caji i ch'ujutesan Baal. ³²Ñaxan tsi' melbe i yotlel yic'ot i pulantib Baal ya' ti Samaria. ³³Ti wi'il tsa' caji i mel yan tac ba dioste'. Ñumen tsi' techbe i mich'ajel lac Yum i Dios Israel che' bajche' yaño' ba i reyob Israel. ³⁴Che' woli ti yumantel Acab, juntiquil winic ch'oyol ba ti Betel i c'aba' Hiel tsi' cha' mele Jericó. Che' ba tsi' melbe i ts'ajquil i yebal otot, tsa' chami Abiram jini ascuña ba i yalobil. Che' ba tsi' melbe i ti' tac tejclum, tsa' chami Segub, jini ijts'iñal ba i yalobil. Che' jini tsa' ujti che' bajche' lac Yum tsi' sube Josué (i yalobil Nun).

Elías tsi' wan subu jini jajmel

17 Elías jini x'alt'an ch'oyol ba ti Galaad tsi' sube jini rey Acab: Melel mic subeñet come mic bac'ñan lac Yum i Dios Israel, jini cuxul ba Dios mu' ba c ch'ujutesan. Mic melben i ye'tel. Ma'anic mi' cajel ti ch'an tilel ja'al mi ye'ebic ti ili jabil tac jinto mic cha' ac' c t'an. Che' tsi' ya'la Elías. ²⁻³Lac Yum tsi' sube Elías: TATS'Λ a ba ilayi. Cucu ti' tojel i pasibal q'uin. Ajñen ba'an i xac' jini Jordán ja' i c'aba' Querit. ⁴Japben i ya'lel jini pa'. C'uxu chuqui mi' ch'ambeñet c'otel jini x'ac'xi', come tsa'ix caq'ue mandar cha'an mi' we'sañet, che'en lac Yum. ⁵Che'ach tsi' mele Elías che' bajche' lac Yum tsi' sube. Ya' tsa' ajni lac'al ti' ti' pa' i c'aba' Querit ti' tojel Jordán ba' mi' pasel q'uin. ⁶Jini x'ac'xi' tsi' ch'ambe c'otel waj yic'ot we'elal ti sac'ajel ti ic'ajel. Tsi' japa ja' ya' ti pa'. ⁷Che' ñumenix cabal q'uin tsa' tiqui jini pa', come jamal to pañimil. Tsa' lajmi ja'al che' bajche' tsi' ya'la Elías.

Elías yic'ot jini meba' x'ixic

⁸⁻⁹Lac Yum tsi' sube Elías: Cucu ti tejclum ya' ti Sidón i c'aba' Sarepta. Ajñen ya'i. Tsa'ix c sube juntiquil meba' x'ixic cha'an mi' we'sañet, che'en lac Yum. ¹⁰Jini cha'an tsa' majli Elías ti Sarepta. Che' ba tsa' c'oti ti ochibal ti Sarepta, ya'an meba' x'ixic woli ba i tempan si'. Tsi' c'ajtibe jump'ejl tsima ja'. ¹¹Che' woli' majlel jini x'ixic cha'an mi' ch'amben tilel ja', Elías tsi' sube: Awocolic ch'ambeñon tilel ja'el ts'ita' waj cha'an mij c'ux, che'en. ¹²Jini x'ixic tsi' jac'Λ: Melel chuqui mic subeñet come mic bac'ñan a Yum Dios. Ma'anic mi ts'ita'ic waj ti cotot. Cojach an c cha'an junmujch' harina ya' ti' poq'uul c waj, yic'ot ts'ita' aceite ya' ti' yajñib. Tsa' tili c tempan majlel ts'ita' si' cha'an mic mel jini waj cha'an mij c'ux junyajl jach yic'ot calobil. Che' jini mi caj c chamel lojon ti wi'ñal, che'en jini meba' x'ixic.

¹³Pero Elías tsi' sube: Mach a cha'len baq'uen. Cucu, melbeñon ts'ita' waj. Ch'ambeñon tilel cha'an mij c'ux. Ñaxañon, ti wi'il jatetla. ¹⁴Come lac Yum i Dios Israel tsi' ya'la ma'anic mi' caj ti sa'jlel jini harina am ba ti' poq'uul. Ma'anic mi' caj ti jilel jini aceite ya' ti' yajñib jinto mi' cha' choc tilel ja'al lac Yum, che'en Elías. ¹⁵Jini cha'an jini x'ixic tsi' mele

che' bajche' tsi' sube Elías. Cabal q'uin tsi' cha'le we'el Elías ti' yotot jini x'ixic yic'ot i yalobil. ¹⁶Ma'anic tsa' sɔjli jini harina am ba ti' poq'uil. Ma'anic tsa' jili jini aceite am ba ti' yajñib, che' bajche' tsi' sube Elías.

¹⁷Pero ti jump'ejl q'uin tsa' caji ti c'am'an i yalobil jini meba' x'ixic. Tsa' juch'i. Tsa' chami. ¹⁸Jini x'ixic tsi' sube Elías: Jatet i winiquet ba Dios, ¿chuqui tsac melbeyet? ¿Tsa' ba tiliyet cha'an ma' tsictesabeñon c mul, cha'an ma' wac' ti chamel jini calobil? che'en. ¹⁹Elías tsi' jac'la: Aq'ueñon a walobil, che'en. Elías tsi' loch' mec'be i yalobil jini x'ixic. Tsi' meq'ue majlel ya' ti' cha'lajmlel otot ba' mi' wɔyel. Tsi' ñolchoco jini ch'ujlelal ti' wɔyib. ²⁰Ti c'am ba t'an tsi' pejca lac Yum ti oración: C Yum Dios, ¿chucoch tsa' tsansabe i yalobil ili x'ixic wa' ba' jiklemon? che'en. ²¹Uxyajl tsi' pacchoco i ba ti' pam jini alob. Ti c'am ba t'an tsi' cha' pejca lac Yum: C Yum Dios, awocolic mij c'ajtibeñet, cha' otsaben i ch'ujlel ti' bac'tal, che'en. ²²Lac Yum tsi' yubibe i yoración Elías. Tsa' cha' juli i ch'ujlel. Tsa' cha' cuxtiyi jini alob. ²³Che' jini Elías tsi' cha' pɔɔɔ jubel ba'an i ña'. Tsi' yala: Q'uele a walobil, cha' cuxulix, che'en. ²⁴Jini meba' tsi' jac'la: Wale kujil i winiquet Dios. Tilem ti Dios chuqui ma' wal, che'en.

Elías tsa' sujti i q'uel Acab

18 Ñumenix uxp'ejl jab lac Yum tsi' sube Elías: Cucu ba'an Acab. Suben mi caj c cha' choc tilel ja'al, che'en. ²Jini cha'an Elías tsa' majli i suben Acab. Ti jim ba ora wen woli wi'ñal ya' ti Samaria. ³⁻⁴Abdías jiñach x'ac' e'tel ti' yotot Acab. Abdías tsi' wen tsajca lac Yum. Che' ba tsi' ñopo i tsansan jini x'alt'añob i cha'an lac Yum jini Jezabel, Abdías tsi' colta jo'c'al x'alt'añob. Tsi' t'oxoyob ti cha'mojt, ti lujuntiquil i yuxc'al (50) tac. Tsi' mucuyob ti ch'en. Tsi' yaq'ueyob chuqui mi' c'uxob yic'ot chuqui mi' japob. ⁵Tsa' tili Elías cha'an mi' q'uel Acab ti jini jach ba q'uin che' woli' loq'uel i saclañob ja'. Jini rey tsi' sube Abdías: Cucu ti ñumel ti pejtelel lum. Yom ma' saclan jam ba'an pa' am ba i ya'lel, ame laj chamic clac' ti wi'ñal. ⁶Tsi' t'oxoyob i ba cha'an mi' pam ñumelob ti lum. Tsa' majli Acab ti jump'ejl bij. Abdías tsa' majli ti yamba bij. ⁷Che' woli' majlel Abdías tsa' c'oti Elías i taj. Abdías tsi' claña ti ora. Tsi' ñocchoco i ba ti' tojel. Tsi' yala: ¿Mach ba

jatetic, c yum Elías? che'en. ⁸Elías tsi' jac'Λ: Joñon cu. Cucu, suben a yum: “WΛ'ix an Elías”. Che' yom ma' suben, che'en. ⁹Pero Abdías tsi' jac'Λ: ¿Chuqui c mul cha'an ma' chocon majlel ba'an Acab cha'an mi' tsansañoñ? ¹⁰Melel chuqui mic subeñet, come mic bac'ñan lac Yum Dios. Jini rey tsi' choco majlel winicob ti pejtelel colem tejclum ti pejtelel i lumal cha'an mi' saclañet. Che' bΛ tsi' subeyob: “Mach wΛ'ic an Elías ilayi”, che'ob, jini rey Acab tsi' wersa subeyob cha'an mi' wa'chocoñoñ i t'an ti' tojlel Dios. ¹¹Awilan wolix a subeñoñ: “Cucu, suben a yum: WΛ'ix an Elías”, che'et. ¹²Pero che' mic majlel, jini i yEspíritu lac Yum mi caj i payet majlel ba' ma'anic mic ña'tan. Che' mi' tilel Acab i saclañet, che' ma'anic mi' tajet, mi caj i tsansañoñ, anquese c'ΛΛΛ che' ch'itoñoñ to tsac wen tsajca lac Yum. ¹³¿Maxto ba anic tsa' subentiyet chuqui tsac mele che' bΛ tsi' tsansa jini x'alt'añoñ i cha'an lac Yum jini Jezabel? Tsac subeyob puts'el ya' ti ch'en. Tsac t'oxoyob ti lujuntiquil i yuxc'al. Tsac we'sayob ti waj. Tsa cΛq'ueyob ja'. ¹⁴WΛle wola' subeñoñ: “Cucu, suben jini rey: WΛ'ix an Elías”, che'et. Mi tsac mele bajche' jini, mi caj i tsansañoñ. Che' tsi' yΛΛ Abdías. ¹⁵Pero Elías tsi' jac'Λ: Mi cΛc' c t'an ti' c'aba' lac Yum Dios am bΛ ti panchan come mi cajñel ti' tojlel. Ti wΛle jach mi caj c pasben c bΛ Acab, che'en Elías. ¹⁶Jini cha'an Abdías tsa' majli i suben Acab. Ti ora tsa' tili Acab ba'an Elías.

¹⁷Che' bΛ tsi' q'uele, Acab tsi' sube: ¿Jatet ba woli bΛ a tic'lan Israel? che'en. ¹⁸Elías tsi' jac'Λ: Mach joñonic. Ma'anic wolic tic'lan Israel. Jatet yic'ot a pi'Λlob woli la' tic'lan Israel, come tsa'ix la' ñusabe i t'an lac Yum. Tsa'ix la' tsajca jini dios Baal. ¹⁹WΛle tempan pejtelel israelob. PΛyΛyob majlel ya' ti wits i c'aba' Carmelo, yic'ot jini lujuntiquil i yuxc'al i cha'bajc' (450) x'alt'añoñ i cha'an Baal, yic'ot jini jumbajc' x'alt'añoñ i cha'an Asera mu' bΛ i c'uxob waj ti' wenta Jezabel.

Elías ya' ti Carmelo

²⁰Che' jini Acab tsi' pΛyΛ majlel pejtelel israelob yic'ot jini x'alt'añoñ. Tsi' tempayob ya' ti wits i c'aba' Carmelo. ²¹Elías tsi' c'ajtibeyob: ¿Jayp'ejl to q'uin mi caj la' chan ajñel ti cha'chajp la' pensar? Mi jiñach Dios jini lac Yum, tsajcanla. Mi jiñach lac Yum jini Baal, tsajcanla, che'en. Ma'anic tsa' mejli i jac'ob.

²²Elías tsi' cha' subeyob: Ma'anic yambΛ x'alt'an i cha'an lac Yum, cojachix joñon, pero an jumbajc' yic'ot lujuntiquil i yuxc'al x'alt'añob i cha'an Baal. ²³Ραυλα tilel cha'cojt tat wacax. Jini x'alt'añob i cha'an bΛ Baal la' i yajcañob juncojt. La' i bic'ti t'ojob. La' i γac'ob ti pam si', pero mach yomic mi' yotsabeñob c'ajc ti' yebal. Jini yambΛ juncojt mi caj c chajpan joñon. Mi caj cac' ti pam si', pero ma'anic mi caj cotsaben c'ajc, che'en. ²⁴Yom mi la' pejcan la' dios. Mi caj c pejcan c Yum ja'el. Jini dios mu' bΛ i jac', mu' bΛ i choc tilel c'ajc jiñach Dios, che'en. Ti pejtelelob tsi' γαλυob che'ach yom.

²⁵Elías tsi' subeyob jini x'alt'añob i cha'an bΛ Baal: Yajcanla juncojt wacax, chajpanla. Ñaxañetla, come cabaletla. Pejcan la' dios Baal, pero mach yomic mi la' wotsan c'ajc ti' yebal i majtan, che'en. ²⁶Che' jini tsi' ch'αμγob jini tat wacax tsa' bΛ i γαq'ueyob. Tsi' pejcayob Baal ti sac'ajel c'αλλ ti xinq'uiñil. Tsi' γαλυob: Baal, jac'beñon lojon, che'ob. Pero ma'anic tsi' jac'Λ. Tsi' cha'leyob tijp'el ti' joytilel i pulantib i majtan Baal. ²⁷Che' xinq'uiñilix, Elías tsa caji i wajleñob: Ñumen tsats yom mi la' pejcan, come jiñach a dios. Tic'αλ mi woli ti t'an yic'ot i pi'lob o woli' mel i ye'tel o majlem ti bij, o wαγλ. Yom mi la' ñijcan ch'ojyel, che'en Elías. ²⁸Tsa' utsi cajiyoj ti c'am bΛ t'an. Tsi' lowoyob i bΛ ti cuchillo yic'ot lanza tac che' bajche' i tilel mi' melob jinto tsa' bejq'ui i ch'ich'el. ²⁹Tsa' ñumi xinq'uiñil. Tsi' chΛn cha'leyob oñel c'αλλ tsa' bajli q'uin che' ti' yorajlel pulo' majtañal. Ma'anic tsi' jac'Λ. Ma'anic t'an. Ma'anic c'ajc.

³⁰Tsi' γαλ Elías: Lac'tesan la' bΛ tic tojlel, che'en. Tsi' lac'tesayob i bΛ. Elías tsi' cha' melbe i pulantib i majtan Dios, come jejmenix. ³¹Tsi' ch'αμλ lajchαmp'ejl xajlel jujump'ejl i wentajlel jujunmojt i p'olbal Jacob, jini Jacob tsa' bΛ cha' otsabenti i c'aba' Israel che' bajche' tsi' γαλ Dios. ³²Elías tsi' c'αñλ jini xajlel tac ti' melol jump'ejl pulantib cha'an mi' c'uxbintel i c'aba' lac Yum. Tsi' mele i bijlel yoc ja' ti' joytalel che' bajche' i tamlel cha'cujch pac'. ³³Tsi' ts'αλλ jini si'. Tsi' jacu jini tat wacax. Tsi' γac'Λ ti pam si'. ³⁴Tsi' c'ajti tilel chαmp'ejl uc'um ja'. Tsi' subeyob: Mulu jini majtañal am bΛ ti pam si', che'en. Che'ach tsi' cha'leyob. Tsi' γαλ: Cha' mele, che'en. Tsi' cha' meleyob. Tsi' γαλ: Cha' mele, che'en. Tsi' cha' meleyob ti' yuxyajlel. ³⁵Tsa' ts'ajmi jini ja' ti' joytalel i pulantib majtañal. Tsa' bujt'i i yoc ja'lel.

³⁶Che' bΛ tsa' c'oti i yorajlel cha'an mi' pulbentel i majtan lac Yum, tsi' lΛc'tesa i bΛ Elías. Tsi' yΛΛΛ: C Yum, i Dioset bΛ Abraham yic'ot Isaac yic'ot Israel, la' tsictiyic wale a winicon ti isujm. Tsac laj mele che' bajche' tsa' subeyon. ³⁷Jac'beñon c t'an. La' i cΛñetob ili winicob, come jatet jach Dioset, c Yumet lojon. La' ñijcΛbenticob i pusic'al cha'an mi' cha' sutq'uiñob i bΛ ba'añet, che'en. ³⁸Tsa' bΛc' tili c'ajc chocbil tilel ti lac Yum. Tsa' puli i majtan Dios yic'ot si' yic'ot xajlel yic'ot lum. Jini ja' tsa' laj tsΛc'mi. ³⁹Che' bΛ tsi' q'ueleyob pejtel jini winicob, tsi' pΛcchocoyob i bΛ. Tsi' yΛΛyob: Lac Yum jiñach Dios, lac Yum jiñach Dios, che'ob. ⁴⁰Elías tsi' yΛΛΛ: Chucula i winicob Baal cha'an ma'anic mi' puts'elob mi juntiquilic, che'en. Tsi' chucuyob. Elías tsi' pΛyΛ majlel jini x'alt'añob i cha'an Baal ya' ti pa' i c'aba' Cisón ba' tsi' tsΛnsayob ti pejtelelob.

Elías tsi' c'ajti ja'al

⁴¹Elías tsi' sube Acab: Cucux ti a wotot. Cha'len we'el uch'el, come tsiquil i t'an ja'al woli bΛ tilel, che'en. ⁴²Acab tsa' majli ti we'el uch'el. Elías tsa' letsi ti wits i c'aba' Carmelo. Tsi' ñocchoco i bΛ ti lum ti oración. Tsi' yΛc'Λ i wut ti' pix. ⁴³Tsi' sube jini x'e'tel i cha'an: Cucu, q'uele ya' ba' mi' bΛjlel q'uin, che'en. Tsa' majli i q'uel. Ma'anic chuqui tsiquil. Wucyajl tsi' sube Elías cha'an mi' majlel i q'uel. Wucyajl tsa' majli. ⁴⁴Tsi' yΛΛΛ: Tsaj q'uele che'Λch wistΛl total che' bajche' i patstilel i c'Λb winic. Woli' loq'uel letsel ti colem ñajb, che'en. Jini cha'an tsi' sube: Cucu suben Acab: "Chajpan a carreta. Cucu ti ora, ame i mΛctañet ti bij jini colem ja'al". Che'Λch yom ma' suben, che'en Elías. ⁴⁵Ti ora tsa' mΛjqui jini panchan ti total wets'bil tilel ti ñuqui ic'. Tsa' wen tili ja'al. Acab tsa' majli ti carreta ti' bijlel Jezreel. ⁴⁶Lac Yum tsi' wen p'Λtesa Elías. Tsi' cΛchΛ i bΛ. Ñaxan tsi' cha'le ajñel majlel Elías ti' tojlel i carreta Acab c'ΛΛΛ tsa' c'oti ti Jezreel.

Elías tsa' puts'i majlel ti Horeb

19 Acab tsi' sube Jezabel pejtel chuqui tsi' mele Elías yic'ot bajche' tsi' tsΛnsa ti espada jini x'alt'añob i cha'an Baal. ²Che' jini Jezabel tsi' choco majlel x'ac'jun ba'an Elías. Tsi' yΛΛΛ: Mi caj c tsΛnsañet che' bajche' tsa' tsΛnsa yañob' bΛ. Ijc'Λl chΛmeñetix che' bajche' ili ora. Machic jini, joñon

mic ch'am tic wenta cha'an mic toj ti' tojlel c dios, che'en.

³Elías tsi' bac'ña. Tsa' puts'i cha'an ma'anic mi' tsansantel. Tsa' c'oti ti Beerseba am ba ti Judá. Ya' tsi' caya i winic.

⁴Tsa' majli ti ñajt ba i tiquiñal pañimil jump'ejl q'uin ti xañol. Tsa' c'oti ti buchtal ti' yebal juntej c te' i c'aba' enebro. Tsi' cha'le oración cha'an mi' chamel. Tsi' yala: Jasalix, c Yum, tsansañoñix, come mach ñumen weñonic bajche' c ñojte'el, che'en. ⁵Tsa' ñole ti' yebal jini enebro. Tsa' wayi. Juntiquil ángel tsi' ñijca. Tsi' sube: Ch'ojyen, c'uxu a waj, che'en. ⁶Tsi' q'uele ya'an ti' tojel i jol junq'uejl colem ba waj tic'an ba yic'ot jump'ejl tsima ja'. Tsi' c'uxu, tsi' japa, tsa' cha' wayi. ⁷I yáñgel lac Yum tsa' cha' tili ba'an. Tsi' sube: Ch'ojyen, c'uxu a waj, come wen ñajt baqui ma' majlel, che'en. ⁸Tsa' cha' ch'ojyi. Tsi' c'uxu waj, tsi' japa ja'. Tsa' wen p'at'a che' ba tsi' c'uxu waj. Tsi' xañal majlel cha'c'al q'uin cha'c'al ac'alel c'alal tsa' c'oti ti Horeb, i wits Dios.

⁹Ya' tsa' ochi ti ch'en ba' tsi' ñusa jump'ejl ac'alel. Tsa' c'oti i t'an lac Yum ti' tojlel: ¿Chuqui woli a mel ilayi? che'en. ¹⁰Elías tsi' jac'la: Tsac wen melbeyet a we'tel i Yumet ba Panchan yic'ot Pañimil. Jini israelob tsi' laj tsansayob jini x'alt'añoob a cha'an ti oñiyi c'alal wale. Tsi' c'ayayob jini xuc'ul ba a t'an. Tsi' jemeyob i pulantib a majtan. Tsi' tsansayob x'alt'añoob a cha'an. C bajñel jach tsa' c'aleyon. Woli' saclañoñoob ja'el cha'an mi' tsansañoñoob, che'en. ¹¹Lac Yum tsi' jac'la: Loq'uen ti pam lum. Wa'i' ti jini wits ti' tojel c wut, che'en. Awilan tsa' ñumi lac Yum ya'i. Jump'ejl tsats ba ic' tsi' jawa jini wits. Ti' p'at'alel Dios tsa' tojp'i xajlel, pero mach ya'ic an lac Yum ya' ti jini ic'. Tsa' tili i yujquel lum, pero mach ya'ic an lac Yum ti jini yujquel. ¹²Tsa' tili c'ajc, pero mach ya'ic an lac Yum ti c'ajc. Che' ba tsa' ujti jini, tsa' tili c'un ba t'an. ¹³Che' ba tsi' yubi Elías, tsi' maca i wut ti pisil. Tsa' wa'le ti' ti' jini ch'en. Che' jini tsa' caji' yubiben i t'an juntiquil: ¿Chuqui woli a mel ilayi, Elías? che'en. ¹⁴Tsi' jac'la: Tsac wen melbe i ye'tel c Dios i Yum Panchan yic'ot Pañimil, pero jini israelob tsi' c'ayayob jini xuc'ul ba a t'an. Tsi' jemeyob i pulantib a majtan. Tsi' tsansayob jini x'alt'añoob a cha'an. C bajñel jax tsa' c'aleyon. Woli' saclañoñoob ja'el cha'an mi' tsansañoñoob, che'en.

¹⁵Lac Yum tsi' sube: Cha' sujten majlel ti' bijlel Damasco ba' tiquin pañimil. Che' ma' c'otel mi' caj a wa'chocon

jini Hazael cha'an mi' yochel ti rey ti Siria. ¹⁶Yom ma' wa'chocon ja'el Jehú (i yalobil Nimsi) cha'an mi' yochel ti' rey israelob. Wa'chocon ja'el Eliseo (i yalobil Safat) ch'oyol ba ti Abelmehola cha'an mi' yochel ti x'alt'an ti a qu'uxol. ¹⁷Mi caj i ch'amelob cabal winicob. Jini mach ba anic mi' tsansantel ti' yespada Hazael, Jehú mi caj i tsansan. Jini mu' ba i puts'el ti' tojlel Jehú, Eliseo mi caj i tsansan. ¹⁸Pero joñon mi caj j cantan jini wucp'ejl mil israelob mach ba anic tsi' ñocchocoyob i ba ti' tojlel Baal, mach ba anic tsi' ts'ujts'uyob, che'en.

Tsa' pajyi Eliseo

¹⁹Che' ba tsa' majli Elías, tsi' taja Eliseo (i yalobil Safat). Woli' c'an ch'ancojt i cha'c'al (24) tat wacax cha'an mi' top' lum. Eliseo an ti wi'ipat. Woli' toj'esan majlel. Elías tsi' moso ti' bajq'uul. ²⁰Eliseo tsi' c'aya jini tat wacax. Ti ajñel tsi' tsajca majlel Elías. Tsi' yala: Awocolic la' ñaxan majlic c ts'ujts'un c tat c ña'. Ti wi'il mi caj c tsajcañet majlel, che'en. Elías tsi' yala: Cucu. Ma'anic wolic ma'ctañet, che'en Elías. ²¹Che' ba tsa' sujti Eliseo, tsi' p'aya majlel cha'cojt tat wacax cha'an mi' tsansan. Tsi' pulu jini arado. Tsi' c'aña cha'an mi' tiq'uesan jini we'elal. Tsi' yaq'ueyob cha'an mi' c'uxob jini año' ba ti tejclum. Ti wi'il tsa' caji i tsajcan majlel Elías. Che' jini Eliseo tsa' ochi ti xcant'an ti' tojlel Elías.

Acab tsi' jisa jini siriajob

20 Benadad jini rey ti Siria tsi' tempa pejtelel i soldadojob. Tsi' p'ayayob majlel yic'ot lajch'antiquil i cha'c'al (32) reyob, yic'ot caballo, yic'ot carreta. Che' jini tsi' joy ma'ctayob Samaria cha'an mi' jisañob. ²Benadad tsi' choco majlel suboñel ti Samaria cha'an mi' subeñob Acab jini rey ti Israel: ³Ubin chuqui mi' yal Benadad: “C cha'añach a plata, yic'ot a woro, yic'ot i t'ojol jax ba a wijñamob, yic'ot jini uts'at ba ch'iton ba a walobilob”, che'en. ⁴Acab jini rey ti Israel tsi' jac'a: C yumet, c reyet, isujm bajche' ma' wal. A cha'añon. A cha'añach pejtel c chub'an ja'el, che'en Acab. ⁵Tsa' cha' c'otiyob i subeñob Acab: Ubin chuqui mi' yal Benadad: “Aq'ueñon a plata, yic'ot a woro, yic'ot a wijñamob, yic'ot ch'iton ba a walobilob. ⁶Ijc'al che' bajche' ti ili ora mi

caj c choc tilel c winicob cha'an mi' tsajiñob a wotot yic'ot i yototob a winicob. Mi caj i ch'λmbeñon tilel pejtel jini ñuc tac bλ i c'λjñibal". Che' tsi' yλλ Benadad, che'en jini suboñel.

⁷Che' jini i rey Israel tsi' pλyλ tilel pejtel xñoxob año' bλ ti Israel. Tsi' subeyob: Awilan, Benadad woli' tech leto. Ma'anic tsac letsa c t'an che' bλ tsi' c'ajtibeyon quijñamob, yic'ot calobilob, yic'ot c plata, yic'ot coro, che'en Acab. ⁸Pejtelel jini xñoxob yic'ot winicob x'ixicob tsi' jac'λyob: Mach ma' wλc' a t'an. Mach yomic ma' jac', che'ob. ⁹Jini cha'an Acab tsi' sube jini suboñel i cha'an bλ Benadad: Yom ma' suben Benadad: "Tsa cλc'λ c t'an che' ti ñaxan. Pero jini woli bλ a c'ajtibeñon wale ma'anic mi caj i yujtel". Che' yom mi la' suben, che'en Acab. Jini suboñel tsa' sujti i suben i yum chuqui tsi' yλλ Acab. ¹⁰Benadad tsi' cha' choco ti subentel Acab: La' i p'ajoñob c diosob mi ma'anic tsa' mejli c jisan Samaria, che'en. ¹¹Acab jini rey ti Israel tsi' choco majlel i q'uexol i t'an: Yom ma' suben Benadad: "¿Yom ba ma' chañ'esan a bλ che' maxto tsiquilic mi mux i majlel a cha'an?" che'en. ¹²Tsa' subenti Benadad ili t'an che' woli' jap lembal yic'ot i reyob ya' ti lejchempat. Ti ora tsi' cha'le mandar cha'an mi' majlelob jini soldadojob i techob guerra ti' contra Samaria. Che'i tsi' meleyob.

¹³Awilan juntiquil x'alt'an tsa' c'oti ba'an Acab jini rey ti Israel. Tsi' sube: Jiñλch i t'an lac Yum: "¿Mu' ba a q'uel jini motocña bλ soldadojob? Mi caj cotsañob ti a wenta cha'an mi' yumañetob. Che' jini mi caj a ña'tan joñon a Yumon", che'en lac Yum. Che' tsi' yλλ jini x'alt'an. ¹⁴Acab tsi' c'ajtibe: ¿Majqui mi caj i cha'len guerra yic'otob? che'en. Jini x'alt'an tsi' jac'λ: Jini ch'iton winicob mu' bλ i coltañob año' bλ i ye'tel, che'en. Acab tsi' yλλ: ¿Majqui mi caj i tech guerra? che'en. Jini x'alt'an tsi' jac'λ: Jatet mi caj a tech guerra, che'en. ¹⁵Che' jini Acab tsi' pλyλ lujunc'al yic'ot lajchλntiquil i cha'c'al (232) ch'iton winicob. Ti wi'il tsa' tili jini winicob israelob, wucp'ejl mil ti pejtelel.

¹⁶Benadad woli' jap lembal yic'ot jini lajchλntiquil i cha'c'al (32) reyob tsa' bλ i temeyob i t'an cha'an mi' coltañob. Che' ti xinq'uiñil tsa' loq'uiyob majlel ti guerra i soldadojob Acab. ¹⁷Ñaxan tsa' loq'uiyob ti Samaria jini ch'iton winicob. Tsa' subenti Benadad cha'an tsa'ix loq'ui junmojt ti Samaria.

¹⁸Benadad tsi' yʌʌ: Mi tsa' loq'uiyob tilel cha'an mach yomobic guerra, chucula. Mi tsa' loq'uiyob tilel cha'an guerra, chucula. Mach la' tsansañoob, che'en.

¹⁹⁻²⁰Ñaxan tsa' loq'uiyob ti Samaria jini ch'iton winicob. Tsa' majliyob soldadojob ti' pat ch'iton winicob. Ti jujntiquilob tsi' tsansayob i contra. Tsa' puts'iyob jini siriajob. Jini israelob tsi' yajñesayob. Benadad jini rey ti Siria tsa' puts'i ti caballo yic'ot lamital xc'achta caballojob. ²¹Che' jini Acab tsa' c'oti i chucben i caballo yic'ot carreta tac. Tsi' wen jisa jini siriajob.

²²Tsa' c'oti jini x'alt'an ba'an Acab. Tsi' sube: Yom ma' wen chajpan a soldadojob yic'ot a lumal. Wen ña'tan bajche' yom ma' mel. Che' bajche' ili ora ti yambʌ jabil jini rey ti Siria mi caj i cha' tilel i tech guerra ti a contra, che'en.

²³I winicob Benadad tsi' subeyob i yum: I dios israelob mi' yajñel ti bujtʌ tac. Jini cha'an tsa' mʌjli i cha'añoob. Yom mi lac majlel ti guerra ya' ti joctʌ cha'an mi' mʌjlel lac cha'an. ²⁴Anto yambʌ yom bʌ ma' mel. Chilbeñoob i ye'tel jini reyob ti' tojlel soldadojob a cha'an. Wa'chocon yambʌ yumʌlob ti' q'uexol cha'an mi' ch'ʌmbeñoob i ye'tel. ²⁵ʌyʌ tilel yambʌ soldadojob i q'uexolob tsa' bʌ sajtiyob cha'an cha' cabʌlonla che' bajche' ti ñaxan. ʌyʌ tilel jini yujilo' bʌ c'achʌl ti caballo. Cha' mele carreta tac che' bajche' ti ñaxan. Yom mi lac majlel ti guerra ti joctʌ. Che' jini mux i mʌjlel lac cha'an, che'ob. Benadad tsi' wen ubibeyob i t'an. Che'ʌch tsi' mele.

²⁶Ti yambʌ jab Benadad tsi' cha' tempa jini siriajob. Tsi' ʌyʌyob majlel ti Afec cha'an mi' techob guerra ti' contra israelob. ²⁷Jini israelob ja'el tsi' tempayob i bʌ ti mojt ti mojt. Tsoltsoña tsa' caji ti majlel jini israelob c'ʌʌʌ tsi' tajayob i bʌ yic'ot siriajob. Che' yilalob israelob bajche' cha'mojt aʌ chivo ti' tojlel i contrajob, come wen witsilob jini siriajob. ²⁸I winic Dios tsa' cha' c'oti ba'an Acab jini rey ti Israel. Tsi' sube: Chocbilon tilel ti Dios cha'an mic subeñet: “Jini siriajob mi' lon ña'tañoob ya' jach mi' yajñel la' Yum ti bujtʌ tac. Ma'anic mi' yajñel ti joctʌ tac lon che'ob. Jini cha'an mi caj i mʌjlel a cha'an ti' tojlel pejtél jini siriajob cha'an ma' wen ña'tan Dioson”, che'en lac Yum. Che' tsi' yʌʌ x'alt'an. ²⁹Wucp'ejl q'uin laj bʌ añoob jini soldadojob ba' woli' ñajʌ q'uelob i bʌ. Che' ti' wucp'ejlel q'uin tsa' caji jini guerra. Jini israelob tsi' jisayob jo'c'al ti mil siriajob ti jump'ejl jach q'uin. ³⁰I colojbal

tsa' majliyob ti puts'el ba'an i ts'ajquil Afec. Pero tsa' yajli i ts'ajquil. Tsi' tsansa yamba wucp'ejl i cha'c'al mil (27,000).

Benadad tsa' puts'i majlel ti jump'ejl tejclum ba' tsa' ochi ti' mal jump'ejl otot. ³¹I winicob tsi' subeyob Benadad: Tsa'ix la cubi mi' cha'leñob p'untaya jini reyob ti Israel. La' lac lap coxtal. La' laj c'ach lac ba' ti lazo, i yejtal i ch'ijiyemlel lac pusic'al. Conla ba'an Acab cha'an mi laj q'uel mi mu'to i y'aq'uet ti colel, che'ob. ³²Jini cha'an tsa' majliyob ba'an i rey Israel. Tsi' c'ajtibeyob: Awocolic la' colic jini rey Benadad, mach a tsansan, che'ob. Acab tsi' jac'la: ¿Cuxul to ba? Jiñach queran, che'en. ³³Ora jach jini winicob tsi' ña'tayob ma'anic mi caj i y'ac' ti ch'amel Benadad. Tsi' cha' jac'ayob ti ora: Cuxul cu a weran Benadad, che'ob. Acab tsi' subeyob: Cucula, p'ayala tilel, che'en. Che' ba' tsa' c'oti Benadad, Acab tsi' p'aya letsel ti carreta i cha'an. ³⁴Benadad tsi' sube Acab: Mi caj c cha' aq'ueñet jini tejclum tac tsa' ba' i chilbeyet c tat. Che' ja'el mi mejlel a wa'chocon choñoiñibal tac ya' ti Damasco che' bajche' tsi' mele c tat ti Samaria, che'en. Acab tsi' sube: Mux caj j colet, che' jini, che'en. Che' ba' tsi' temeyob i t'an, Acab tsi' colo.

³⁵Che' ujtemix iliyi lac Yum tsi' sube juntiquil x'alt'an cha'an mi' suben i pi'al ti e'tel cha'an mi' lowe'. Che'ach tsi' sube i pi'al, pero ma'anic tsi' jac'la. ³⁶Jini cha'an jini x'alt'an tsi' sube: Tsa' ñusabe i mandar lac Yum. Jini cha'an mi caj i tsansañet bajlum che' ma' c'ayon, che'en. Che'ach tsa' ujtí. Che' ba' tsa' majli, tsi' c'uxu bajlum. ³⁷Jini x'alt'an tsi' sube yamba winic: Lowoyon ti a wespada, che'en. Tsi' jac'la, tsi' lowo.

³⁸Jini x'alt'an tsi' pijta jini rey ya' ti bij. Tsi' mac c'achla i wut ti pisil cha'an ma'anic mi' c'ajñel. ³⁹Che' woli ti ñumel jini rey, jini x'alt'an tsi' pejca: C yum, che' ba' tsajniyon ba' wen woli' yujtel guerra, juntiquil soldado tsi' p'aybeyon tilel juntiquil x'ajchel. Tsi' subeyon: “C'antabeñon jini x'ajchel ame puts'ic. Mi tsa' puts'i, mi caj a tsansantel jatet, o mux caj a tojbeñon jo'p'ejl i cha'c'al mil (25,000) peso”, che'en. ⁴⁰Pero che' woliyon ti e'tel, tsa' puts'i jini x'ajchel, che'en x'alt'an. Jini rey tsi' jac'la: Jiñach a mul. Wersa mi caj a toj, che'en jini rey Acab. ⁴¹Jini x'alt'an tsi' loc'sa jini pisil am ba' ti' wut. Jini rey tsi' caña jiñach x'alt'an. ⁴²Jini x'alt'an tsi' sube: Lac Yum woli' yal: “Tsac ña'ta wersa mi caj i ch'amel jini winic Benadad.

Pero jatet tsa' colo. Jini cha'an wersa mi caj a tsansantel ti' q'uexol jini winic. A winicob mi caj i tsansantelob ti' q'uexol i winicob", che'en lac Yum. Che' tsi' yala jini x'alt'an. ⁴³Jini rey Acab mich' tsa' sujti ti' yotot ya' ti Samaria. Walwalña i pusic'al.

Acab tsi' chilbe i ts'usubil Nabot

21 Tsa' caji' taj i mul Acab ti' tojlel Nabot ch'oyol ba ti Jezreel. An i ts'usubil Nabot ya' ti' tojel i yotot jini rey Acab ti Samaria. ²Acab tsi' sube Nabot: Aq'ueñon a ts'usubil cha'an mic paq'ue yan tac ba pimmel, come lac'al jach an cotot ti' t'ejl. Mi caj caq'ueñet yamba a ts'usubil ñumen wem ba, o mic toj ti taq'uin mi a wom, che'en Acab. ³Nabot tsi' jac'be Acab: La' i coltañon lac Yum. Ma'anic mi caj caq'ueñet i lum c ñojte'el, che'en. ⁴Wen ch'ijyem jax i pusic'al Acab. Wen mich' tsa' cha' sujti ti' yotot cha'an ma'anic tsi' jac'la i chon Nabot jini ch'oyol ba ti Jezreel, come tsi' sube: Ma'anic mi caj caq'ueñet i lum c ñojte'el, che'en. Ma'anix tsi' chlan c'uxu waj Acab. Tsa' majli ti ñolta' ti' wayib. Tsi' mayaj majlel i wut ti' ñac' bojte'.

⁵Jezabel, i yijñam, tsa' c'oti ba' ñolol. Tsi' c'ajtibe: ¿Chuqui woli a pensarin? ¿Chucoch mach a womix we'el? che'en. ⁶Acab tsi' jac'be i yijñam: Cha'an ma'anic tsi' jac'la i chombeñon i ts'usubil Nabot che' ba tsaj c'ajtibe. Tsac sube mi caj caq'uen i q'uexol mi yom, pero tsa' jach i subeyon: "Ma'anic mi caj caq'ueñet c ts'usubil", che'en. Che' tsi' yala Acab. ⁷Jezabel tsi' jac'be: ¿Isujm ba i reyet israelob? Ch'ojoyen, c'uxu a waj. Tijicñesan a pusic'al, come joñon mi caj caq'ueñet i ts'usubil Nabot ch'oyol ba ti Jezreel, che'en.

⁸I yijñam Acab tsi' mele jump'ejl carta ti' c'aba' Acab i ñoxi'al. Tsi' yaq'ue i sellojlel. Che' jini tsi' choco majlel jini carta ba'an jini xñoxob yic'ot año' ba i ye'tel ya' ti' tejclum Nabot. ⁹Jezabel tsi' yala ti carta: Yom mi la' tem cha'len ch'ajb. Yom mi la' pay tilel Nabot cha'an mi la' wa'chocon ti' tojlel i pi'lob. ¹⁰La' tilicob cha'tiquil jontol ba winicob cha'an mi' jop'beñob i mul Nabot. La' i yalob ti' tojel i wut: "Tsa'ix a p'aja Dios yic'ot jini rey". Che' yom mi' yalob. Che' jini yom mi la' choc loq'uel Nabot ti tejclum cha'an mi la' jul ti xajlel cha'an mi' chamel, che'en. ¹¹Jini xñoxob yic'ot jini año' ba i ye'tel ti

tejclum tsi' jac'beyob i t'an Jezabel che' bajche' tsi' subeyob ti jun. ¹²Tsi' yac'ayob i t'an cha'an mi' cha'leñob ch'ajb. Che' jini tsi' pɔɔyob tilel Nabot cha'an mi' wa'chocoñob. ¹³Tsa' c'otiyob jini cha'tiquil jontol ba winicob. Tsa' buchleyob ti' tojlel i wut Nabot. Jini cha'tiquil tsi' yalɔyob: Nabot tsi' p'aja Dios. Tsi' p'aja jini rey, che'ob. Tsi' pɔɔyob loq'uel ti jini tejclum. Tsi' juluyob ti xajlel. Che' jini tsa' chɔmi Nabot. ¹⁴Che' ba ujtemix iliyi tsi' chocbeyob majlel t'an Jezabel: Chɔmenix Nabot cha'an tsa' jujli ti xajlel, che'ob.

¹⁵Che' ba tsi' yubi Jezabel chɔmenix Nabot, ti ora jach tsi' sube Acab: Tejchen ti ora. Cucu ch'ɔmben i ts'usubil Nabot ch'oyol ba ti Jezreel, come chɔmenix i yum jini lum mach ba yomic i chon, che'en. ¹⁶Che' ba tsi' yubi Acab chɔmenix Nabot, ti ora jach tsa' majli i ch'ɔmben i ts'usubil cha'an mi' ch'ɔm ti wenta.

¹⁷⁻¹⁸Pero ti jim ba ora lac Yum tsi' pejca jini x'alt'an Elías: Tejchen ti ora. Cucu q'uele Acab i rey Israel am ba ti Samaria, come ya'ix an ti' ts'usubil jini Nabot. Tsa' majli i ch'ɔm ti wenta. ¹⁹Yom ma' suben ili t'an: “Lac Yum woli' yal: Tsa' tsansa winic. Tsa' chilbe i lum. Ya' ba' tsi' lembe i ch'ich'el Nabot jini ts'i' ya' talob ts'i' i lembeñet a ch'ich'el ja'el”. Che' yom ma' suben, che'en lac Yum. Che'ach tsi' mele Elías.

²⁰Acab tsi' sube Elías: Tsa'ix a cha' tajayon, j contrajet, che'en. Elías tsi' jac'be: Tsa' cu c tajayet, come tsa'ix a wac'ɔa ba cha'an ma' mel chuqui jontol ti' wut lac Yum. ²¹Awilan lac Yum mi caj i chocbeñet tilel tsats ba wocol. Mi caj i wets'et majlel che' bajche' misujelɔ. Mi caj i laj jisan pejtet ch'iton ba a walobilob año' ba ti Israel. ²²Lajal mi caj i melbeñet che' bajche' tsi' melbe Jeroboam (i yalobil Nabat), che' bajche' tsi' melbe Baasa (i yalobil Ahías) cha'an ti' caj tsa' techbe i mich'ajel lac Yum. Tsa' xiq'ui ti mulil jini israelob. ²³Lac Yum tsi' yalɔ mi caj i toj i mul Jezabel ja'el. Jini ts'i' mi caj i c'uxben i bac'tal a wijñam ya' ti Jezreel. ²⁴Mi caj i c'uxbeñob i bac'tal a walobilob mu' ba i chɔmelob ti tejclum. Jini xta'jol mi caj i c'uxbeñob i bac'tal a pi'ɔlob mu' ba i chɔmelob ti jochol ba lum, che'en Elías.

²⁵Come ti isujm ma'anic yamba bajche' Acab tsa' ba i yac'ɔa i ba cha'an mi' mel chuqui jontol ti' wut lac Yum, come i yijñam tsi' xiq'ui ti maña jax ba i melbal. ²⁶Wen jontol bajche'

tsi' mele. Tsi' ch'ujutesa jini dios tac che' bajche' tsi' meleyob jini amorrejob tsa' bΛ i jisayob lac Yum ti' tojlel israelob.

²⁷Acab tsi' yubibe i t'an Elías. Tsi' jet' tsili i pislel. Tsa' caji i lΛp coxtal ti q'uiñil yic'ot ti ac'Λlel. Tsi' cha'le ch'ajb. Wen ch'ijiyem tsa' caji ti ajñel. ²⁸Ti jim bΛ ora lac Yum tsi' cha' pejca jini x'alt'an Elías: ²⁹¿Tsa' ba a q'uele bajche' woli' peq'uesan i bΛ Acab tic tojlel? Cha'an ti' caj tsi' peq'uesa i bΛ tic tojlel, ma'anic mi caj cΛq'uen ili wocol che' cuxul to. Mux caj cΛq'uen wocol i yalobilob Acab, che'en lac Yum.

Micaías tsi' wan tsictesa bajche' mi caj i jisΛntel Acab

(2 Cr. 18.1-34)

22 Uxp'ejl jab ma'anic tsa' ujti guerra ti' tojlelob siriajob yic'ot israelob. ²Che' ti yuxp'ejlel jab, Josafat, jini rey ti Judá, tsa' jubi majlel ba'an jini rey ti Israel. ³Jini rey ti Israel tsa' caji i suben i yaj e'telob: ¿Mach ba la' wujilic lac cha'añach jini tejclum Ramot am bΛ ti Galaad? Ma'anic chuqui woli lac wis cha'len cha'an mi lac chilben jini rey ti Siria, che'en. ⁴Jini cha'an i rey israelob tsi' sube Josafat: ¿A wom ba majlel ti guerra quic'ot cha'an mi lac cha' ch'Λm Ramot am bΛ ti Galaad? che'en. Josafat tsi' jac'Λ: Junlajalonla. C winicob mi mejlel i coltañetob yic'ot j caballo ja'el, che'en. ⁵Josafat tsi' γΛΛ: Ñaxan c'ajtiben lac Yum bajche' yom mi lac mel, che'en.

⁶I rey israelob tsa' caji i tempa jumbaje' x'alt'añob. Tsi' c'ajtibeyob: Subeñon mi yom mic majlel ti guerra ti' contra Ramot ti Galaad, o mi mach yomic, che'en. Jini payxo bΛ x'alt'añob tsi' jac'beyob: Yomcu ma' majlel, come lac Yum mi caj i γΛ' ti a c'Λb, che'ob. ⁷Pero Josafat tsi' γΛΛ: ¿Mach ba anic juntiquil x'alt'an i cha'an lac Yum ilayi cha'an mi mejlel laj c'ajtiben? che'en. ⁸Jini rey ti Israel tsi' jac'be: Ancu juntiquil x'alt'an i cha'an lac Yum, jiñach Micaías (i yalobil Imla). Mu'cu mejlel laj c'ajtiben, pero ts'a' mij q'uel jini winic, come ti pejtelel ora ma'anic mi' subeñon chuqui wen. Jini jach tsats tac bΛ mi' subeñon, che'en. Josafat tsi' sube Acab: Mach ma' cha'len t'an che' bajche' jini. ΡΛγΛ, che'en. ⁹Acab tsi' ρΛγΛ tilel juntiquil i yaj e'tel. Tsi' sube: Cucu ρΛγΛ tilel ti ora Micaías (i yalobil Imla), che'en. ¹⁰Ya' buchul Acab i rey israelob temel yic'ot Josafat jujuntiquil ti' buchlib cha'an i

ye'tel, lɔpbil i cha'añob i pislel rey. Ya' tsa' c'ajpan buchleyob ti' tojel jini patio ba' mi' jajts'el trigo ya' ti' ti' tejclum. Pejtelel jini payxo bɔ x'alt'añob tsi' chɔn cha'leyob alt'an ti' tojlelob.

¹¹Jini Sedequías (i yalobil Quenaana) tsi' chajpa cha'ts'ijt xulub melbil bɔ ti tsucu taq'uin. Tsi' yɔɔɔ: Lac Yum tsi' yɔɔɔ: "Ili xulub i yejtalach a p'atɔlel ti' contra jini siriajob. An i c'ajñibal cha'an mi la' laj jisañob", che'en. ¹²Pejtelel jini payxo bɔ x'alt'añob tsi' temeyob i t'an. Tsi' yɔɔɔyob: Cucula ti Ramot ti Galaad, come mux i majlel a cha'an, come lac Yum tsa'ix i yɔc'ɔ ti la' c'ɔb, che'ob.

¹³Jini winic tsa' bɔ c'oti i pɔy Micaías tsi' sube: Pejtel jini yambɔ x'alt'añob wen uts'at bajche' woliyob ti t'an ti' tojlel jini rey. Jini cha'an yom ma' laj a t'an yic'otob cha'an uts'at mi' q'uelet jini rey, che'en. ¹⁴Jini Micaías tsi' jac'be: Joñon mi caj c suben che' bajche' mi' subeñon Dios, come mic bac'ñan lac Yum, che'en. ¹⁵Che' bɔ tsa' c'oti Micaías ba'an Acab, jini rey tsi' c'ajtibe: ¿Yom ba mic majlel ti guerra ya' ti Ramot ti Galaad, o mach ba yomic? che'en. Micaías tsi' pejca ti wajal bɔ t'an: Yomcu. Cucu ti guerra, come mi caj i majlel a cha'an, come lac Yum mi caj i yɔc' ti a c'ɔb, che'en. ¹⁶Jini rey tsi' sube: ¿Jayyajl yom mic subeñet cha'an ma' tsictesɔbeñon ti isujm chuqui tsi' yɔɔɔ lac Yum? che'en. ¹⁷Jini x'alt'an Micaías tsi' jac'ɔ: Tsaj q'uele pejtelel jini israelob pam pujquemob ti wits che' bajche' tiñɔme' mach bɔ anic i yaj cɔntaya. Tsa cubi i t'an lac Yum: "Ma'añobix i yum ili winicob. La'ix cha' sujticob ti' yotot ti' ñach'tilel i pusic'al", che'en lac Yum. Che' tsi' yɔɔɔ Micaías.

¹⁸I rey israelob tsi' sube Josafat i rey Judá: ¿Mach ba anic tsac subeyet? Ma'anic mi' subeñon chuqui uts'at ili winic, jini jach tsats bɔ t'an mi' subeñon, che'en. ¹⁹Pero Micaías tsi' cha' ala: Yom ma' ñich'tɔben i t'an lac Yum. Tsaj q'uele lac Yum ya' buchul ti panchan. Pejtelel ya' bɔ añob ti panchan junlajal wa'alob ti' ñoj ti' ts'ej. ²⁰Lac Yum tsi' yɔɔɔ: "¿Majqui mi caj i pɔy majlel jini rey Acab cha'an mi' majlel ti Ramot ti Galaad cha'an mi' tsɔnsɔntel?" che'en. Tsa' caji' jac'ob ti jujuntiquilob ti chajp ti chajp. ²¹Juntiquil ángel tsa' tili ti wa'tɔl ti' tojel lac Yum. Tsi' sube: "Joñon mi caj c pɔy majlel", che'en. ²²Lac Yum tsi' c'ajtibe: "¿Bajche' mi caj a pɔy majlel?" che'en. Jini ángel tsi' jac'ɔ: "Mi caj cotsan ti' pusic'al i winicob Acab espíritu

yujil ba lot”, che'en. Jini cha'an lac Yum tsi' sube: “Uts'at mi mejlel. Cucu, che' jini. Mele che' bajche' wola' ña'tan”, che'en lac Yum. ²³Isujm lac Yum tsi' yotsa ti' pusic'al jini x'alt'añob a cha'an jini espíritu yujil ba lot. Che' jini lac Yum mi caj i chocbeñet tilel wocol, che'en Micaías.

²⁴Sedequías (i yalobil Quenaana) tsa' tili i po'ch'in Micaías. Tsi' yALA: ¿Bajche' tsa' mejli i bajñel pejañet i yEspíritu lac Yum che' ma'anic chuqui tsac wis ubi? che'en. ²⁵Micaías tsi' jac'Λ: Mu'to caj a q'uel che' mi' yujtel. Ti jim ba ora mi caj a wochel ti xo'tal ti puts'el, che'en. ²⁶Acab, i rey israelob, tsi' yALA: PAlala majlel jini Micaías ba'an jini ajcal Amón ya' ba'an calobil Joás. ²⁷Yom mi la' subeñob: “Jini rey tsi' yAC'Λ mandar cha'an mi la' wotsan ti majquibal. Aq'uen ts'ita' jach chuqui mi' jap chuqui mi' c'ux jinto mic cha' sujtel ti uts'at”. Che' yom mi la' suben, che'en Acab. ²⁸Micaías tsi' jac'Λ: Mi uts'at ma' cha' sujtel che' ujtemet ti guerra, mi caj la' ña'tan che' jini, mach jinic lac Yum tsa' ba i pejcayon, che'en. Micaías tsi' yALA ti' tojlel pejtelel jini wa'alo' ba: Yom mi la' p'is ti wenta jini tsa' ba cALA, che'en.

²⁹Pero i rey israelob yic'ot Josafat i rey Judá temel tsa' majliyob ti guerra ti' contra Ramot ti Galaad. ³⁰I rey israelob tsi' sube Josafat: Mi caj c lap i pislel soldado che' mic majlel ti guerra, pero jatet lapA a pislel ti rey, che'en. Che' jini mucul jach tsa' majli ti guerra Acab i rey israelob.

³¹Pero i rey siriajob tsi' yAQ'ue mandar jini lajchAntiquil i cha'c'al (32) i yum soldadojob ti carreta tac: Mach la' cha'len contra yic'ot winicob mi soldadojob mi i yumob. Cojach yom ma' tsAnsan i rey israelob, che'en. ³²⁻³³I yum soldadojob che' ba tsi' q'ueleyob ya'an Josafat, tsi' yALAyob: Jiñach i yum jini israelob, che'ob. Che' ba tsa' c'otiyob cha'an mi' contrajiñob, Josafat tsi' bac' cha'le c'am ba oñel cha'an mi' tsictesan i ba. Jini cha'an ma'anic chuqui tsi' tumbeyob Josafat, come tsi' q'ueleyob mach jinic Acab.

³⁴Pero juntiquil winic tsi' choco majlel i te'el jalajb che' ma'anic tsi' tojbi. Toj tsi' taja Acab i rey israelob ya' ba' tsuyul i bujc melbil ba ti tsucu taq'uin. Jini rey tsi' sube i pi'Al woli ba i ñijcan carreta: Yom ma' sutq'uin carreta cha'an ma' loc'sañon ti guerra, come lojwemonix. Mach chan mejlicon, che'en.

³⁵Ti jim ba q'uin che' cabal woli' jats'ob i ba ti guerra, jini i rey israelob tsa' mejli i q'uel jini siriajob ya' ba ñac buchul ti carreta. Tsa' bejq'ui cabal i ch'ich'el. Ya' tsa' ts'am calé ti mal carreta. ³⁶⁻³⁷Che' bajlemix jini q'uin, tsa' caji ti ñumel ti' tojlel israelob juntiquil soldado tsa' ba i yala ti c'am ba t'an: Cha' sujtenla ti la' wotot ti jujuntiquiletla, come chamenix jini rey, che'en. Tsi' ch'ambeyob sujtel i bac'tal jini rey cha'an mi' mucob ti Samaria. ³⁸Tsi' pocoyob jini carreta ya' ti ja' am ba ti Samaria ba' mi' cha'leñob ts'amel sts'i'lel ba x'ixicob. Tsa' c'oti ts'i' i lemben i ch'ich'el. Che'ach tsa' ts'actiyi i t'an lac Yum che' bajche' tsi' yala. ³⁹Jini yan tac ba i melbal Acab, yic'ot pejtel tsa' ba ujti, yic'ot jini otot melbil ba ti marfil tsa' ba i wa'choco, yic'ot pejtel jini tejclum tac tsa' ba i wa'choco, laj ts'ijbubiliz ti' juñilel i reyob israelob. ⁴⁰Ya' tsa' mujqui Acab ba' tsa' mujquiyob i ñojte'elob. Tsa' caji i cha'len yumal Ocozías i yalobil Acab.

I yumantel Josafat

(2 Cr. 20.31-37)

⁴¹Wolix i majlel ti champ'ejl jab i yumantel Acab jini rey ti Israel che' ba tsa' wa'choconti ti rey Josafat (i yalobil Asa) ya' ti Judá. ⁴²Anix jo'lujump'ejl i cha'c'al (35) i jabilel Josafat che' ba tsa' caji ti yumal. Tsi' cha'le yumal ya' ti Jerusalén jo'p'ejl i cha'c'al (25) jab. I ña' jiñach Azuba (i yalobil Silhi). ⁴³Josafat tsi' mele chuqui wen che' bajche' Asa i tat. Tsi' jac'be i t'an lac Yum. Pero ma'anic tsi' jisa i yotlel tac dioste' ya' ti bujbujtal. Jini winicob x'ixicob tsi' chan tsansayob alac'al tac. Tsi' puluyob pom ya' ti bujbujtal. ⁴⁴Josafat tsi' teme i t'an yic'ot jini rey ti Israel.

⁴⁵Ts'ijbubil ti' juñilel i reyob Judá pejtel chuqui tsa' ujti ti' yumantel Josafat, yic'ot jini guerra tac. ⁴⁶Josafat tsi' choco loq'uel ti jini lum pejtel jini winicob mu' ba i laj ba pi'leñob i ba, mach ba anic tsa' chojquiyob loq'uel che' woli ti yumantel Asa i tat.

⁴⁷⁻⁴⁸Ma'anic i rey jini año' ba ti Edom. An jach i gobernador am ba ti' wenta Josafat. Josafat tsi' mele cabal colem barco tac cha'an mi' majlel i cuch tilel oro loqu'em ba ti Ofir. Pero ma'anic tsa' c'oti tac, come tsa' laj jejmi barco ya' ti Ezióon Geber. ⁴⁹Ocozías (i yalobil Acab) tsi' sube Josafat: La' majlicob

c winicob yic'ot a winicob cha'an temel mi' majlelob ti colem barco tac, che'en. Pero Josafat ma'anic tsi' jac'Λ. ⁵⁰Tsa' chΛmi Josafat. Tsa' mujqui ba' muculob i ñojte'elob ya' ti' tejlum David. Joram i yalobil tsi' ch'Λmbe i ye'tel.

I yumΛntel Ocozías ti Israel

⁵¹Che' ti' wuclujump'ejl (17) jab i yumΛntel Josafat ti Judá, tsa' wa'choconti Ocozías (i yalobil Acab) ti rey ti Israel. Tsi' cha'le i yumΛntel ya' ti tejlum i c'aba' Samaria. ⁵²Ocozías tsi' mele chuqui jontol ti' wut lac Yum. Lajal tsi' mele che' bajche' i tat i ña', che' bajche' Jeroboam (i yalobil Nabat), tsa' bΛ i xiq'ui ti mulil jini israelob. ⁵³Ocozías tsi' ch'ujutesa Baal. Tsi' techbe i mich'ajel lac Yum i Dios Israel che' bajche' tsi' mele i tat.